

# Tuhun Nyoo Tsa Tyaa Ra Mateo

Nyivi ra Jesucristo tsa tsicoo tsa  
ndi cumañi ca cacu ra

(Lc. 3:23-38)

**1** <sup>1</sup> Ihya nyecú tandihi sivi nyivi  
ra Jesucristo tsa tsicoo tsa ndi  
cumañi ca cacu ra. Nyivi ra David  
tan nyivi ra Abraham cuvī tsi ra.

<sup>2</sup> Sehe ra Abraham cuvī tsi ra  
Isaac, tan sehe ra Isaac cuvī tsi ra  
Jacob. Tan sehe ra Jacob cuvī tsi ra  
Judá tsihin tandihi ra yañi ra. <sup>3</sup> Tan  
ra Fares tsihin ra Zara sehe ra Judá  
tsihin ña Tamar cuvī tsi ra naha. Tan  
sehe ra Fares cuvī tsi ra Esrom, ra  
cuvī jutu ra Aram. <sup>4</sup> Tan sehe ra  
Aram cuvī tsi ra Aminadab, jutu ra  
Naasón. Tan sehe ra Naasón cuvī tsi  
ra Salmón. <sup>5</sup> Tan ra Booz, sehe ra  
Salmón tsihin ña Rahab cuvī tsi ra.  
Tan sehe ra Booz tsihin ña Rut cuvī  
tsi ra Obed, jutu ra Isaí. <sup>6</sup> Tan ra  
David, ra cuvī rey, sehe ra Isaí cuvī  
tsi ra. Tan sehe ra rey David tsihin  
ñaha tsa cuvī ñasihi ra Urías cuvī tsi  
ra Salomón.

<sup>7</sup> Tan sehe ra Salomón cuvī tsi ra  
Roboam, ra cuvī jutu ra Abías. Tan  
sehe ra Abías cuvī tsi ra Aza. <sup>8</sup> Tan  
sehe ra Aza cuvī tsi ra Josafat, ra cuvī  
jutu ra Joram. Tan sehe ra Joram  
cuvī tsi ra Uzías. <sup>9</sup> Tan sehe ra Uzías  
cuvī tsi ra Jotam, ra cuvī jutu ra  
Acáz. Tan sehe ra Acáz cuvī tsi ra  
Ezequías. <sup>10</sup> Tan sehe ra Ezequías  
cuvī tsi ra Manasés, ra cuvī jutu ra  
Amón. Tan sehe ra Amón cuvī tsi ra  
Josías. <sup>11</sup> Tan sehe ra Josías cuvī tsi  
ra Jeconías tsihin tandihi ra yañi ra.  
Tsicoo ra naha quivi tñin ra ñuu  
Babilonia naha ra tsi nyivi Israel, tsa  
cua cuhun ñi cuvi ñi musu ra ñuu  
Babilonia can naha ra.

<sup>12</sup> Tsa yaha can, tan tsicoo sehe ra  
Jeconías, tan ra ican cuvī ra Salatiel,  
jutu ra Zorobabel. <sup>13</sup> Tan sehe ra  
Zorobabel cuvī tsi ra Abiud, ra cuvī  
jutu ra Eliaquim. Tan sehe ra Eliaquim  
cuvī tsi ra Azor. <sup>14</sup> Tan sehe ra Azor  
cuvī tsi ra Sadoc, ra cuvī jutu ra  
Aquim. Tan sehe ra Aquim cuvī tsi ra  
Eliud. <sup>15</sup> Tan sehe ra Eliud cuvī tsi ra  
Eleazar, ra cuvī jutu ra Matán. Tan  
sehe ra Matán cuvī tsi ra Jacob.

<sup>16</sup> Tan ra Jacob cuvī jutu ra José, yñ  
ña María. Juvín ña cuvī sihi ra Jesús  
ra cuvī Cristo, o cuñi tsi catyí, ra tsa  
jaquitsi Nyoo tyin quihñi ndaha tsi yo.

<sup>17</sup> Tacan tsicoo utsi cumi taahan  
tata ra Abraham nda cuanda cacu ra  
David. Tan ra David, tsicoo utsi cumi  
tata ra nda cuanda quivi tñin ra ñuu  
Babilonia naha ra tsi nyivi Israel. Tan  
nda cuanda quivi can tsicoo utsi cumi  
ca tata ñi nda cuanda quivi cacu ra  
Cristo.

**Nu cacu ra Jesucristo**

(Lc. 2:1-7)

<sup>18</sup> Tyehen cuvī tan cacu ra  
Jesucristo: tsa yaha cunda tyiñu tsa  
cua tindaha ña María tsihin ra José.  
Tan tsa ndi cumañi ca naquihin ra tsi  
ña, ñihñi sehe ña tsa cuenda Tatyí li  
Nyoo. <sup>19</sup> Tan ra José, ra cua cuvi yñ  
ña, vaha xaan iñi ra. Ña cuñi ra cuhva  
ra ticanuu tsi ña. Yacan cuenda tsicá  
iñi ra tsa nacoo xeehe ra tsi ña tan ña  
cua tindaha ca ra tsihin ña. <sup>20</sup> Tan  
tsitsi tsa tsicá iñi ra yacan, quituvi iin  
ángel Jutu Mañi yo nuu ra nu quixí  
ra. Tan nyehe ra ñumaahna, tan catyí  
ángel can tsihin ra:

—José, tata ra David, ña caca iñi  
un quihin un tsi ña María cuvi ña  
ñasihi un, tyin sehe ña tsa cua cacu,

sehe Tatyí li Nyoo cuví tsi. **21** Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tsihin ra José.

**22** Tacan cuví tyin tacan tan cundaa tsa cahān ra cuví ndusu yuhu Jutu Mañi yo tahān tsanaha.

**23** Tan catyí ra tyehen:

Ñaha yoco tsa ñaha ca coo yii, cua cuhun sehe ña.

Tan cua coo iin sehe ña. Tan cua cunañi ra: Emanuel.

Tan sivi can cuñí tsi catyi: “Nyoo iyó ra tsihin yo.”

**24** Tan tsa ndoto ra José, javahā ra tumaa catyí ángel can tsihin ra. Quihīn ra tsi ña María tyin cuví ña ñasihi ra. **25** Maa tyin ña quixi ra tsihin ña nda cuanda tsa yahā cacu sehe ña. Tan jacunañi ra tsi lee can: Jesús.

**Nu cuahán ra tsitó xaan, ra cuví rey, cua nyehe ra naha nu cacu ra Jesús**

**2** **1** Cacū ra Jesús ñuu Belén tsa canyí nu cuví Judea. Tan quivi can ra cuví rey Judea nañí ra Herodes. Tacan tan tsaq juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuví ra naha. **2** Tsiqā tuhun ra naha tsi nyivi tan catyí ra naha:

—¿Nu maa nyí ra cuví rey cuenda nyivi Israel? Tyin ityi nu caná ñicanyii nyehe ndi tiñuu tsa tsahá cuenda tyin cacū ra ityi ihya. Tan vatsí ndi vatsí jacahnu ndi tsi ra —catyí ra naha.

**3** Quivi tsa tsito ra rey Herodes tsa cahān ra can naha ra, tuñu xaan cuñí ra cuví. Tacan tucu tandihi nyivi ñuu Jerusalén can. **4** Tacan tan canā ra Herodes tsi tandihi ra jutu tsa cuví ityi nuu tsihin ra cuví jutu tan tsihin tandihi ra cuví maestro cuenda ley vehe ñuhu naha ra. Tan tsiqā tuhun ra tsi ra naha numaa nda taahán tsi cacu ra Cristo. **5** Tan nacahān ra can

naha ra tan catyí ra naha:

—Ñuu Belén tsa canyí Judea, ndacan taahán tsi cacu ra tyin tyehen tyaq ra cuví ndusu yuhu Nyoo nu tutu tahān tsanaha:

**6** Tan yoocho Belén ñavin iin ñuu luhlu ñi cuví un tsa nuu tandihi maa ñuu tsa cayucú Judá

tyin nuu yoocho cua quita ra cua quihí ndaha tsi nyivi ñuu yu Israel. Maa ra cua jaha cuenda ra tsi ñi.

Tacan catyí nu tutu Nyoo, —catyí ra can naha ra tsihin ra Herodes.

**7** Tacan tan canā xeehe ra Herodes tsi ra tsitó xaan can naha ra, tan tsiqā tuhun ra tsi ra naha náa quivi tan náa hora quituvi tiñuu can. **8** Tacan tan jacuhun ra tsi ra naha nda ñuu Belén, tan catyí ra tsihin ra naha:

—Cuaahan ndo, tan ndāca tuhun vaha ndo tsa cuenda ra lee can. Tatun nañihi ndo tsi ra, quitsi catyi tuhun ndo tsihin yu, tyin cuhun ndihi yu cujacahnu yu tsi ra —catyí ra Herodes tsihin ra naha.

**9** Tsa tsíñi ra tsa tsitó xaan can naha ra tsa cahān ra Herodes, tan quihīn ra naha ityi cuahán ra naha. Tan tiñuu tsa nyehe ra naha ityi nu caná ñicanyii can, cuahán tsi ityi nuu ra naha. Tan tsiquiñi tsi maa maa siqui nu canyí ra lee can. **10** Tan tsa nyehe ra tsitó xaan can naha ra tyin tsiquiñi tiñuu can, siñ xaan cuñí ra naha. **11** Tan quihvi ra naha tsitsi vehe nu canyí lee can. Tan nyehe ra naha tsi ra tsihin ña María, sihi ra. Tan tsiquiñi tsiti ra naha tyin jacahnu ra naha tsi lee can. Tacan tan nuñā ra naha yuhu caja tsa ndahá ra naha. Tan tava ra naha regalo tsa cuví xuhun cuaan, tan cutu vixi, tan ndutya tami tsa nañí mirra. Tan tsaha ra naha tsi lee can. **12** Tsa yahā tsa nyehe ra naha tsi ra Jesús tan cuanuhū ra naha. Tan tsa cuanuhū ra naha nyehe ra naha ñumaahna tan

catyí tsi tyin ña taahán tsi cuhun ra naha cucatyí tuhun ra naha tsihin ra Herodes. Yacan cuenda siin ityi cuanuhu ra naha.

**Nu tsinü xeehe ra José tan ña María tsihin lee sehe ñi nda Egipto**

13 Tsa yahā cuahán ra tsa tsitó xaan can naha ra, tacan tan iin ángel Jutu Mañi yo quituví nuu ra José tsitsi ñumaahna. Tan catyí ángel can tsihin ra:

—Nduvita, quihin tsi lee ihya, tsihin sihi ra, tan cuhun ndo nda ñuhu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihya tyin cuñi ra cahni ra tsi ra —catyí ángel can tsihin ra José.

14 Tacan tan nduvita ra José tsacuaa can. Tan quihin ra tsi lee can tsihin sihi tsi. Tan cuahán ñi nda Egipto. 15 Ndacan tsicoo ñi nda cuanda tsa tsihi ra Herodes. Tacan cuví tyin cundaā tsa cahān ra cuví ndusu yuhu Jutu Mañi yo tahañ tsanaha jahā Nyoo. Tyehen catyí ra: “Nda Egipto canā yu tsi Sehe yu”, catyí ra.

**Nu tava tyiñu ra Herodes na cahni ra naha tsi ra nyihi**

16 Tsa ndi cumañi ca cúu ra Herodes tan ndi ndatú ra tsa quitsi nyico ra tsitó xaan can naha ra tan tsa tuví iñi ra Herodes tyin ra tsitó xaan can naha ra jandavi ñaha ra naha tsi ra, tan nduxaan xaan ra. Tan tava tyiñu ra na cahni andaru tsi tandihi ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacu nda cuanda ra nyihi tsa uvi cuiya. Tacan javahā ra tyin tsicá iñi ra tyin tacan cuiya ra Jesús tumaa catyí ra tsitó xaan can naha ra tsihin ra. 17 Tacan cuví tyin cundaā tsa cahān Nyoo tan tyaā ra Jeremías, ra cuví ndusu yuhu ra tahañ tsanaha. Tyaā ra tyehen:

18 Tsiñi yo iin ndusu ñuu Ramá,

tsacú tsa nyivi, tan iyo taahán ñi.

Juvin ñi nyivi cuví tata ña Raquel, nyivi Israel, tsacú tsa ñi tsa cuenda sehe ñi.

Maa tyin ña cuñi ñi tsa naquihin ndaahvi nyivi tsi ñi tyin tsa yahā tsihi sehe ñi, catyí tsi nu tutu Nyoo.

19 Maa tyin tsa yahā tsa tsihi ra Herodes, tacan tan quituví nyico iin ángel Jutu Mañi yo nuu ra José nu quixí ra nda Egipto. Tan catyí ra tsihin ra:

20 —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducu cahni tsi ra lee ihya.

21 Tacan tan nduvita ra José, tan quihin ra tsi lee can tan tsihin sihi ra. Tan cuanuhu ñi nda Israel. 22 Maa tyin quivi tsito ra José tyin ra Arquelao, sehe ra Herodes, cuví ra rey nda Judea, nayuhvi ra tan ña cuñi ra cuhun ra ndacan. Tan cuanuhu ñi nda Galilea tyin tacan jacoto Nyoo tsi ra tsitsi ñumaahna. 23 Tsa tsaā ñi ican, tan cuahán ñi nda ñuu Nazaret, cua coo ñi. Tan ican tsicoo ñi. Tacan cuví tyin cundaā tsa cahān ra cuví ndusu yuhu Nyoo tahañ tsanaha. Tyin catyí ra naha tyin ra Jesús ra ñuu Nazaret cua cuvi ra.

**Nu cahān ra Juan tuhun Nyoo tsihin nyivi**

(Mt. 1:1-8; Lc. 3:1-9, 15-17; Jn. 1:19-28)

3 Quivi tsa ndi iyó ñi ñuu Nazaret, ra Juan, ra jacoondutyá tsi nyivi, cuahán ra nu tsiqui tsa iyó Judea. Tan quitsahā caahán ra tuhun Nyoo tsihin nyivi tsa tsaá nu nyí ra. 2 Tan catyí ra:

—Ndu uvi iñi ndo cuatyí ndo tyin tsa cuñi tsa quivi cundaca ñaha Nyoo tsi yo.

3 Juvin ra Juan cuví ra tsa cahān ra Isaías ra cuví ndusu yuhu Nyoo

tahān tsanaha. Tan tyaā ra tsa tsahā  
Nyoo tsi ra tyehen:

Cua tyaā soho yo ndusu ra nu  
caná tsaā ra nu tsiqui tan  
catyí ra:

“Nuña ndo iin ityi cuiṭi.

Tan natyiso vaha ndo tsi ndo  
tyin tsa vatsi Jutu Mañi yo,”  
catyí tuhun tsa tyaā ra Isaías.

4 Tan ra Juan nditsí ra jahma tsinū  
tsihin ixi camellu. Tan cinturón ra,  
ñiñ cuví tsi. Tan tica xama tsatsí ra  
tan tsihí ra ndutyā ñuñu. 5 Quitsj  
nyivi ñuu Jerusalén tan tandihí ñuu  
tsa cayucú Judea, tan nyivi tsa iyó  
yatyin ñi ityi yutya cahnu Jordán  
can; quitsj tyaā soho ñi tuhun caahán  
ra. 6 Tan tsa yaha nahmā ñi cuatyí ñi,  
ra Juan jacoondutyā ra tsi ñi yutya  
cahnu Jordán ican.

7 Maa tyin nyehe ra Juan tyin  
cuaha xaan ra fariseo, ra tsa tyaá  
yahvi xaan ley vehe ñuhu, tan cuaha  
xaan ra saduceo, quitsj ra naha tyin  
coondutyā ra naha. Tan catyí ra  
tsihin ra naha:

—iNyooho, tumaa tata coo xaan  
cuví ndo! ¿A cuñí maa ndo tyin tsihin  
tsa coondutyā ñi ndo tan ña cua tatsi  
tuñi ca Nyoo tsi ndo? Ña cuví.

8 Nasama ndo cuhva iyó ndo, na  
nyehe yo tyin tsa ndu uví iñi ndo  
cuatyí ndo nuu Nyoo. 9 Maa tyin ña  
nduyaa ndo tan catyí ndo tyin nyivi  
tata ra Abraham cuví ndo. Tyin vasu  
tsihin yuu ihya, Nyoo cuví jananduvi  
ra nyivi ra Abraham. 10 Tsa ndatú  
yatsa Nyoo tsi tandihí ndo tsa cuví  
ndo tumaa yutun tsa ña tsahá tsiti  
vaha. Cua tyahnya tun tan cua cayu  
tun, tacan cua javaha Nyoo tsihin  
ndo —catyí ra Juan—. 11 Tsa nditsa  
tyin yuhu jacoondutyá yu tsi nyivi  
tsihin ndutyā, tan cuví tsi iin seña  
tyin tsa ndu uví iñi ñi cuatyí ñi. Maa  
tyin tsa yaha jacoondutyā yu tsi ñi  
tsihin ndutyā, vatsí inga ra cua  
jacoondutyā tsi ñi tsihin Tatyí Ii

Nyoo tan tsihin ñuhu ihñi. Iyó ca  
tunyee iñi Nyoo tsi maa ra tan ñavin  
ca yuhu. Tan ndi tsa cuiso yu nditsan  
ra tan nduve yahvi nyaá yu, tyin maa  
ra cahnu ca cuví ra. 12 Tan ra ican  
ndahá ra pala tyin cua jandava ra  
trigu. Cua tava siin ra trigu vaha,  
tan cua natyihi vaha ra itsi. Tan cua  
cahmi ra tsahan tsa quita tsihin trigu  
can tsihin ñuhu tsa ña cua ndahva  
maa —catyí ra Juan.

#### Nu tsicoondutyā ra Jesús

(Mr. 1:9-11; Lc. 3:21-22)

13 Tacan tan quita ra Jesús Galilea  
tan tsaā ra yutya cahnu Jordán nu nyíi  
ra Juan, tyin cuñí ra tsa jacoondutyā  
ra Juan tsi ra. 14 Tsa jihna ñi ña cuñí  
ra Juan jacoondutyā ra tsi ra, tan  
quitsahā catyí ra tsihin ra:

—Cuñí un tsa jacoondutyā yu tsi  
un, maa tyin ña taahán tsi tsa  
jacoondutyā yu tsi un. Maa un taahán  
tsi jacoondutyā tsi yu —catyí ra.

15 Maa tyin ra Jesús catyí ra tsihin  
ra:

—Tsa vityin, na cuvi tsi cuhva  
catyí yu tsihin un. Tyin cuñí tsi tsa  
javaha yo tandihí tsa vaha tsa cuñí  
Nyoo —catyí ra tsihin ra Juan.

Tacan tan ndoq ra Juan vaha.

16 Tsa yaha tsicoondutyā ra Jesús  
tan quita ra tsitsi ndutyā. Tan nuñā  
andivi, tan ra Jesús nyehe ra vatsí  
nuú Tatyí Ii Nyoo, tumaa iin paloma.  
Tan tsaā tsi siqui ra. 17 Tacan tan  
cahān iin ndusu ityi andivi, tan catyí  
tsi tyehen:

—Ra ihya cuví Sehe yu, tan cuñí  
xaan yu tsi ra. Tan siñ xaan cuñí yu  
tsihin ra —catyí ndusu can.

#### Nu nducu cuhva nu ña vaha tsi ra Jesús

(Mr. 1:12-13; Lc. 4:1-13)

4<sup>1</sup> Tacan tan tsindaca Tatyí Ii  
Nyoo tsi ra Jesús iin nu tsiqui,  
tyin cua nducu cuhva nu ña vaha tsi ra.

2 Tsiçoꝝ nyitya ra uvi xico nduvi tan uvi xico tsacuaa. Tsa yaha can tan quitsi socó tsi ra. 3 Tacan tan natuhva nu ña vaha nu nyaá ra, tyin cuñi nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahān tsihin yuu ihya, na nanduvi tsi paan —catyí nu ña vaha tsihin ra Jesús.

4 Maa tyin ra Jesús nacahān ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihi tuhun caahān Nyoo” —catyí ra Jesús tsihin nu ña vaha.

5 Tacan tan quihin nu ña vaha tsi ra. Tan cuahān ra tsihin nu nda ñuu ii Jerusalén. Tan jandaꝝ nu tsi ra jiñi vehe ñuhu cahnu. 6 Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuanda nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un, tan ña cua nañi tsaha un nuu yuu.

7 Tan nacahān ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

8 Tacan tan quihin nu ña vaha tsi ra inga tsaha, tan cuahān ra tsihin nu iin jiñi yucu sucun. Tan janaha nu tandihi tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi. 9 Tan catyí nu tsihin ra:

—Yuhu cuhva yu tandihi maa tsa janaha yu tsi un, tatun yooho tan cuiñi tsiti un nuu yu tan jachnu un tsi yu.

10 Tacan tan nacahān ra Jesús tan

catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jachnu tsi intuhun ñi maa Jutu Nyoo, tan jaha tyiñu tyiñu ra.”

11 Tacan tan cuahān nu ña vaha, tan ndoꝝ ra Jesús. Tan tsaꝝ ángel tan jatyinyeꝝ ra naha tsi ra.

**Nu quitsaha caahān ra Jesús tuhun Nyoo tsihin nyivi tsa iyó ñuu tsa cayucú Galilea**

(Mr. 1:14-15; Lc. 4:14-15)

12 Quivi tsa tsitoꝝ ra Jesús tyin ra Juan nyii ra vehe caa, cuahān ra nda Galilea. 13 Maa tyin ña ndoꝝ ra ñuu Nazaret, nu tsahnꝝ ra. Cuahān ra cua coo ra nda ñuu Capernaum, iin ñuu tsa canyii yatyin ñi yuhu miñi, nu ñuhu ra Neftalí yatyin ñuhu ra Zabolón. 14 Tacan tan cundaꝝ tsa cahān ra Isaías, ra cuví ndusu yuhu Nyoo, tahān tsanaha. Tan catyí ra:

15 Ñuhu ra Zabolón tan ñuhu ra

Neftalí

tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví.

16 Nyivi iyó nu naa, ñi iyó nu iyó tixahñu tuhun tsihi,

nyehé ñi iin ñuhꝝ nditsin tsa jandunditsín nu yucú ñi, catyí ra Isaías.

17 Nda cuanda quivi can, tan quitsaha caahān ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuñi tsa quivi cundaca ñaha Nyoo tsi ndo —catyí ra Jesús tsihin nyivi.

**Nu canꝝ ra Jesús tsi cumi taahan ra tsa tñín tyaca**

(Mr. 1:16-20; Lc. 5:1-11)

18 Ra Jesús tsicá ra yuhu miñi tsa nañi Ndu tyaca Ñuhu Galilea. Tan nyehé ra tsi uvi taahan ra tsihin yañi ra, ra Simón tsa nañi tucu Pedro, tan ra

Andrés. Ra tíñ tyaca cuví ra naha. Tan cañi ra naha traya ra naha nu ndutya. **19** Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tíñ ndo tyaca, tacan cua ñihi ndo nyivi cua cuví nyivi Nyoo —catyí ra Jesús tsihin ra naha.

**20** Juvín ñi cuhva can nacoꝝ ra naha traya can, tan cuahán ra naha tsihin ra Jesús.

**21** Luxu ñi tsicā ra naha ityi nuu, tan nyehe ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan cañā ra Jesús tsi ra naha. **22** Juvín ñi cuhva can tan nacoꝝ ra naha tsi jutu ra naha tan yutun ndoo can, tan cuahán ra naha tsihin ra.

#### Nu cuaha xaan nyivi jacuahā ra Jesús

(Lc. 6:17-19)

**23** Cuahán ra Jesús tsicá ra tandihí ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahā ra tsi nyivi cuuhví tsihin tandihí ñi nuu cuehe tsa yihí tsi ñi. **24** Tacan tan tsitō tandihí nyivi ñuu cuenda Siria tuhun ra Jesús. Tan tsindacā ñi tandihí nyivi cuuhví tsi ra: juhva ñi yihí tatyí ña vaha. Tan yihí ñi tsiihí naaha ñi. Tan yihí ñi ndohó ñi cuehe xii. Tan janduvahā ra Jesús tsi tandihí ñi. **25** Cuaha xaan nyivi nyicún tsi ra Jesús: nyivi iyó ñuu tsa cayucú Galilea, nyivi tsa quee nu utsi taahan ñuu tsa nañí Decápolis, nyivi iyó ñuu Jerusalén tan tandihí ca ñuu tsa cayucú Judea, tan nyivi iyó inga tsiyo yutya cahnu Jordán.

#### Nu cahān ra Jesús tsihin nyivi nu tsiqui

(Lc. 6:20-23)

**5** <sup>1</sup> Nyehe ra Jesús tyin cuaha xaan nyivi, tan ndaā ra iin nuu yucu. Tan tsicunyaā ra ican. Tacan tan nyivi tsicá tsihin ra, tsinunduví ñi tsi ra. **2** Tacan tan quitsahā jacuahá ra tsi ñi tan catyí ra:

**3** Nasocó Nyoo tsi tandihí nyivi tsa tsitó tyin tsíñi ñuhu ra tsi ñi, tan tsa cuenda ñi cuví nu ndacá ñaha ra.

**4** "Tan tandihí nyivi tsa cuiihya cuñi tsa cuenda cuatyí ñi, nasocó Nyoo tsi ñi tan ña cua coo ca ñi tucuiihya iñi.

**5** "Tan tandihí nyivi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayivi tsa catyí Nyoo tyin cuhva ra tsi ñi.

**6** "Tan tandihí nyivi tsa cuñi xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuví javaha ñi cuhva cuñi maa ra.

**7** "Tan tandihí nyivi tsa cundaahví iñi tsi inga nyivi, nasocó Nyoo tsi ñi, tan cua cundaahvi iñi ra tsi ñi.

**8** "Tan tandihí nyivi tsa janduvahā Nyoo añima, nasocó ra tsi ñi, tan cua nyehe ñi tsi ra.

**9** "Tan nyivi tsa nducú cuhva tsa coo vaha nyivi tsihin Nyoo tan tsihin inga nyivi, nasocó ra tsi ñi tan cua catyí ra tyin sehe ra cuví tsi ñi.

**10** "Tan tandihí nyivi tsa javahá cuhva cuñi Nyoo tan ndasi cuñi nyivi nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra. **11** "Nasocó Nyoo tsi nyooho tsa caahán nyivi ndavaha ñi tsata, tan javahá ñi tsa uhvi tsi ndo, tan caahán ñi cuendu tsa ña nditsa siqui ndo tsa cuenda tsa tsinú iñi ndo tsi yu.

**12** Cusiñi iñi ndo tun tacan javahá nyivi tsihin ndo; siñi cuñi ndo, tyin cahnu xaan tan siñi xaan caá tsa cua ñihi ndo nda gloria. Tyin juvín ñi

tacan javahá nyivi tsa ña vaha tsihin tandihí ra cuví ndusu yuhu Nyoo tahán tsanaha.

**Tatun jandihí yo tsa tsinú iñi  
yo tsi Nyoo cuví yo tumaa  
ñii tsa ndihí tsa uhva**  
(Mr. 9:50; Lc. 14:34-35)

13 'Nyooho tsa tsinú iñi tsi yu, tumaa ñii vaha cuví ndo. Maa tyin tatun ñii, tan ndihí tsa uhva tsi, ña cua jandu uhva ca tsi tsa catsi yo. Ña vaha ca ñii can. Tacan tan javita yo can, tan cuañi nyivi tsata can.

**Tatun tyaá yahvi vaha yo tuhun  
caahán Nyoo, cuví yo tumaa ñuhú tsa  
jandunditsín nu tsicá nyivi nu naa**

14 'Nyooho cuví ndo tumaa ñuhú tsa jandunditsín nu tsicá nyivi. Iin ñuu tsa canyí jiñi iin yucu, ña cua cuví quihí xeehe tsi. 15 Ña tuhvá yo tyaá ñuhú tyuma, tan tyihí xeehe yo itsi tsitsi iin caja. Tyin tuhvá yo tyaá ñuhú tan tinyí yo itsi iin nu sucun tyin tacan tan jandunditsin tsi nu yucú yo tsitsi vehe yo. 16 Tan tacan taahán tsi jandunditsin tucu nyooho tsihin ñuhú Nyoo tsa iyó añima ndo nu tsicá nyivi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

**Nu jacuahá ra Jesús tyin ñiñi xaan  
javaha yo tandihí tuhun tsa tsahá  
Nyoo tsi yo tan jacuahá yo itsi tsi nyivi**

17 'Ña cuñi ndo tyin yuhu vatsí janaa yu ley tsa tsahá Nyoo tsi ra Moisés tyin tyaá ra. Tan ndi ña vatsí janaa yu tuhun tsa tyaá tandihí ra cuví ndusu yuhu Nyoo tahán tsanaha. Ñavin tyiñu can vatsí yu. Yuhu vatsí yu vatsí tyaá yahvi yu tsa caahán ley can, tan catyí tuhun yu tsihin ndo náa cuñí tsi catyí ley can. 18 Tsa nditsa catyí yu tsihin ndo tyin tsitsi tsa ndi iyó ñuhu ñayivi tan andivi, ña cua naa ndi luxu ley tsa tyaá ra Moisés tyin tandihí maa tsa tyaá ra naha tan cua cundaa tsi. 19 Yacan

cuenda, ra tsa ña tyaá yahvi cuhva catyí Nyoo, vasu iin tsa luhlu ñi; tan janahá ra tsi nyivi na javaha ñi tacan, luxu cuii ñi cua cuví ra nu ndacá ñaha Nyoo. Maa tyin ra tsa tyaá yahvi tandihí, tan janahá ra tsi inga nyivi, cahnu xaan cua cuví ra nu ndacá ñaha Nyoo. 20 Catyí yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuví quihvi ndo nu ndacá ñaha Nyoo.

**Nu caahán ra Jesús tsihin yo tyin ña  
taahán tsi cahan yo tsi nyivi**

21 'Nyooho tsa cuaha tsaha tsiñi ndo tsa catyí Nyoo tsihin nyivi tsicoó tahán tsanaha. Catyí ra: "Ña cahñi ndo tsi nyivi, tyin tatun cahñi ndo nyivi, taahán tsi tsa cutuñi ndo." 22 Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyivi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyí ndo tyin soho xaan caá ñi, taahán tsi cuhun ndo anyaya tsa cuenda cuatyí can.

23 'Tan yacan cuenda quivi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javahá un tsi yañi un, 24 ñacoo tsa cuahán tsihin un ityí nu altar vehe ñuhu. Tan cuhun jihna un ndacan un tucahnu iñi tsi yañi un. Tacan tan cuhun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

25 'Tatun iin ra tsicán cuatyí tsaha un, tan cuahán un tsihin ra nda nu nyaá ra cumí tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumí tyiñu, tyin ra cumí tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihí ra naha tsi un

vehe caa. **26** Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandíhi xuhun tsa cua ndacan ra naha.

**Nu caahán ra Jesús tyin ndi tsa tsicá iñi yo tsa coo inga ñaha, o inga rayí tsi yo, tan ña vaha**

**27** Nyooho tsa tsiñi ndo tyin catyí Nyoo tahán tsanaha tyin nyooho tsa iyó ñasiíhi, ña cua coo inga ñaha tsi ndo, tan ndi ñaha tsa iyó yí tan ña taahán tsi coo inga rayí tsi ña.

**28** Maa tyin yuhu catyí yu tsihin ndo, nyooho tsa nyehé iin ñaha tan cuñí ndo coo ndo tsihin ña, tsa tsicoo cuatyí ndo.

**29** Tatun tinuu cuaha un janacavá tsi un tsitsi cuatyí, vaha taxin ca tava un tinuu un tan javita un can. Tyin vaha ca quíhvi un nu ndacá ñaha Nyoo tsihin intuhun ñi tinuu un, tan ñavin ca tsa cuhun un anyaya tsihin nduvi taahan tsi. **30** O tatun iin ndaha un janacavá tsi un tsitsi cuatyí, vaha taxin ca cahnya un ndaha un tan javita un can. Tyin vaha ca tsa quíhvi un nu ndacá ñaha Nyoo tsihin tsa lundu ndaha un, tan ñavin ca tsa nani un tan cuhun un anyaya.

**Nu caahán ra Jesús tyin ña vaha tsa nacoo ihñi rayí tsi ñasiíhi ra**

*(Mt. 19:9; Mr. 10:11-12; Lc. 16:18)*

**31** Tan juvin ñi catyí Nyoo tsihin nyívi tsicoo tahán tsanaha tyin yóo ra nacoo ihñi ñasiíhi ra, cuñí tsi tsa cani ra tutu tsa tindahá ra tsihin ña.

**32** Maa tyin catyí yu tsihin ndo tyin nduve ndatu iyó tsi rayí tsa nacoo ra ñasiíhi ra tatun ña quituvi ña tsihin inga rayí. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayí cua coo ndíhi cuatyí ña. Tan tacan ra tsa cua quihin tsi ña cua coo ndíhi cuatyí ra.

**Ña cahan yo “naha Nyoo maa”**

**33** Tan tsiñi ndíhi ndo, tyin catyí tucu Nyoo tsihin nyívi tsicoo tahán tsanaha: “Tatun catyí ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.” **34** Maa tyin yuhu catyí yu tsihin ndo tyin ña cahan ndo “naha Nyoo maa”. Tan ña cahan ndo tuhun andívi, tyin yacan cuví nu nyaá Nyoo. **35** Tan ndi tuhun ñuhu ñayívi ihya ña cahan ndo, tyin ihya cuví nu tsañi Nyoo. Tan ndi ña cahan ndo tuhun ñuu Jerusalén, tyin ican cuví ñuu maa Nyoo tsa cuví ra Rey cahnu ca. **36** Tan ndi ña cahan ndo tuhun jíhi ndo, tyin ña cuvi janducuitsin ndo tan ndi tsa jandutuun ndo ndi intuhun ixi jíhi ndo. **37** Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyí ndo “naha Nyoo maa” nu ña vaha jacahán tsi ndo tsa cahan ndo tacan.

**Nu caahán ra Jesús tyin tatun javahá nyívi tsa ña vaha tsihin yo, na javaha yo tsa vaha tsihin ñi**

*(Lc. 6:29-30)*

**38** Tan tsiñi tucu ndo tsa catyí Nyoo tahán tsanaha: “Tatun cañi nyívi tsi ndo, tan tava ñi iin nuhu ndo, o iin tinuu ndo, taahán tsi tyin javaha ndíhi ra cumi tyíñu tacan tsihin ñi, tumaa tsa javahá ñi tsihin ndo.” **39** Maa tyin yuhu catyí yu tsihin ndo, tyin ña javaha ndo tsa ña vaha tsa javahá nyívi xaan cuñi nyehe tsi ndo. Tyin tun yóo cañi iin tsiyo nuu ndo, taahán tsi tsa cuhva ndíhi ndo inga tsiyo na cañi ndíhi ñi, tan ña cuxaan ndo tsi ñi. **40** O tatun tsicán ñi cuatyí tsaha ndo, tan cuñi ñi quihin nyaa ñi iin camisa ndo. Taahán tsi cuhva ndíhi ndo chamarra ndo tsi ñi tan ña cua cuxaan ndo tsi ñi. **41** O tatun yóo cuñi cundaca ndo ndaha tyíñu ñi iin kilómetro, taahán



tsi cundaca ndo can uvi kilómetro.  
**42** Tatun yóo nyívi tsicán tumañi iñi tsi ndo, cūhva ndo tsa nducu ñi. Ña cātyi ndo tyin ña javaha ndo tumañi iñi can tsi ñi.

**Na cuñi yo tsi nyívi xaan iñi tsi yo**

(Lc. 6:27-28, 32-36)

**43** Tan tsiñi tucu ndo tyin catyi Nyoo tahañ tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.”

**44** Maa tyin yuhu catyí yu tsihin ndo, cuñi ndo tsi nyívi xaan iñi tsi ndo. Tan javaha ndo tsa vaha tsihin nyívi caahán tsi ndo, tan tsi nyívi ña cuñi nyehe tsi ndo. Tan ndacan tahvi ndo tsi Nyoo tsa cuenda nyívi tsa caahán nyaa tsi ndo tan tsa cuenda ñi tsa jacuví tsa uhvi tsi ndo. **45** Tatun javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyívi vaha tan nyívi ña vaha. **46** Tatun nyooho tan cuñi ndo tsi nyívi vaha iñi tsi ndo tan ndasi cuñi ndo nyehe ndo tsi nyívi xaan iñi tsi ndo, nduve tsa vaha cua ñihi ndo. Tyin juven ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñi maa ndo tyin quiñi xaan iyó ra can naha ra. **47** Tatun tshahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyívi, nduve tsa vaha xaan javahá ndo. Tyin juven ñi tacan javahá nyívi tsa ña tsitó tuhun Nyoo. **48** Tumañ Jutu yo tsa nyaá gloria cuiti xaan iyó ra, tacan taahán tsi coo tucu nyooho.

**Nu caahán ra Jesús nácaa javaha yo tumañi iñi**

**6** <sup>1</sup> Jaha ndo cuenda tan ña nduyaa ndo náa tumañi iñi javaha ndo tsi nyívi. Tyin tatun javaha ndo tumañi iñi tyin nyehe nyívi, Jutu yo, ra nyaá gloria, nduve náa cua cuhva ra tsi ndo. <sup>2</sup> Tun cua

javaha ndo tumañi iñi, ña cua jacoto ndo tsi inga nyívi tyin javahá ndo tumañi iñi. Ña javaha ndo tumañi icá ra tsa jahá tyin vaha xaan ra tan tsicá nuu ra naha nyuhvi tan tsitsi vehe ñuhu. Javahá ra naha tumañi iñi tyin na catyi nyívi tyin vaha xaan iñi ra naha. Yacan ñi ñihj ra can naha ra, tan nduve náa cua cuhva Nyoo tsi ra naha. <sup>3</sup> Yacan cuenda quiñi javahá ndo tumañi iñi tsi nyívi ndaahvi, ña jacoto ndo ndi tsi ra tsa vaha xaan ca iñi tsi ndo. <sup>4</sup> Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

**Nu caahán ra Jesús nácaa ndacan tahvi yo tsi Jutu yo Nyoo**

(Lc. 11:2-4)

<sup>5</sup> Tatun cua ndacan tahvi ndo tsi Nyoo, ña javaha ndo tumañi javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyívi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyívi tyin vaha xaan ra naha. Tsa nditsa catyí yu tsihin ndo tyin yacan ñi ñihj ra naha. <sup>6</sup> Maa tyin nyooho quiñi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyívi tsi ndo. Quihví ndo tsitsi vehe ndo tan nacasi ndo yuvehe ndo tan ndacan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyívi. Tan cua cuhva ra tsa vaha tsi ndo.

<sup>7</sup> Tatun cua cahan ndo tsihin Nyoo, ñavin juven ñi tuhun tsa nduve yahvi nyaa cahan ndo. Tacan javahá nyívi tsa ña tsitó tsi Nyoo. Cuñi maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juven ñi tuhun tsa tsa yaha cahan ñi. <sup>8</sup> Ña javaha ndo tacan. Tyin Nyoo tsa tsitó ra náa tsiñi ñuhu tsi

ndo tsa ndi cumañi ca ndacan ndo tsi ra. <sup>9</sup> Yacan cuenda nyooho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

<sup>10</sup> Na quitsi tsa ndaca ñaha un nu ñuhu ñayivi ihya, tan na javaha tandihi nyivi tandihi cuhva cuñi maa un, tumaa cuví nda gloria.

<sup>11</sup> Cuhva tsa catsi ndi tahan tahan quivi.

<sup>12</sup> Jaha tucahnu iñi tsi ndi náa tsa ña vaha javahá ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

<sup>13</sup> Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihi tunyee iñi tsi un. Tan taahán tsi tyin jacahnu tandihi nyivi tsi maa ñi un tandihi maa quivi tan na ña cundihi tsi. Na cuvi tsi tacan ñi.

Tyehen taahán tsi ndacan tahvi ndo tsi Nyoo.

<sup>14</sup> Tyin tatun nyooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo. <sup>15</sup> Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyí ra Jesús.

**Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi**

<sup>16</sup> Tan catyí tucu ra Jesús tsihin nyivi:

—Quivi tsa iyó nyitya ndo tyin

nanducú ndo tsi Nyoo, ña cuiihya nyehe ndo, tumaa javahá nyivi jahá tyin vaha xaan ñi. Tyin cahyí ñi nyaa nuu ñi tyin cuñi ñi tsa nyehe nyivi tyin iyó nyitya ñi tan nanducú ñi tsi Nyoo. Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi. <sup>17</sup> Maa tyin nyooho quivi tsa iyó nyitya ndo tyin nanducú ndo tsi Nyoo, nacatya ndo nuu ndo. Tan tyihi ndo cuca jiñi ndo. <sup>18</sup> Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

**Tsa vaha tsa iyó nda gloria**

(Lc. 12:33-34)

<sup>19</sup> Ña jacaya ndo tsa cuca tsa iyó nu ñuhu ñayivi ihya. Tyin coto tiví tsi jaha tiquixin o jaha cuxi. O cuví quihvi ñasuhu, tan suhu nu tandihi tsa jacaya ndo. <sup>20</sup> Vaha ca jacaya ndo tsa cuca tsa iyó nda gloria. Tyin ña cua cundihi tsi ndacan. Tyin ña cuvi tiví tsi ndacan, tan nduve quití jatívi itsi, ndi nduve ñasuhu. <sup>21</sup> Tyin nu natyihí vaha ndo tsa cuca, ican cua cunyaa ndihi añima ndo.

**Nu caahán ra Jesús tyin na jaha yo cuenda ñuhu nditsin tsa tyihí ra añima yo**

(Lc. 11:34-36)

<sup>22</sup> Tinuu ndo cuví ñuhu nditsin tsi ndo. Tatun vaha tinuu ndo, taniñ cuñu ñuhu ndo tan iyó ñuhu nditsin. Tan tuhun ihya cuñi tsi catyi tyin tatun iyó ñuhu nditsin Nyoo añima ndo cuví ndo nyivi vaha. <sup>23</sup> Maa tyin tatun ña vaha tinuu ndo, tandihi cuñu ñuhu ndo tan nyii tsi nu naa. Tan tacan tucu tatun nduve ñuhu Nyoo iyó añima ndo, cuví ndo tumaa iin ra cuaa. Nu naa cuahán ndo tan ña cuví nyehe ndo ityí vaha tsa cuahán nu nyaá Nyoo.

**Nu caahán ra Jesús tyin ña cuvi  
tyaa yahvi yo tsi Nyoo tatun  
cuñí xaan ca yo xuhun**

(Lc. 16:13)

24 'Iin musu ña cuvi coo uvi tsitoho ra. Tyin musu can cuñí ca ra tsi iin ra tan ñavin ca tsi inga ra. Tan tyaá yahvi ra tsi iin ra, tan ñavin ca tsi inga ra. Tan tacan tucu nyooho, ña cuví cuñi ndo tsi Nyoo, tan cuñi tucu ndo xuhun.

**Nu caahán ra Jesús tyin ña caca xaan  
iñi yo náa ndíhi tsa tsiñi ñuhu tsi yo**

(Lc. 12:22-31)

25 'Yacan cuenda catyí yu tsihin ndo, tyin ña caca xaan iñi ndo nácaa ñiñi ndo tsa catsi ndo tan tsa coho ndo. Ndi ña caca iñi ndo nácaa cua ñiñi ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. Tyin maa ra tsahá ra ñayivi iyó yo. Tan ña yii cuhva ra inga tsa tsiñi ñuhu tsi yo. 26 Nyehhe ndo cuhva iyó saa. Ña tatsí ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuví nyooho tan ñavin ca saa can naha ti. 27 Tan vasu ndi maa tsicá xaan iñi ndo maa tyin ña cua cuvi jandusucun ca ndo ndi luxu ca tsi ndo.

28 'Tan tatun ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehhe ndo nácaa iyó yutun ita tsitsi cuhu, tyin ña jahá tyiñu tun tan ndi ña tavi tun yuhva. 29 Maa tyin catyí yu tsihin ndo tyin ndi ra cuví rey Salomón tsihin tandíhi tsa cuca ra, tan ña tsinditsi ra jahma sii ca caá tan ñavin ca tsa jacunditsí Nyoo tsi yutun ita can. 30 Tatun tacan ñi jacunditsí Nyoo tsi yutun ita tsa iyó tsitsi cuhu vityin, tan tyaan cua cuví tun nducu tan cayu tun. ¿A ña cua jatinyee

cua ca ra tsi ndo? Tyin nyooho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra. 31 Yacan cuenda ña cua caca xaan iñi yo tan catyí yo: “¿Náa cua catsi yo, o náa cua coho yo, o nácaa cua ñiñi yo jahma cunditsi yo?” 32 Tyin nyivi tsa ña tsitó tsi Nyoo tsicá xaan iñi ñi yacan. Maa tyin nyooho ña caca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndíhi tsa tsiñi ñuhu tsi ndo. 33 Yacan cuenda, caca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñiñi ndo tandíhi tsa tsiñi ñuhu tsi ndo. 34 Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñi ñuhu tsi ndo ityaan. Caca iñi ndo tan nyehhe ndo nácaa yahá ndo quivi vityin jahá Nyoo.

**Ña cahan yo tsa caá inga nyivi**

(Lc. 6:37-38, 41-42)

7 <sup>1</sup> Ña cahan ndo tsa caá inga nyivi, tacan tan Nyoo ña cua cahan ra tsa caá ndo. <sup>2</sup> Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juvin ñi tacan cua javaha Nyoo tsihin ndo. <sup>3</sup> ¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un? <sup>4</sup> Tatun tinuu maa un nyii iin yutun cahnu, ¿nácaa cuví catyi un tsihin ra yañi un: “Ñaha, na tava yu tsahan luhlu tsa nyii tinuu un”? <sup>5</sup> ¿Yooho tsa jahá tyin vaha xaan un! Tava jihna yutun cahnu tsa nyii tinuu un. Tyin tacan tan cuvi nyehhe vaha un tsahan luhlu tsa cua tava un tinuu yañi un.

<sup>6</sup> 'Ña jañihi ndo cahan ndo tuhun Nyoo tsihin nyivi ña cuñi coto tyin coto cañi ñi tsi ndo. Tyin cuví ñi

tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

**Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo**

*(Lc. 11:9-13; 6:31)*

7 'Ndacan ndo tsa tsiñi ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña. 8 Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

9 'Tacan tucu nyooho tsihin sehe ndo. Tshahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi? 10 O tatun tsicán tsi tyaca, ¿a cua cuhva ndo iin coo itsi? 11 Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

12 'Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsahá Nyoo tsi ra Moisés tan tacan tucu nyaá nu tandihi libru tsa tyaq ra cuvi ndusu yuhu Nyoo tahañ tsanaha.

**Yuvehe tihin tan ityi cuiñi tsa cuahán nu nyaá Nyoo**

*(Lc. 13:24)*

13 'Nducu ndo cuhva quiñvi ndo yuvehe tihin. Tyin quiñhin yuvehe, tan quiñhin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can. 14 Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihí ityi can.

**Tsihin tsa javahá nyivi, tan nacotó yo tatun nyivi vaha, a nyivi ña vaha cuvi ñi**

*(Lc. 6:43-44)*

15 'Jaha ndo cuenda tsi ndo tsihin ra vatya naha ra. Tyin catyí ra naha tyin ndusu yuhu Nyoo cuvi ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuvi ra naha. Maa tyin tumaa quiñi xaan cuvi ra naha. 16 Nyooho cuvi nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuvi ra naha. Tyin iin tinyata ña cua cuhva tun mangu, tan ndi iñu nduhva ña cuvi cuhva tsi yucu vixi. 17 Tan tacan tucu tandihi yutun vaha. Tshahá tun tsiti vaha. Tan tandihi yutun ña vaha, tsahá tun tsiti ña vaha. 18 Tyin yutun vaha, ña cuvi cuhva tun tsiti ña vaha. Tan ndi yutun ña vaha ña cuvi cuhva tun tsiti vaha. 19 Tan tandihi yutun tsa ña tsahá tsiti vaha, cahnya yo tsi tun. Tan cayu tun. 20 Tan tacan tsihin tsa javahá nyivi, cuvi nacoto ndo tsi ñi tatun nyivi vaha o nyivi ña vaha cuvi ñi.

**Nu catyí ra Jesús tyin ña tandihi nyivi tan cua quiñvi ñi nu ndacá ñaha Nyoo**

*(Lc. 13:25-27)*

21 'Ña tandihi nyivi tsa catyí tsihin yu: "Jutu Mañi yu, Jutu Mañi yu", cua quiñvi ñi nu ndacá ñaha Nyoo nda gloria. Maa tyin nyivi tsa javahá tsa catyí maa Nyoo Jutu yu, juvin ñi can cua quiñvi nu ndacá ñaha ra. 22 Quiñvi tatsi tuñi Nyoo tsi nyivi, cuaha xaan ñi cua catyí ñi tsihin yu tyehen: "Jutu Mañi yu, nyuhu cahan ndi tuhun cun tsihin nyivi. Tan tsihin sivi un tavañ ndi tatyí ña vaha tsa yihí tsi ñi. Tan cuaha xaan tsa iyo javahá ndi tsihin sivi un", cua catyí ñi tsihin yu. 23 Tacan tan yuhu cua catyí yu tsihin ñi: "Ña nacotó yu tsi nyooho. Çatsiyo nyaha ndo nu nyaá yu tandihi

nyooho tsa javahá maa maa ñi tsa ña vaha”, cua catyi yu tsihin ñi.

**Nu caahán ra Jesús nácaa cua cacu nyivi tsa tyaá yahvi tuhun caahán ra, tan nyivi tsa ña tyaá yahvi tsa caahán ra, ña cua cacu ñi**

(Lc. 6:47-49; Mr. 1:22)

24 Tacan catyí yu tsihin ndo, tyin nyivi tsa tsiñí tsa caahán yu tan javahá ñi cuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava.

25 Tan quitsahá cuún ñihi savi. Tan cuaha xaan ndutya ñuhu yahá tsata vehe can. Tan ñihi xaan quitsahá yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava. 26 Maa tyin nyivi tsa tsiñí tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahá vehe nu nyiti. 27 Tan quitsahá cuún ñihi savi. Tan cuaha xaan ndutya ñuhu yahá nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduvá tsi tan cunaá tsi —catyí ra Jesús tsihin ñi tsa nyicún tsi ra.

28 Cuhva tsa ndihí cahán ra Jesús tsihin ñi, iyo xaan cuñi ñi tsihin tsa caahán ra, 29 tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

**Nu janduvahá ra Jesús tsi iin ra ndohó cuehe tyaahyú**

(Mr. 1:40-45; Lc. 5:12-16)

8 Cuhva tsa nuu ra Jesús yucu can, cuaha xaan nyivi nyicún tsi ra. 2 Tan tsaá iin ra ndohó cuehe tyaahyú, tan tsi cuiñi tsi ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

3 Tacan tan tyiso ndaha ra Jesús jiñi ra cuuhví can, tan catyí ra tsihin ra: —Cuñi yu janduvaha yu tsi un.

Cua nduvaha un vityin —catyí ra.

Tan iin yaha ñi nduvahá ra.

4 Tacan tan catyí ra Jesús tsihin ra:

—Jihna, coto ñahñi catyi tuhun un tsihin nyivi. Maa tyin cūaahan nu nyaá ra cuví jutu, tan janaha un tsi un tsi ra. Tan cūhva un tsa taahán tsi jamañi un nuu Nyoo tumaa catyí ley Nyoo tsa tyaá ra Moisés. Tan cua cuví tsi iin tsa ndaa tsi ra jutu can tan tsi nyivi tyin tsa nduvahá un.

**Nu janduvahá ra Jesús tsi musu iin ra cuví capitán**

(Lc. 7:1-10)

5 Quivi tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyí ra Jesús tan caahán ndaahvi ra tsihin ra, 6 tan catyí ra:

—Jutu Mañi yu, musu yu ñihi xaan cuuhví ra, canyí ra nu cama. Ña cuví nduvita ra tyin nduxií ra, tan yaha xaan cuhva cuñi ra.

7 Tan catyí ra Jesús tsihin ra:

—Cuhun maa yu tan kujanduvaha yu tsi ra —catyí ra tsihin ra.

8 Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahán ñi un tan musu yu cua nduvaha ra. 9 Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

10 Tan tsa tsiñi ra Jesús tsa cahán ra can, tan iyo xaan cuñi ra. Tan catyí ra tsihin nyivi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya. 11 Tan catyí yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyisó

ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo. **12** Tan nyivi tsa taahán tsi cahun gloriá, ña cua cahun ñi, tyin cua cahun ñi nu naa. Tan cua vacu tsa ñi tan catsan ña cua cuvi nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyivi nyicún tsi ra.

**13** Tacan tan catyí ra tsihin ra capitán can:

—Cuaahan, tan na nduvaha musu un tsa cuenda tyin tsinú ñi un tsi yu —catyí ra Jesús tsihin ra capitán.

Tan juvin ñi cuhva can nduvahá musu ra.

**Nu janduvahá ra Jesús tsi tyiso ra Pedro**

(Mr. 1:29-31; Lc. 4:38-39)

**14** Tsa yahá can, tan cuahán ra Jesús yuvehe ra Pedro. Tan nyehe ra tsi ña tyiso ra, canyí ña nu tsito tyin yihí cahñi tsi ña. **15** Tan tñin ra ndaha ña, tan iin yaha ñi quitá cahñi tsi ña. Tan nduvitá ña, tan quitsahá nanducú ña tsa catsi ra naha.

**Nu cuaha xaan nyivi cuuhví janduvahá ra Jesús**

(Mr. 1:32-34; Lc. 4:40-41)

**16** Tan tsa cunaaha, cuaha xaan nyivi yihí tatyí ña vaha tsindacá nyivi tsi ra Jesús. Tan tsihin intuhun ñi tuhun cahán ra Jesús tan quitá tatyí ña vaha tsi ñi. Tan tandihí ñi cuuhví iin yaha ñi nduvahá ñi. **17** Tacan cuvi tyin tacan tan cundaá tsa cahán Jutu Mañi yo tsihin yuhu ra Isaías, ra cuvi ndusu yuhu ra tahán tsanaha. Tan catyí ra tyehen: “Maa ra quihín ra cuehe tsa yihí tsi yo, tan quihín nyaa ra tsa uhvi tsi yo.”

**Nyivi tsa cuñi quihvi cuenda ra Jesús**

(Lc. 9:57-62)

**18** Tan tsa nyehe ra Jesús tyin cuaha xaan nyivi tsinú nduvi nu nyii

ra, catyí ra tsihin ra tsicá tsihin ra tyin cua yaha ra naha inga tsiyo miñi. **19** Tacan tan tsaá iin ra maestro cuenda ley vehe ñuhu tan catyí ra tsihin ra:

—Maestro, cuñi yu cunyicun yu tsi un tandihí ñi ityi nu cuahán un

—catyí ra.

**20** Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayi tsa queenda gloria, nduve nu maa cunyanaa luxu jiñi yu iyó —catyí ra.

**21** Inga ra tsa tsicá tsihin ra nacahan ra tsihin ra:

—Taa, cuhva na cahun jihna yu cucutsi yu tsi jutu yu, —catyí ra.

**22** Tan catyí ra Jesús tsihin ra:

—Ñaha yooho quitsi nyicun un tsi yu. Tan nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi —catyí ra.

**Nu jacutaxín ra Jesús tatyí xaan nu miñi**

(Mr. 4:35-41; Lc. 8:22-25)

**23** Tacan tan quihvi ra tsitsi yutun ndoo tan ra tsicá tsihin ra cuahán ra naha tsihin ra. **24** Tan ñihi xaan quitsahá yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesús quixí ra. **25** Tan ra tsicá tsihin ra jandoto ra naha tsi ra, tan catyí ra naha:

—¡Jutu Mañi yu, jacacu tsi yo, tyin cuñi cunaa yo!

**26** Tan catyí ra Jesús tsihin ra naha:

—¿Nacuenda yuuhvi xaan ndo? ¡Nyooho tsa luxu xaan tsinú ñi tsi yu! —catyí ra Jesús.

Tacan tan nduvitá ra tan cahán ra tsihin tatyí tan tsihin ndutya, tan cutaxín tsi. **27** Tan iyo xaan cuñi ra naha tan catyí ra naha:

—¿Yóo ra cuvi ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

**Nu nduvahā uvi ra űuu Gadara ra yihī tatyī űa vaha naha ra**

(Mr. 5:1-20; Lc. 8:26-39)

28 Tacan tan tsaā ra naha inga tsiyo miñi nda nu űuhu Gadara. Tan tsaā uvi taahan ra yihī tatyī űa vaha. Tan quitā ra naha nu ñaña cumí sandu. Xaan xaan ra naha, tan yoñi maa cuví yaha ityi can. 29 Tan caná tsaā ra naha, tan catyí ra naha:

—¿Náa cuñi un tsihin ndi, yooho Jesús Sehe Nyoo? ¿A vatsi un vatsi janyehe un tundoho tsi ndi tsa ndi cumañi ca tsaā quivi? —catyí ra naha jahā tatyī űa vaha can.

30 Tan yatyin ñi can yucú cuaha quini tsatsi ti naha ti. 31 Tan catyí nu tatyī űa vaha can tsihin ra Jesús:

—Tatun cua tava un tsi ndi, cūhva tsa quihvi ndi tsitsi quini can naha ti —catyí nu tatyī űa vaha can nahnu.

32 —Vaha. Quihvi ndo —catyí ra Jesús.

Tan quitā nu tatyī űa vaha can nahnu, tan quihvi nahnu tsitsi tandihi quini tsa nyecú can. Tan tandihi quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

33 Tan ra jahā cuenda tsi quini can, tsinú xaan ra naha cuahán ra naha tsitsi űuu, tan nacatyí tuhun ra naha tandihi tsa cuví tsi ra tsa yihī tatyī űa vaha can naha ra. 34 Tacan tan tandihi nyivi űuu can, tsahan ñi tsinyehē ñi tsi ra Jesús, tan cahān ndaahvi ñi tsihin ra na quita ra űuu can.

**Nu janduvahā ra Jesús tsi iin ra xii**

(Mr. 2:1-12; Lc. 5:17-26)

9<sup>1</sup> Tacan tan quihvi ra Jesús tsitsi iin yutun ndoo tan yahā ra miñi, tan tsaā ra nda űuu nu iyó ra. 2 Nu nyii ra ican, tsindacā nyivi tsi iin ra cuuhví tsa ña cuví nacanda tyin nduxij ra, tan canyíi ra nu tsito. Tan tsa nyehē ra Jesús tyin tsinú xaan iñi ñi tsi ra, quitsaha caahán ra tsihin ra

cuuhví can:

—Jāndu iin iñi un, sehe yu, tyin tsa tsiocō tucahnu iñi cuatyí un —catyí ra Jesús tsihin ra.

3 Tacan tan quitsahā tsicá iñi juhva ra maestro cuenda ley vehe űuhu tsa yucú ican naha ra: “Ra ihya tsiocō cuatyí ra nu Nyoo tsihin tuhun caahán ra”, cuñi ra naha tsicá iñi ra naha.

4 Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha? 5 Tyin ¿ndáa tsa yii ca catyí yo: a yii ca catyí yo: “Cuatyí un tsa yaha ndatsi”, o yii ca catyí yo: “Nduvita tan çaca un”? 6 Vityin cua janaha yu tsi ndo tyin yuhu Rayii tsa queē nda gloria, iyó ndatu tsi yu nu űuhu ñayivi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhví can:

—Nduvita, naquihin tsito un tan cūanuhu nda yuvehe un —catyí ra.

7 Tacan tan nduvitā ra tan cūanuhū ra nda yuvehe ra. 8 Tan nyivi tsa nyehē tsa cuví, nayuhvi xaan ñi. Tan quitsahā jacahnú ñi tsi Nyoo tyin tsahā ra tunyee iñi tsi nyivi.

**Nu canā ra Jesús tsi ra Mateo**

(Mr. 2:13-17; Lc. 5:27-32)

9 Yaha can tan quitā ra Jesús ican. Tan nyehē ra tsi iin ra tsa nañi Mateo, nyaá ra naquihín ra xuhun tsa tyahví nyivi Israel tsi ra ndacá ñaha. Tan catyí ra tsihin ra:

—Çohon tsihin yu.

Tacan tan nduvitā ra Mateo tan cuahán ra tsihin ra Jesús.

10 Tacan tan cuví tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaā, tan tsihin inga ca ra iyó cuatyí

naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra. **11** Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

**12** Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi. **13** Cuaahan ndo tan cūtuhva ndo cuhva catyí nu tutu Nyoo, nu catyí tan tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cahñi ndo quití tan cuhva cuenda ndo tsi yu.” Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

**Nu tsicá tuhun nyivi tsi ra Jesús tatun taahán tsi tsa coo nyitya ñi**

(Mr. 2:18-20; Lc. 5:33-35)

**14** Tacan tan ra nyicún tsi ra Juan, ra jacoondutya tsi nyivi, natuhva ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yoocho ña tuhvá ra naha coo nyitya?

**15** Tan nacahán ra Jesús tan catyí ra:

—¿A cuví cunyecu cuihya nyivi yucú vico tindaha tun nyí ra cua tindaha tsihin ñi? Maa tyin coo quivi cua quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

**Nu caahán ra Jesús tyin ña nacatsí tahan tuhun tsahnu tsa iyó nyivi tsihin tuhun tsaa tsa jacuahá ra tsi ñi**

(Mr. 2:21-22; Lc. 5:36-39)

**16** Ña tuhvá nyivi naquicú iin jahma tuuhu tsihin iin jahma tsaa, tyin cua nandiyi nu naquicú ñi tsihin tsa tsaa can, tan cua tyahnya tsi inga tsaha. **17** Tan tacan tucu, ña cuví tyihí nyivi vinu tsaa tsitsi ñiñi tsaahnu tyin tatun tacan javaha ñi, cua tyahnya ñiñi can, tan cua tiví vinu can tan cua tiví ndihí tucu ñiñi can. Yacan cuenda taahán tsi tyihí yo vinu tsaa tsitsi ñiñi tsaa. Tyin tacan tan ña tyahnya ñiñi can tan ndi vinu can ña tiví tsi.

**Nu nduvahá ñaha sehe ra Jairo tan ñaha tsa tñin jahma ra Jesús**

(Mr. 5:21-43; Lc. 8:40-56)

**18** Tsitsi tsa caahán ra Jesús tuhun ihya, tsaá iin ra cumí tyiñu cuenda vehe ñuhu nyivi Judea tan tsicuiñi tsiti ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yoocho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

**19** Nduvita ra Jesús tsihin ra tsicá tsihin ra tan cuahán ra naha tsihin ra.

**20** Tacan tan iin ñaha cuuhví natuhva ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún ñiñi ña. Tan tyanaa ña ndaha ña jahma ra, **21** tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

**22** Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Janduní iñi un, xihi, tsa nduvahá un tyin tsinú iñi un —catyí ra.

Tan juvin ñi cuhva can tan tsicuiñi tsa cuún ñiñi ña.

**23** Yahá can tan tsaá ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi



ra naha tsi ndiyi can. Tan nyivi tsa yucú can iyo xaan tsacú ñi. **24** Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixí ña —catyí ra.

Tan tsa cahān ra tacan quitsahā tsacú naaha ñi. **25** Tan ra Jesús tavā ra tsi ñi ityi tsata vehe. Tacan tan quihvi ra tsitsi vehe nu canyí ñaha can, tan tiñ ra ndaha ñaha luhlu can, tan nduvitā ña. **26** Tan tandihi nyivi iyó ityi ñuu can tsito ñi tsa nandoto ñaha luhlu can.

**Nu janduvahā ra Jesús tsi uvi taahan ra cuaa**

**27** Tsa quitā ra Jesús ican, tan uvi taahan ra cuaa nycún tsi ra, caná tsa ra naha tan catyí ra naha:

—¡Cundahvi iñi tsi ndi, yooho ra cuví tata ra David! —catyí ra naha.

**28** Tan tsa yahā quihvi ra Jesús tsitsi vehe, ra cuaa can, natuhvā ra naha nu nyaá ra, tan maa ra Jesús quitsahā tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahān ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

**29** Tacan tan tyanaā ra Jesús ndaha ra tinuu ra naha tan catyí ra tsihin ra naha:

—Na cuví maa tumaa cuhva tsinú iñi ndo —catyí ra.

**30** Tan nduvahā tinuu ra naha. Tan catyí ra Jesús tsihin ra naha:

—Coto ñahñi catyi tuhun ndo tsihin ndi intuhun nyivi.

**31** Maa tyin cuahán ra naha tan quitsahā catyí tuhun ra naha tsa javahā ra Jesús tsihin ra naha tsihin tandihi nyivi iyó ityi ñuu can.

**Nu janduvahā ra Jesús tsi iin ra ñiñhí**

**32** Tsa cuahán ra naha, juhva nyivi tsindacā ñi tsi iin ra ñiñhí tsa yihí

tatyí ña vaha nu nyí ra Jesús. **33** Tan tsa tavā ra Jesús tatyí ña vaha can, tacan tan nacahān ra can. Tan iyo xaan cuñi nyivi, tan catyí ñi:

—Ñaha ca maa nyehe yo ñuu Israel ihya ndi intuhun ra tavá tatyí ña vaha tsi nyivi —catyí ñi.

**34** Maa tyin ra cuví fariseo naha ra, catyí ra naha:

—Ra ihya tavá ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyí ra naha.

**Nu caahán ra Jesús tyin ña cuaha maa nyivi jahá tyiñu cuenda Nyoo iyó**

**35** Ra Jesús tsahān ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyivi. Tan janduvahá ra tandihi nuu cuehe tsa ndohó ñi. **36** Tan tsa nyehé ra tsi nyivi, cundaahvi xaan iñi ra nyehe ra tsi ñi, tyin nyehé ñi tundoho tan iyó ñi tucuihya iñi, tumaa mbee ticatyí tsa nduve tsitoho iyó.

**37** Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha. **38** Yacan cuenda, ndācan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

**Nu nacatsi ra Jesús tsa utsi uvi ra cuaca tyiñu ra**

(Mr. 3:13-19; Lc. 6:12-16)

**10** **1** Tacan tan canā ra Jesús tsi tsa utsi uvi ra tsicá tsihin ra tan tsahā ra ndatu tsi ra naha na tava ra naha tatyí ña vaha tsa yihí ña ñima nyivi, tan na janduvaha ra naha tsi nyivi cuuhvi náa ndiñi ca nu cuehe tan tsa uhvi.

**2** Ihya nyaá sivi tsa utsi uvi ra tsicá tyiñu ra: jihna ca, ra Simón, tsa ñañi tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha; **3** tan ra Felipe; ra Bartolomé; ra Tomás; tan

ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo; <sup>4</sup> tan ra Simón ra nyíi cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

**Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo**

(Mr. 6:7-13; Lc. 9:1-6)

<sup>5</sup> Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cūhun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria. <sup>6</sup> Cuaahan ndo nu yucú mbee tsa tsinaa tsa cuví nyivi Israel. <sup>7</sup> Cuaahan ndo cua cahan ndo tyin tsa tsaa quivi tsa cua cundaca ñaha Nyoo tsi nyivi. <sup>8</sup> Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyooho naquihín ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

<sup>9</sup> Ña cūiso ndo xuhun; ndi xuhun cuaan, ndi xuhun cuitsin, ndi xuhun cuaaha. <sup>10</sup> Tan ña cūiso ndo ndi yunu tsa cuenda tsa caca ityi ndo. Intuhun ñi camisa tsa nditsín ndo cuhun tsihin ndo. Tan ña cūiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

<sup>11</sup> Tatun tsaa ndo iin ñuu cahnu o iin ñuu luhlu, nducu ndo iin nyivi vaha iñi, tan ndoo ndo yuvehe ñi nda cuanda quita ndo ñuu can. <sup>12</sup> Tatun cua quihvi ndo iin vehe, cūhva ndo nacumi tsi nyivi iyó yuvehe can. Tan catyí ndo tsihin ñi: “Na coo tsa vaha Nyoo añima ndo”. <sup>13</sup> Tan tatun nyivi iyó yuvehe can tan nacotó ñi tyin

tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihin nyico ndo can. <sup>14</sup> Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi siqui ñi. <sup>15</sup> Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

**Nu catyí tuhun tsi náa ndihi tundoho cua nyehe nyivi tsicá tyiñu Nyoo**

<sup>16</sup> ¡Nyehe ndo! Tumaa mbee ticatyí cuví ndo, tan jacuhún yu tsi ndo nu yucú quití xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti. <sup>17</sup> Jaha ndo cuenda tsi ndo tsihin nyivi tyin cua cuhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. <sup>18</sup> Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví. <sup>19</sup> Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsaa cuhva tsa cua cahan ndo, Nyoo cua cuhva ra tuhun cahan ndo. <sup>20</sup> Tyin ñavin maa ndo cua cahan, tyin maa Tatyí Ii Jutu yo Nyoo tsa iyó añima ndo cua cuhva ra tsa cahan ndo.

<sup>21</sup> Yihí rayi cua xico ra naha juvin ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyivi na cahñi nyivi can tsi ñi. <sup>22</sup> Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun

ña jandihí ndo tsa tsinú íñi ndo tsi yu, tacan tan cua cacu ndo. **23** Tatun nyaa ndaha ñi tsi ndo iin ñuu, cūhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cūhun ndo tandihí ñuu nu iyó nyivi Israel tan cua quitsi nyico yuhu, Rayii tsa quee nda gloria.

**24** 'Tin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra. **25** Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyivi tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyivi cuenda yu.

**¿Yóo tsii taahán tsi nayuhvi yo, a tsii nyivi o tsii Nyoo?**

(Lc. 12:2-7)

**26** 'Yacan cuenda ña nayuhvi ndo tsi nyivi, tyin nduve tsa nyíi xeehe tsa ña cua quituvi. Tan nduve tsa xeehe tsa ña cua coto nyivi. **27** Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, ndaa ndo jiñi vehe cāna tsaa ndo can, na coto tandihí nyivi. **28** Ña nayuhvi ndo tsi nyivi tsahñi cuñu ñuhu yo, tyin ña cuví cahñi ñi añima yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan añima ndo tsitsi anyaya.

**29** 'Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cuhva maa Nyoo Jutu yo. **30** Tyin nda cuanda ixi jiñi ndo tan tsitó Nyoo najava taahan tsi iyó, tyin tsa nacahvi ra intuhun intuhun tsi. **31** Yacan cuenda ña nayuhvi ndo. Nyoooho, nyaá yahvi ca ndo nu Nyoo tan ñavin ca tsa cuaha saa.

**Ña cua nayuhvi yo cahan yo tuhun ra Jesucristo tsihin nyivi**

(Lc. 12:8-9)

**32** 'Tandihí nyivi tsa caahán catsi tsihin nyivi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi. **33** Maa tyin nyivi cua tyihi xeehe tsi yu nuu inga nyivi, tacan tucu yuhu cua tyihi xeehe yu tsi ñi nuu Jutu yu ra nyaá gloria.

**Nu caahán ra Jesús tyin tsa cuenda ra tan cua cañi tahan nyivi tsihin tahan ñi**

(Lc. 12:51-53; 14:26-27)

**34** 'Ña cuñi ndo tyin yuhu vatsí cuhva yu tsa coo taxin nyivi nu ñuhu ñayivi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan. **35** Tyin yihi ñi cua tsinu íñi ñi tsi yu, maa tyin inga ñi ña cua tsinu íñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña. **36** Tan yacan cuenda juvin ñi maa nyivi vehe ndo cua cuxaan íñi tsi ndo.

**37** 'Nyivi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyivi cuenda yu. Tan nyivi cuñi ca tsi sehe yí ñi a sehe sihi ñi, tan ñavin ca tsi yuhu, ña cuví cuví ñi nyivi cuenda yu. **38** Tan nyivi tsa ña cuñi nyehe tundoho tan ndi ña cuñi ñi cuhva ñi ñayivi iyó ñi tsa cuenda yu, ña taahán tsi cuví ñi nyivi cuenda yu. **39** Tyin nyivi cuñi xaan ca ñayivi iyó ñi, cua cunaa ñi. Maa tyin nyivi cua cuhva ñayivi iyó ñi tsa cuenda yu, cua ñihi ñi ñayivi nyito coo ñi.

**Nu caahán ra Jesús nácaa cua ñihi yo tsa vaha Nyoo**

(Mr. 9:41)

**40** 'Nyivi tsa naquihín cuenda tsi nyooho, tsi yuhu naquihín cuenda ñi,

tan ñi naquihín cuenda tsi yuhu, quihín cuenda ñi tsi ra tsa jaquitsi tsi yu. **41** Nyivi naquihín cuenda tsi iin ra cuví ndusu yuhu Nyoo tyin Nyoo jaquitsi tsi ra, cua ñihi ndihi ñi tsa vaha tsa cua ñihi ra cuví ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi. **42** Tan yóo nyivi tsa kuhva intuhun vasu ndutya vitsin coho nyivi tsa nyicún tsi yu, cua ñihi ndihi ñi tsa cua kuhva Nyoo tsi ñi tsa nyicún tsi yu —catyí ra Jesús.

**Nu jacuhun ra Juan tsi ra tsicá tsihin ra nu nyí ra Jesús**

(Lc. 7:18-35)

**11** <sup>1</sup> Tsa ndihi cahan ra Jesús tsihin tsa utsi uvi ra tsicá tsihin ra, tacan tan quitā ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

<sup>2</sup> Tan ra Juan nyí ra vehe caa quivi can, tan ñihí tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyí ra. <sup>3</sup> Tan catyí ra naha tsihin ra:

—¿A juvin yooho cuví ra Cristo tsa nyaá tsa cua quitsi jacacu tsi ndi? O tatun ñavin un cuví, cuatu ndi tsi inga ra —catyí ra naha tsihin ra Jesús.

<sup>4</sup> Nacahan ra Jesús tan catyí ra:

—Cuaahan ndo tan catyi tuhun ndo tsihin ra Juan tandihí tsa nyehé ndo, tan tsa tsiñí ndo. <sup>5</sup> Tan catyi ndo tsihin ra: nyivi caa nanyehé ñi, nyivi coxo nacacá ñi, nyivi ndohó cuehe tyaahyú nduvahá ñi, nyivi soho nacuñí ñi, tan nandotó nyivi tsa tsa tsihi, tan nyivi ndaahvi tsiñí ñi tuhun Nyoo nácaa cua cacu ñi.

<sup>6</sup> Tan catyi ndo tsihin ra tyin sii xaan cua cuví tsi nyivi tsa nyicún tsi

yu tun ña ndu uvi iñi ñi —catyí ra Jesús tsihin ra naha.

<sup>7</sup> Tsa cuahán ra naha, tan quitsaha caahán ra Jesús tuhun ra Juan tsihin nyivi, tan catyí ra:

—Quivi tsa tsahan ndo tsinyehé ndo nu tsiqui, ¿náa cua nyehe ndo cuñí maa ndo? ¿A nyehe ndo iin ndoo tsa janduvā tatyí? <sup>8</sup> ¿O náa cuví tsa tsinyehé ndo? ¿A iin ra nditsí jahma vaha cua nyehe ndo? Ñavin. Tyin tsitó ndo tyin ra nditsí jahma vaha, iyó ra vehe ra cuví rey. <sup>9</sup> ¿A ña tsahan ndo tsinyehé ndo tsi iin ra cuví ndusu yuhu Nyoo? Juvin. Tyin ra ican cahnu ca cuví ra tan ñavin ca tandihí ra cuví ndusu yuhu Nyoo. <sup>10</sup> Juvin ñi tuhun ra Juan cuví tsa nyaá nuu tutu Nyoo. Tan catyí tsi tyehen:

Yuhu cua jacuhun yu iin ra cahan tuhun yu tsa ndi cumañi ca cahun yu.

Tyin natyiso vaha ra ityi nu cua cahun un.

<sup>11</sup> Tsa nditsa catyí yu tsihin ndo, tyin tsitsi tsa tandihí nyivi tsa tsicoo tan nyivi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyivi. Maa tyin ra tsa ndaca ñaha Nyoo ñanima, vasu ra lihli ñi cuví ra, cahnu ca ra cuví ra tan ñavin ca ra Juan.

<sup>12</sup> Nda cuanda quivi tsa tsaá ra Juan tan nda vityin, nyivi ñihi iñi, nducú xaan ñi kuhva ñihi ñi tsa cundaca ñaha Nyoo tsi ñi. <sup>13</sup> Ra Moisés cahan ra tuhun nácaa cua cundaca ñaha Nyoo tsi nyivi, tan tacan tucu tandihí ra cuví ndusu yuhu Nyoo. Tacan tan quitsi ra Juan jacoto ra tsi nyivi tyin tsa tsaá quivi tsa cua cundaca ñaha Nyoo. <sup>14</sup> Tan ra Juan cuví ra Elías ra tsa nyaá tsa cua quitsi, tun nyoocho tan cuñí ndo tsinu iñi ndo tsa caahán yu.

<sup>15</sup> Nyoocho tsa iyó soho, tyaa soho ndo tsa caahán yu.

16 '¿Náa tsihin jandu inducu yu tsi nyooho, nyivi tsa iyó quivi ihya?

Tumaa ra nyihi cuví nyooho. Tyin ra nyihi jasiqui nuyahvi. Caná tsa tahan ra naha tan catyí ra naha:

17 “Tiví ndi tiyoo tan ña tsañi ndo yaa. Tan tsita ndi yaa cuiihya, tan ña tsacu ndo”, catyí ra nyihi. Tan tacan cuví nyooho tyin ndi intuhun cuhva ña taahán iñi ndo. 18 Tyin ra Juan, ra jacoondutyá, quitsi ra tan ña tsatsi vaha ra, tan ña tsihi ra vinu. Tan nyooho catyí ndo tyin tatyí ña vaha yihí tsi ra. 19 Yahá can tan tsaá tucu yuhu Rayi tsa quee nda gloria. Tan tsatsí yu tan tsihí yu. Tan catyí ndo tyin tsatsí xaan yu tan tsihí xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyivi naquihín tuhun caahán yu tan tuhun cahán ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyí ra Jesús.

**Nyivi ña cuñi naquihin cuenda tuhun caahán ra Jesús cua nyehe ñi tundoho**  
(Lc. 10:13-15)

20 Tacan tan quitsahá caahán ra Jesús tsihin nyivi tandihi ñuu nu javahá ra cuaha tsa iyo, tyin ña nasamá ñi cuhva iyó ñi, tan catyí ra:

21 —iNdahvi nyooho, nyivi ñuu Corazin! iNdahvi nyooho nyivi ñuu Betsaida! Tyin nyehé ndo tsa iyo tsa javahá yu tan ña nasamá ndo cuhva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuiihya iñi tan cua coso ñi nyaa nuu ñi: tyin ndu uvi iñi ñi cuatyí ñi. 22 Maa tyin catyí yu tsihin ndo tyin ñihi ca cua tatsi tuñi Nyoo

tsi ndo tan ñavin ca ñi ñuu Tiro tan ñi ñuu Sidón. 23 Tan nyooho nyivi ñuu Capernaum, cuñi maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihi anyaya. Tun tsatyin tsicoo tsa iyo nyehe ñi ñuu Sodoma tumaa tsa nyehé ndo ihya, ñuu can ña tsinaa tsi tan iyó tsi nda cuanda vityin. 24 Maa tyin catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi nyooho tan ñavin ca nyivi ñuu Sodoma.

**“Cuhva ndo tsi ndo tsi yu, tan cuhva yu tsa quitatu ndo”, catyí ra Jesucristo**  
(Lc. 10:21-22)

25 Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayivi. Tyin tyihí xeehe un tuhun ihya nuu ra tsitó xaan tan ra nyityi xaan naha ra. Tan jandunditsi un tuhun ihya nuu ra nyihi. 26 Tacan Tyaa, tyin tacan cuñi maa un —catyí ra Jesús.

27 Tacan tan catyí tucu ra tsihin nyivi:

—Jutu yu nacuhvá cuenda ra tandihi tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñi yu tsa nacoto tsi Jutu yu, cua janaha yu tsi ra tsi ñi. 28 Tandihi nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa quitatu ndo. 29 Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo. 30 Ña yá tsa cuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

**Quiví quitatú nyívi cuví tsi tan ra tsicá tsihin ra Jesús tuhún ra naha yoco itya trigu**

(Mr. 2:23-28; Lc. 6:1-5)

**12** <sup>1</sup> Iin quívi quitatú nyívi, yaha ra Jesús mahñu nu iyó tsa tatsí nyívi. Tan tsaꝯ soco tsi ra tsicá tsihin ra. Tan quítsahꝯ tuhún ra naha yoco trigu can tan tsatsí ra naha.

<sup>2</sup> Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quívi quitatú yo —catyí ra naha tsihin ra.

<sup>3</sup> Tan ra Jesús catyí ra tsihin ra naha:

—¿A ñaha ca cahvi ndo tsa javaha ra David tsihin ra cutahan tsihin ra quívi tsa tsaꝯ soco tsi ra naha?

<sup>4</sup> Quihví ra tsitsi vehe Nyoo, quihñ ra paan ii, tan tsatsí ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can. <sup>5</sup> ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quívi quitatú yo? Tan ñavin cuatyí cuví can.

<sup>6</sup> Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu. <sup>7</sup> Nyooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñí ca yu javaha ndo cuví tsa cundaahvi iñi ndo nyehe ndo tsi nyívi tahan ndo, tan ñavin ca tsa cahñi ndo quiti tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyívi tsa nduve cuatyí. <sup>8</sup> Yuhu, Rayii tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quívi quitatú yo —catyí ra Jesús.

**Nu janduvaha ra Jesús tsi iin ra na ityi ndaha**

(Mr. 3:1-6; Lc. 6:6-11)

<sup>9</sup> Tacan tan quitꝯ ra Jesús ican, tan cuahán ra vehe ñuhu. <sup>10</sup> Tan ican nyíi iin ra tsa na ityi ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicꝯ tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyívi cuuhví quívi quitatú yo?

—catyí ra naha tsihin ra Jesús.

<sup>11</sup> Tan nacahan ra Jesús tan catyí ra:

—¿Ndáa nyooho, tatun canacava iin mbee jana ndo tsitsi iin yavi quívi quitatú yo, a ña cua cuhun ndo tan tava ndo tsi tí? <sup>12</sup> Tan ¿a ña nyaá yahvi ca iin nyívi tan ñavin ca mbee? Yacan cuenda taahán tsi javaha yo tsa vaha quívi quitatú yo —catyí ra.

<sup>13</sup> Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvaha tsi tumaa inga tsiyo. <sup>14</sup> Tacan tan quitꝯ ra fariseo naha ra cua natuhun tahan ra naha nácaa cua cahñi ra naha tsi ra Jesús.

**Tsa cahan ra Isaías, ra cuví ndusu yuhu Nyoo, tsa cuenda ra Jesús tahan tsanaha**

<sup>15</sup> Tsa tsitꝯ ra Jesús tyin nducú ra naha tsi ra, quitꝯ ra ican. Tan cuaha nyívi tsinyicun tsi ra. Tan maa ra janduvaha ra tsi tandihí ñi cuuhví.

<sup>16</sup> Tan catyí ra tsihin ñi tyin na ña catyí tuhun ñi yóo ra cuví ra.

<sup>17</sup> Tacan cuví tyin tacan cahan ra Isaías, ra cuví ndusu yuhu Nyoo tahan tsanaha. Tan tyehen tyaa ra tuhun Nyoo:

<sup>18</sup> Ra ihya cuví musu yu, ra tsa nacatsí vaha yu.

Cuñí xaan yu tsi ra, tan sii xaan cuñí yu tsihin ra.

Cua cuhva yu Tatyí li yu tsi ra.

Tan cua jacoto ra tsi nyivi tsa ñavin nyivi Israel cuví, nácaa cua janduvaha yu tsi ñi nuu yu.

19 Tan ña cua cahan yuhu ra tan ndi ña cua cana tsa ra, tan ña cua cahan ñihi ra ityi cahnu.

20 Tan ndi intuhun ndoo yacua, tan ña cua cahnu ndihi ra. Tan ndi ña cua ndahva ndihi ra tiñuhu lihli nu caná luxu yuhma.

Nda cuanda coto tandihi nyivi tyin maa ra cuví ra ndacá ñaha tsi ñi.

21 Tan tandihi nyivi, tan cua cuita iñi ñi tsi ra.

**Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo**

(Mr. 3:20-30; Lc. 11:14-23; 12:10)

22 Tacan tan tsindacá nyivi tsi iin ra yihí tatyí ña vaha nu nyíi ra Jesús, cuaa ra tan ñihi ra. Tan ra Jesús janduvahá ra tsi ra. Tacan tan nacahan ra, tan nanyehé ra. 23 Iyo xaan cuñí tandihi nyivi, tan catyí ñi:

—¿A ñavin ra ihya cuví tata ra rey David? —catyí ñi.

24 Tan cuhva tsa tsiñi ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá ra ihya tatyí ña vaha —catyí ra naha.

25 Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihi tyiñu tsa ndacá ñaha ra naha. Tan tatun iin ñuu o tandihi nyivi iin vehe tan cusiin ñi, tacan tan cua tiví nu yucú ñi. 26 Tan tacan tucu tatun nu ña vaha tan tava nu juven ñi tahan maa nu, cuñí tsi catyí tyin ña iin ñi

cuví nahnu, tan cundihi tunyee iñi tsa iyó tsi nahnu. 27 Tan nyooho catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa cuhva catyí ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo.

28 Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñí tsi catyí yacan tyin nditsa tyin tsa tsa cuhva ndacá ñaha Nyoo nu yucú ndo.

29 "Tan ¿yóo cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuhñi jihna ra tsi ra can, tacan tan cuví quihin nyaa ra tandihi tsa iyó tsi ra.

30 "Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatyinyeé tsi yu tsa caahán yu tuhun Nyoo tsihin nyivi, cuñí tsi catyí tyin ña tsahá ñi tsa coto nyivi tuhun caahán yu.

31 "Yacan cuenda catyí yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí Ii Nyoo, yacan nditsa, ña cua jaha Nyoo tucahnu iñi tsi ñi. 32 Tan yóo nyivi tsa caahán tsa ndavaha ñi siqui yuhu Rayii tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí Ii Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

**Tsihin tsa javahá nyivi tan nacoto yo tsi ñi tatun vaha ñi a ña vaha ñi**

(Lc. 6:43-45)

33 "Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti

tun. **34** ¡Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo. **35** Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi. **36** Tan yuhu catyí yu tsihin ndo tyin quivi cua tatsi tuñi Nyoo tsi tandihi nyivi, cua cuhva cuenda ñi tandihi tuhun tsa ña vaha cahán ñi. **37** Tyin tsa cuenda tsa caahán ndo, tan cua catyí Nyoo tun vaha ndo o ña vaha ndo.

**Nyivi ña vaha, tsa iyo ñi cuñí ñi nyehe ñi**

(Mr. 8:12; Lc. 11:29-32)

**38** Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

**39** Tan nacahán ra Jesús tan catyí ra:

—Nyivi ña vaha tan nyivi tsa nycún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahá Nyoo tsihin ra Jonás ra cuví ndusu yuhu ra tahán tsanaha.

**40** Tyin tumaa tsinyii ra Jonás tsitsi tyaca cahnu uñi quivi tan uñi tsacuaa, tacan cua cunyii yuhu Rayii tsa quee nda gloria tsitsi ñuhu uñi quivi tan uñi tsacuaa. **41** Tan quivi cua tatsi tuñi Nyoo tsi tandihi nyivi, cua nduvita nyivi tsicoo ñuu Nínive tahán tsanaha tan cua catyí ñi na tatsi tuñi Nyoo tsi nyooho nyivi tsa iyó vityin. Tan cua catyí ñi tyin cua cunaa ndo, tyin maa ñi tsa cuví ñi ñuu Nínive, nasamá ñi cuhva iyó ñi quivi cahán ra Jonás tuhun Nyoo tsihin ñi. Tan ihya nyii ra cahnu ca cuví tan ñavin ca ra Jonás. Tan ña cuñí ndo tyaa soho ndo tsa caahán

yu, **42** Tan tacan tucu ñaha tsa tsindacá ñaha ityi Sur, cua nduvita ña quivi cua cutuñi nyivi tan cua catyí ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahán ra Salomón. Tan vityin cahnu ca ra caahán tsihin ndo tan ñavin ca ra Salomón.

**Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo**

(Lc. 11:24-26)

**43** Tatun iin nu tatyí ña vaha quita nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu:

**44** “Cunuhu yu nda vehe yu nu quee yu.” Tacan tan cuahán nyico nu añima nu quee nu. Tan nyehe nu tyin ndii xaan, tan yoñi iyó, tan sii xaan caá. **45** Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuví tsi nyivi quini iyó —catyí ra Jesús.

**Nu tsahá cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñí Nyoo**

(Mr. 3:31-35; Lc. 8:19-21)

**46** Ndi caahán ca ra Jesús tsihin nyivi, tan tsaá sihi ra tan yañi ra, tan nyecú ñi ityi tsata vehe, tan cuñí ñi cahán ñi tsihin ra. **47** Tacan tan jacoto iin ra tsi ra Jesús, tan catyí ra: —Sihí un tsihin ra yañi un naha ra nyecú ñi tsata vehe. Tan cuñí ñi cahán ñi tsihin un.

**48** Tan nacahán ra Jesús tan catyí ra tsihin ra can:

—¿Yóo cuví sihi yu tan yóo cuví



yañi yu? —catyí ra.

49 Tacan tan janahā ndaha ra nu nyecú ra tsicá tsihin ra, tan catyí ra:

—Ra ihya naha ra cuví sihi yu tan yañi yu. 50 Tyin tandihi nyivi tsa javahá cuhva cuñi Jutu yu, ra nyaá gloria, juvin ñi can cuví yañi yu, tan cuhva yu, tan sihi yu —catyí ra Jesús.

**Nu caahán ra Jesús tyin tumaa iin ra tatsí, tacan cuví ra caahán tuhun Nyoo**

(Mr. 4:1-9; Lc. 8:4-8)

**13** 1 Quivi can quitā ra Jesús vehe nu nyíi ra tan cuahán ra, tsicunyaā ra yuhu miñi. 2 Tan cuaha xaan nyivi ndu iijn nu nyaá ra, yacan cuenda quihvi ra tsitsi iin yutun ndoo tan tsinyaā ra. Tan tandihi nyivi ndoo ñi yuhu ndutya. 3 Tacan tan quitsahā jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quitā iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra. 4 Tan cuhva tsa quitā ra tsiti can, cucoyo juhva tsi yuhu ityi. Tan quitsi saa tan tsatsi ti tsiti can. 5 Tan juhva ca tsiti can cucoyo tyañu yuu nu ña cuaha nyahyu yihí. Tan ican canā tsiti can tsa numi ñi tyin ña cuaha nyahyu yihí tyañu yuu can. 6 Maa tyin cuhva tsa canā ñicanyii, numi ñi na ityi tsi, tyin ña cunu yihí yoho tsaha tsi. 7 Juhva ca tsiti can cucoyo tyañu iñu. Tan quivi canā trigu can tsahnū tsi iin caa ñi tsihin iñu can, tan iñu can numi xaan ca tsahnū tsi tan tsahnū tsi trigu can. 8 Maa tyin juhva ca tsiti can cucoyo nu ñuhu vaha. Tan quivi tsahnū tsi, vaha xaan tsahā tsi tsiti. Tyin tsa iin tsiti can, cientu tsiti quitā tsihin tsi. Tan inga tsiti can, uñi xico, tan inga tsi oco utsi tsiti tsahā tsi. 9 ¡Tatun nyaá soho ndo, tyā soho ndo tuhun caahán yu! —catyí ra Jesús.

**Nu catyí tuhun ra Jesús nacuenta jacuahá ra tsi nyivi tan ña catyí tuhun catsi ra tsihin ñi**

(Mr. 4:10-12; Lc. 8:9-10)

10 Tacan tan natuhva ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenta tyin tsihin cuhva ñi jacuahá un tsi nyivi, tan ña catyí tuhun catsi un tsihin ñi? —catyí ra naha.

11 Tan nacahan ra Jesús tan catyí ra:

—Tsi nyooho jacotó Nyoo tuhun xeehe, cuhva ndacá ñaha ra, maa tyin nyivi ihya ña cuví coto ñi tsa tsahā Nyoo tsi nyooho. 12 Tyin tandihi nyivi tsa cutuñi iñi tsa caahán yu tan javahá ñi, cuaha ca cua cutuñi iñi ñi. Tan nyivi tsa ña cutuñi iñi, tan ña cuñi ñi javaha ñi, cua quihin nya ndihi yu tsa luxu ñi tsa tsitó ñi.

13 Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñi ñi maa tyin ña cutuñi iñi ñi, tumaa tsa ña tsiñi ñi cuví can. 14 Tyin tacan tan cundaa tsa cahan ra Isaías ra cuví ndusu yuhu Nyoo tahanan tsanaha, tan catyí ra:

Tsa nditsa tyin nyooho tsiñi ndo tuhun yu, maa tyin ña cutuñi iñi ndo.

Cua nyehe ndo tsa javahá yu, tan ña cua cutuñi iñi ndo.

15 Tyin tsa ndundava xaan añima nyivi ihya, tan ña catsi vaha tsiñi ñi. tan ndasí tinuu ñi, na ña cua nyehe ñi tsihin tinuu ñi, tan ña cua cuñi ñi tsihin soho ñi.

Tan ndi ña cua cutuñi iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

16 'Maa tyin siñ xaan cuví tsi

nyooho, tyin nyehé ndo tsihin tinuu ndo, tan tsiñí ndo tsihin soho ndo.

17 Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyívi vaha, cuñí ñi nyehe ñi tsa nyehé nyooho tsa javahá yu, maa tyin ña nyehe ñi. Tan cuñí ñi tyaa soho ñi tandíhi tsa tsiñí nyooho vityin, maa tyin ña tsiñí ñi.

**Nu catyí tuhun ra Jesús tsa cuñí tsi catyí cuhva tsa cahān ra tsihin nyívi tsa cuenda ra tatsi can**

(Mr. 4:13-20; Lc. 8:11-15)

18 Tyaa soho ndo tsa cuñí tsi catyí cuhva tsa cahān yu tsa cuenda ra tsa tatsí tsiti trigu can: 19 Nyívi tsa tsiñí tuhun nácaa cuñí Nyoo cundaca ñaha ra añima ñi, tan ña cutuñí iñi ñi, cuví ñi tumaa nu cucoyo tsiti trigu yuhu ityi. Tan quitsj nu ña vaha tan quihjñ nya nu tuhun Nyoo tsa iyó añima ñi. 20 Tan tumaa nu cucoyo tsiti can tyañu yuu, juvin ñi nyívi tsa tsiñí tuhun Nyoo cuví can. Tan sñi xaan naquihjñ vaha ñi itsi juhva ñi quívi. 21 Tyin nduve ñuhu cunu ican, yacan cuenda can tsiti can, maa tyin ña cuví cuhun yoho tsi. Tan tacan cuví nyívi can. Juhva ñi quívi tsinú iñi ñi. Maa tyin quívi tsa quitsahá nyehe ñi tundoho, tan caahán ndasi nyívi tsata ñi tsa cuenda tuhun Nyoo, tacan tan jandíhí ñi tsa tsinú iñi ñi. 22 Tan tumaa nu cucoyo tsiti can tsitsi iñu, juvin ñi nyívi tsa tsiñí tuhun Nyoo cuví can. Tsiñí ñi, maa tyin ña cuñí ñi javaha ñi tumaa tsiñí ñi. Tyin tyaa xaan ca iñi ñi tundoho ñayívi tan ñavin ca tuhun Nyoo. Tan nyiyo ca iñi ñi tsa cuca. Tan tandíhi tuhun can jatyañú tsi tsi ñi, tan cuví ñi tumaa yutun tsa ña tsahá tsiti. 23 Tan ñuhu vaha nu cucoyo tsiti can, yacan cuví inga nyívi tsa tsiñí tuhun Nyoo, tan cutuñí iñi ñi, tan javahá ñi tandíhi tuhun caahán ra. Yíhí ñi cuví ñi tumaa tsiti tsa can tan tsahá tsi iin cientu tsiti, tan inga ñi cuví ñi tumaa

tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

**Nu caahán ra Jesús nácaa cuahán tuhun trigu tan cuhu ña vaha**

24 Tan cahān tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyívi cuví tsi tumaa iin ra tsa tatsj tsiti trigu nu ñuhu ra. 25 Tan cuhva tsa quixí tandíhi ra jahá tyiñu naha ra, quihví iin ra xaan iñi tsi ra jatsii can, tan quitj ra tsiti cuhu ña vaha, tan cuahán ra. 26 Tan quívi can tsiti trigu can, tan can yoco tsi, can ndíhi tucu cuhu ña vaha can.

27 Tacan tan ra cuví musu can naha ra, tsahān ra naha tsicatyí tuhun ra naha tsihin tsitoho ra naha: “Tata, maa ñi tsiti trigu tatsj ndi, ¿tan nacuenta tyin can cuhu ña vaha can?” catyí ra naha. 28 Tan nacahān ra can tan catyí ra: “Iyó iin ra xaan iñi tsi yu javahá tsehe, tun cuvi.” Tacan tan musu can, catyí ra naha tsihin tsitoho ra: “¿A cuñí un tyin cuhun ndi tan tuhun ndi cuhu ña vaha can?” 29 Tan tsitoho ra naha catyí ra: “Ña tuhun ndo, tyin coto tuhun ndíhi ndo trigu can. 30 Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihi vaha ra naha tsa vaha can tsitsi yaca yu.”

**Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo**

(Mr. 4:30-32; Lc. 13:18-19)

31 Tacan tan cahān ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyívi cuví tsi tumaa iin tsiti mostaza tsa tatsj iin ra nu ñuhu ra. 32 Tyin tsiti

can lihli ñi tsi tan ñavin ca tandihí ca tsiti. Maa tyin quiví tsahnú tsi cuví tsi iin yutun. Tan quítsi saa, tan javahá ti taca ti soco tun —catyí ra Jesús.

**Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo**

(Lc. 13:20-21)

**33** Tan cahán ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá tandihí yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

**Nu catyi tuhun ra Jesús nacuenda jacuahá ra tsi nyivi tsihin cuhva**

(Mr. 4:33-34)

**34** Tandihí tuhun can cahán ra Jesús tsihin nyivi tsihin cuhva. Tan tandihí tsa cahán ra tsihin ñi ña cahán catsi maa ra, maa ñi maa tsihin cuhva cahán ra. **35** Tacan cuví tyin tacan tan cundaa tsa cahán Jutu Mañi yo tsihin yuhu ra cuví ndusu yuhu ra tahán tsanaha tan tyaa ra tyehen:

Tsihin cuhva cua cahan yu tsihin nyivi.

Cua cahan yu tsihin ñi tuhun tsa yihí xeehe nda cuanda tsa javahá Nyoo ñuhu ñayivi.

**Nu caahán ra Jesús náa cuñí tsi catyí cuhu ña vaha tsa caná tsihin tsiti trigu can**

**36** Tacan tan jacunuhú ra Jesús tsi nyivi, tan quihví ra tsitsi vehe nu nyíi ra. Tan natuhvá ra tsicá tsihin ra nu nyaá ra, tan catyí ra naha tsihin ra:

—Catyí tuhun tsihin ndi náa cuñí tsi catyí tsa cahán un tsihin nyivi tsa cuenda cuhu ña vaha tan trigu can.

**37** Tacan tan quítsahá catyí ra Jesús tsihin ra naha:

—Ra tsa tatsí tsiti trigu can cuví

yuhu Rayii tsa quee nda gloria.

**38** Tan ñuhu can cuví nyivi iyó nu ñuhu ñayivi. Tan tsiti trigu can cuví nyivi tsa ndacá ñaha Nyoo. Tan cuhu ña vaha can cuví nyivi tsa nyicún tsi nu ña vaha. **39** Tan nu tsa tatsí cuhu ña vaha can, nu ican cuví nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñí tsi catyí quivi cua cundihí ñuhu ñayivi. Tan ra tsa cua naquihin tsiti can, cuví ra ángel naha ra.

**40** Tumaa jatacá ra naha cuhu ña vaha can tyin cayu tsi, tacan cua cuví quivi cua cundihí ñayivi. **41** Yuhu Rayii tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí. **42** Tan cua tyihi ra naha tsi ñi tsitsi ono nu cayú ñuhu. Tan ican cua vacu tsaá ñi tan cahyu ña cua cuví nuhu ñi. **43** Nyoocho tan nyivi javahá cuhva cuñí Nyoo cua quituvi ndo nuu Jutu yo. Tan cua cuví ndo tumaa tsa nditsin ñuhú ñicanyii, nu ndacá ñaha Jutu yo. Tatun iyó soho ndo, tyaa soho ndo tsa caahán yu.

**Xuhun cuaan tsa yihí xeehe**

**44** Tsa ndacá ñaha Nyoo tsi nyivi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihí xeehe nyico ra inga tsaha, tan sii xaan cuñí ra cuanuhu ra tan xico ra tandihí tsa iyó tsi ra. Tacan tan jatá ra ñuhu nu yihí xeehe xuhun cuaan can.

**Iin cuhva tsa cahán ra Jesús cuenda iin yuu xiñu tsa yahvi xaan nyaá**

**45** Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra, **46** tan tsa ñihí ra iin tsa yahvi xaan nyaá, xico ra tandihí maa tsa cumí ra, tan jatá ra yuu xiñu vaha can.

**Nu caahán ra Jesús iin cuhva cuenda traya**

47 Tan juvin ñi cuví tucu tsa ndacá ñaha Nyoo tsi nyívi tumaa iin traya tsa cañí ra naha nu ndutya ñuhu, tan ñihí ra naha tandíhi nuu tyaca. 48 Tan tsa tsitü traya can tsihin tyaca, tavá ra naha traya can nu ityi. Tan ican nacatsí ra naha tsi ti, naquihín vaha ra naha quítí vaha tsitsi iin tyica, tan javitá ra naha quítí ña vaha can. 49 Tan tacan cua cuvi quívi naa ñayívi, cua quítsi ángel, quítsi tava sñn ra naha tsi nyívi vaha tan nyívi ña vaha. 50 Tan cua tyihi ra naha tsi nyívi ña vaha can anyaya nu cayú ñuhü, nu cua vacu tsaá ñi tan cahyu ña cua cuvi nuhu ñi.

**Nu caahán ra Jesús tyin vaha tuhun tsahnu Nyoo tan tuhun tsaá Nyoo**

51 Tacan tan ra Jesús tsicá tuhun ra tsi ra tsicá tsihin ra, tan catyí ra tsihin ra naha:

—¿A cutuñí iñi ndo tandíhi tsa cahán yu?

Tan nacahán ra naha tan catyí ra naha:

—Cutuñí iñi ndi, Jutu Mañi yu.

52 Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndíhi ra nácaa ndacá ñaha Nyoo tsihin tandíhi tuhun tsaá tsa caahán yu, cua cuvi ra tumaa iin ra jatsii vehe tan cua jacuaha ra nduvi taahan tuhun vaha can tsi nyívi —catyí ra Jesús.

**Nu tsinuhü ra Jesús ñuu Nazaret nu tsahnu ra**

(Mr. 6:1-6; Lc. 4:16-30)

53 Tsa ndíhi cahán ra Jesús cuhva ihya tan quítá ra cuahán ra. 54 Tan tsaá nyico ra ñuu ra. Tan quítsaha jacuaha ra tsitsi vehe ñuhu ñuu can. Tan iyo cuñí nyívi tan catyí ñi:

—¿Nu maa tahan cutuhvá ra ihya

tsa tsitó xaan ra? ¿Tan nácaa cuví javaha ra tsa iyo? 55 Tyin sehe ra tahví yutun can cuví tsi ra. Tan ña María cuví síhi ra. Tan yañi ra cuví tsi ra Jacobo, ra José, ra Simón tan ra Judas. 56 Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhvá ra tandíhi tsa tsitó ra? —catyí ñi.

57 Tan yacan cuenda ña cuñí ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandíhi nyívi tandíhi ñi ityi jahá ñi tsa ñayívi tsi ra ndusu yuhu Nyoo, maa tyin nyívi ñuu ra ña tyaá yahvi ñi tsi ra tan ndi nyívi vehe ra —catyí ra Jesús.

58 Tan ña cuaha tsa iyo javaha ra ñuu ra tsa cuenda tyin ña tsinú iñi ñi tsi ra.

**Nu catyí tsi nácaa tsihi ra Juan, ra jacoondutyá tsi nyívi**

(Mr. 6:14-29; Lc. 9:7-9)

**14** 1 Quívi can ra Herodes, ra ndacá ñaha nicahnu nu cuví Galilea, ñihí tuhun ra tsa javahá ra Jesús. 2 Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyívi, ra tsa tsihi tan vityin nandoto nyico ra. Yacan cuenda iyó tunyee iñi tsi ra tsa javahá ra tsa iyo.

3-4 Tacan catyí ra tyin juvin ñi maa ra tavá tyiñu tyin tiñn ra naha tsi ra Juan. Tan cuhñi ra naha tsi ra tsihin cadena, tan tyihi ra naha tsi ra vehe caa. Tacan javahá ra Herodes tyin xaan cuñí ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasíhi ra Felipe, yañi ra.

5 Yacan cuenda ra Herodes cuñí ra cahñi ra tsi ra Juan, maa tyin yuuhví ra tsi nyívi, tyin tandíhi ñi tsinú iñi ñi tyin ra Juan, ndusu yuhu Nyoo cuví ra. 6 Tan iin quívi iyó vico ra Herodes, tan sehe ña Herodías

quitsahā tsañí ña yaa nu yucú ñi vico can. Tan tahañ xaan iñi ra Herodes.

7 Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

8 Tacan tan natyuhū sihi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutyá tsi nyivi, tsi yu nu iin coho —catyí ña.

9 Tsa tsiñi ra rey Herodes tsa cahan ña, nducuihya cuñi ra. Maa tyin tsa cuenda tsa cahan ra tyin tandihi tsa cua ndacan ña tan cua cuhva ra, yacan cuenda ña cuvi jandavi ñaha ra tyin tandihi nyivi yucú vico can tan tsiñi ñi tsa cahan ra. Yacan cuenda tava tyiñu ra na cuhva ra naha jiñi ra Juan tsi ña nu iin coho. 10 Tan tava tyiñu ra na cucahnya ra naha jucun ra Juan nu nyí ra vehe caa. 11 Tacan tan tsindacā ra naha jiñi ra Juan tsi ña, nyí tsi nu iin coho. Tan tsahā ra naha tsi ñaha tyuvaa can. Tan maa ña nacuhva cuenda ña tsi sihi ña.

12 Tacan tan tsaā ra nyicun tsi ra Juan naha ra tan naquihin ra naha cuñu ñuhu ra, tan tyihí ra naha tsitsi ñuhu. Yahā can tan tsahan ra naha tsijacotō ra naha tsi ra Jesús.

**Nu jacatsi ra Jesús tsi uhun mil rayi**

(Mr. 6:30-44; Lc. 9:10-17; Jn. 6:1-14)

13 Tsa tsito ra Jesús tsa tahañ ra Juan, quihin ra iin yutun ndoo, tan cuahán intuhun ñi maa ra nu taxin caa. Tan tsa tsito nyivi, quitā ñi ñuu ñi, tan cuahán tsihin tsaha ñi nu nyí ra. 14 Tsa quitā ra Jesús tsitsi yutun ndoo can, tan nyehe ra tyin cuaha xaan nyivi nyicun tsi ra. Tan cundaahvi iñi ra nyehe ra tsi ñi. Tan janduvahā ra tsi nyivi cuuhvi tsa tsaā tsihin ñi. 15 Tan tsa cuñi cuaā, tacan tan natuhva ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca cahan un tsihin nyivi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

16 Tan ra Jesús catyí ra:

—Nduve náa nducu ñi cuhun ñi. Cuhva nyoocho tsa catsi ñi.

17 Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

18 Tan catyí ra Jesús:

—Ndaça ndo can tsi yu.

19 Tacan tan catyí ra tsihin nyivi tyin na cunyecu ñi nu cuhu can. Yaha tsa tsinyecu ñi tan quihin ra uhun taahan paan can, tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo tan tsahnū cuatyí ra paan can. Tan tsahā ra tsi ra tsicá tsihin ra, na tsatsa ra naha tsi nyivi can. 20 Tan tandihi nyivi tsatsi ñi tan ndaha vaha iñi ñi. Yahā can tan ndoo ca tsa ñahñu, tan jacutu ra naha utsi uvi tyica tsihin tsa ñahñu ican. 21 Tan tsa tandihi ñi tsa tsatsi can, quitā maa tumaa uhun mil tsa maa ñi maa rayi. Tan siin maa ñiñaha tan tsa nyihi.

**Nu tsicá ra Jesús nu ndutya**

(Mr. 6:45-52; Jn. 6:16-21)

22 Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi. 23 Tsa yahā tsa jacunuhū ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyí ra can tan cuaā. 24 Tan tsitsi tsa tsicán tahvi ra tsi Nyoo, yutun ndoo can tsa cuahán cui tsi nda mahñu miñi. Tan ndutya miñi can cañi tsi tsi yutun

ndoo can tsa cuenda tyin ñihi xaan yihí tatyí nu cuahán ra naha. **25** Tan tsa cua tuvi cuahán ndíhi ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya. **26** Tan cuhva tsa nyehe ra naha tsi ra, tsicá ra nu ndutya can, nayuhví xaan ra naha. Tan caná tsaa ra naha, tan catyí ra naha:

—¡Jihna ndo xin. Tatyí vatsí can!

**27** Maa tyin nacahan ra Jesús tsihin ra naha, tan catyí ra:

—¡Ña nayuhvi ndo tyin maa yu cuví! —catyí ra.

**28** Tacan tan nacahan ra Pedro tan catyí ra:

—Jutu Mañi yu, tatun maa un vatsí juven, cuhva tsa quitsi ndíhi yu nu vatsí un.

**29** Tan ra Jesús catyí ra tsihin ra:

—Ñaha jiin.

Tacan tan quitá ra Pedro tsitsi yutun ndoo can, tan quitsahá tsicá ra nu ndutya tan cuahán ra nda nu vatsí ra Jesús. **30** Maa tyin cuhva tsa tuví ñi ra tyin ñihi xaan quitsahá yihí tatyí, nayuhví xaan ra, tacan tan quitsahá cuñí nyee ra, tan quitsahá caná tsaa ra tan catyí ra:

—¡Jācacu tsi yu, Jutu Mañi yu!

**31** Tan iin yaha ñi tñin ra Jesús ndaha ra, tan catyí ra tsihin ra:

—¿Nacuenda tsa nayuhví un, yooho tsa luxu xaan tsinú ñi tsi yu? —catyí ra Jesús tsihin ra.

**32** Tan cuhva tsa quihví ra naha tsitsi yutun ndoo can, cutaxin tatyí can. **33** Tacan tan ra yucú tsitsi yutun ndoo can tsicuñí tsiti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

**Nu janduvahá ra Jesús tsi nyivi cuuhví tsa iyó Genesaret**

(Mr. 6:53-56)

**34** Tsa yahá sava ra naha miñi can, tsaá ra naha ñuhu Genesaret. **35** Tan cuhva tsa nacoto nyivi iyó ican tsi ra

Jesús tyin juven ra cuví, jacoto ñi tsi tandíhi nyivi iyó tani cahnu can. Tan tsindacá ñi tandíhi nyivi cuuhví nu nyíí ra. **36** Tan caahán ndaahvi ñi tsihin ra, na cuhva ra tsa tñin ñi vasu luxu jahma ra. Tan tandíhi ñi tsa tñin jahma ra, nduvahá ñi.

**Tsa jatíví tsi nyivi nuu Nyoo**

(Mr. 7:1-23)

**15** **1** Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyíí ra Jesús tan tsicá tuhun ra naha tsi ra, tan catyí ra naha:

**2** —¿Nacuenda ña javahá ra tsicá tsihin un naha ra cuhva nacoq tsii tsahnu yo?, tyin catyí ra ican naha ra tyin iyó iin cuhva ndoo ndaha yo tsa ndí cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyí ra naha.

**3** Tan tsicá tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñí ndo tyaá yahvi ndo tsa caahán Nyoo? **4** Tyin Nyoo catyí ra: “Tyaa yahvi ndo tsi jutu ndo tan tsi síhi ndo, tyin tandíhi nyivi tsa caahán ndavaha ñi síqui jutu ñi o síhi ñi, cua cúu ñi”, catyí Nyoo. **5** Maa tyin nyoocho catyí ndo tyin cuví catyí ndo tsihin jutu ndo o tsihin síhi ndo tyehen: “Ña cuví jatinyee yu tsi un tyin tsa tsahá yu tandíhi tsa iyó tsi yu tsi Nyoo.” **6** Tatun tsa catyí ndo yacan, ña cuñí tsi tsa jatinyee ndo tsi jutu ndo o tsi síhi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo. **7** ¡Nyoocho cuñí ndo tyin vaha xaan ndo, maa tyin ña nditsa ndo! Nditsa tsa cahan ra Isafas, ra cuví ndusu yuhu Nyoo, síqui ndo jahá Nyoo. Tan catyí ra tyehen:

8 Nyivi ihya, jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ñi.

9 Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jahá Nyoo, catyí ra Jesús tsihin ra ican naha ra.

10 Tacan tan caná ra Jesús tsi nyivi tan catyí ra tsihin ñi:

—Tyaa soho ndo tsa caahán yu, tan nducu ndo cuhva cutuñi ñi ndo.

11 Tyin nyivi tsa tiví nuu Nyoo, ñavin tsa quihví yuhu ñi jatíví tsi ñi. Tyin tiví ñi jahá tsa quitá yuhu ñi.

12 Tacan tan natuhvá ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñi ra naha tsa tsiñi ra naha tsa cahán un.

13 Tan maa ra Jesús nacahán ra tan catyí ra:

—Tandihí yutun tsa ña tatsi Jutu yu, ra nyaá gloria, cua tuhun ra nda cuanda yoho tun. 14 Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

15 Tacan tan quitsahá catyí ra Pedro tsihin ra Jesús:

—Catyí tuhun tsihin ndi náa cuñi tsi catyí tsa cahán un ña.

16 Tacan tan ra Jesús catyí ra tsihin ra naha:

—Ndi nyooho tan ña cutuñi ndihí ñi ndo. 17 ¿A ña cutuñi ñi ndo tyin tsa tsatsí yo, tsitsi yo cuahán tsi? Yahá can tan cua quita nyico tsi.

18 Maa tyin tuhun tsa quitá yuhu yo, tsitsi añima yo queé can tan nyivi tiví ñi nuu Nyoo jahá tsa caahán ñi.

19 Tyin tsa caquiñi tsicá ñi ñi tsitsi

añima ñi quitá can, tan cuñi ñi cahñi ñi nyivi. Cuñi ñi suhu ñi. Yihí nyivi caahán ñi cuendu, o jacuñi nyaá ñi tsi inga ca nyivi. Yihí ra cuñi ra coo inga ñaha ra, o ñiñaha iyó yihí tsicá nuu ñi tsihin inga rayihí. Yihí ra tsicoó ra tsihin ñaha tan ña tindaha ra tsihin ña. Tan yihí rayihí quixí ra tsihin juven ñi maa rayihí. Tan ñiñaha yihí ñi quixí ñi tsihin juven ñi maa ñaha. Tan tandihí ca maa tsa caquiñi tsa javahá ñi tsihin cuñu ñuhu ñi.

20 Yacan cuví tsa jatíví tsi nyivi nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jatíví can tsi ñi —catyí ra Jesús.

### Nu tsinu ñi iin ñaha inga ñuu tsi ra Jesús

(Mr. 7:24-30)

21 Quitá ra Jesús ñuu can tan cuahán ra ityi ñuu Tiro tan Sidón.

22 Tan ityi can iyó iin ñaha Canaán. Tan tsa nyehé ña tsi ra Jesús natuhvá ña nu nyaá ra tan caná tsa ña tan catyí ña:

—Jutu Mañi yu, tata ra David, cundaahvi ñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

23 Maa tyin tumaa tsa ña tsiñi ñi ra Jesús jahá ra tsi ra tan ña nacahán ra tsa iin yaha ñi. Tacan tan natuhvá ra tsicá tsihin ra tan catyí ra naha tsihin ra:

—Cahan tsihin ña na cunuhu ña tyin utsan xaan yo tsa caná tsa ña tsata yo.

24 Tacan tan catyí ra Jesús tsihin ra naha:

—Vatsí yu jahá Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

25 Tan ñaha can natuhvá ña nu nyaá ra tan tsicuiñi tsiti ña nuu ra, tan catyí ña tsihin ra:

—Jutu Mañi yu, ¡jatyinyee tsi yu!

26 Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

27 Maa tyin ña ndasi cuñí ña tsa cahān ra, tan catyí ña tsihin ra:

—Nditsa, Jutu Mañi yu. Maa tyin nda cuando ina tan tsatsí tì títsehe tsa cucoyo xuu mesa tsitoho tì —catyí ña.

28 Tacan tan catyí ra Jesús tsihin ña:

—Yooho ñaha, tsinú xaan iñi un tsi yu. Na cuví maa cuhva tsicá iñi un.

Tan juvin ñi cuhva can tan nduvahā sehe ña.

#### Nu cuaha xaan nyivi cuuhví janduvahā ra Jesús

29 Tsa yahā yacan tan ra Jesús cuahán ra ityi yuhu miñi Galilea, tan ndaḡ ra iin jiñi yucu tan ican tsinyaa ra. 30 Tan cuaha xaan nyivi cuahán ñi nu nyaá ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñiñi ñi, lundu ñi. Tan yihí ñi yihí inga ca nu cuehe tsi ñi. Tan tsaquín nyecu ñi tsi tandihi ñi cuuhví can nu nyaá ra Jesús. Tan janduvahā ra tsi ñi. 31 Tan iyo xaan cuñí nyivi can nyehé ñi tyin nacahān ñi ñiñi tan nduvahā ñi lundu, tan nacacá ñi coxo, tan nanyehé ñi cuaa. Tan quitsahā jacahnu xaan ñi tsi Nyoo ñi, tsa cuví ñi nyivi Israel.

#### Nu tsahá ra Jesús tsa catsi cumi mil rayi

(Mr. 8:1-10)

32 Tacan tan canā ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyivi ihya, tyin tsa uñi quivi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityi cuanuhú ñi

—catyí ra Jesús.

33 Tacan tan ra tsicá tsihin ra catyí ra naha tsihin ra:

—¿Tan numaa cua ñiñi yo tsa catsi nyivi cuaha ihya, tyin ihya nduve nyivi iyó?

34 Tacan tan ra Jesús tsicā tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

35 Tan catyí ra tsihin nyivi na cunyecu ñi nu ñuhu. 36 Tacan tan quihñ ra tsa utsa paan can tan tyaca can, tan nacuhvā ra tyahvi nyoo tsi Nyoo. Tan quitsahā tsahnú cuatyí ra paan tsihin tyaca, tan tsahā ra tsi ra tsicá tsihin ra tyin na tsatsa ra naha tsi nyivi. 37 Tandihí ñi tsatsí ñi, tan ndahā vaha iñi ñi. Tan tsa ndihí tsatsí ñi tan naquihñ ra naha tsa ñahñu tsa ndoo can tan quitā utsa tyica cuví tsi. 38 Tan ra tsa tsatsí can naha ra quitā maa cumi mil ra naha tan siñ maa ñiñaha tan tsa nyihi. 39 Yahā can tan jacunuhū ra tsi ñi, tan quihví ra tsitsi yutun ndoo, tan cuahán ra ityi Magdala.

#### Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo

(Mr. 8:11-13; Lc. 12:54-56)

16 <sup>1</sup> Tacan tan ra fariseo naha ra tan ra saduceo naha ra tsahān ra naha nu nyii ra Jesús, tyin cuñí ra naha nducu cuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo. <sup>2</sup> Maa tyin nacahān ra Jesús tan catyí ra tsihin ra naha:

—Tsa cueñi, tuhvá ndo catyí: “Siñ xaan caa ityaan cua cuvi tyin cuaaha xaan nu vico”. <sup>3</sup> Tan tsa tuvi catyí tucu ndo tyin ña siñ maa caa cua cuvi, tyin iñi naaha xaan tan cuaaha xaan vico, catyí ndo. ¿Nacuenda tyin tsitó



tucu ndo yacan tan tsa cuví vityin ña cuví nacoto ndo, nyooho ra jandaví ñaha? **4** Nyívi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñi ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuví tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

**Tuhun caahán ra fariseo naha ra cuví tsi tumaa yutsan iya**

(Mr. 8:14-21)

**5** Cuhva tsa yahá ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha. **6** Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

**7** Tacan tan quitsahá natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

**8** Tan tsa tuví iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo?

**9** ¿A ñaha ca cutuñi iñi ndo? ¿A ña nducuhún iñi ndo quiñi tsa jacatsi yu tsi uhun mil rayii tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can? **10** ¿A tsa naá ndihi tucu iñi ndo quiñi tsa jacatsi yu cumi mil rayii, tan najava taahan tyica jacutu ndo tsihin tsa ndoo tsa utsa taahan ñi paan?

**11** ¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

**12** Tacan tan cutuñi iñi ra naha tyin ñavin tsa cuenda yutsan iya paan

can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

**Nu catyí ra Pedro tyin ra Jesús cuví ra Cristo, ra jacacú tsi yo**

(Mr. 8:27-30; Lc. 9:18-21)

**13** Cuhva tsa tsaa ra Jesús ityi ñuu Cesarea Filipino, tsicá tuhun ra tsi ra tsicá tsihin ra tan catyí ra:

—¿Naa catyí nyivi? ¿Yoo ra cuví yu, Rayii tsa quee nda gloria? —catyí ra.

**14** Tan nacahán ra naha tan catyí ra naha:

—Yihí nyivi catyí ñi tyin ra Juan ra jacoondutyá tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahán tsanaha cuví un.

**15** Tacan tan catyí ra tsihin ra naha:

—Tan nyooho, ¿yoo ra cuví yu, catyí ndo?

**16** Tacan tan nacahán ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

**17** Tan nacahán ra Jesús tan catyí ra:

—Sii xaan cuví tsi yooho, Simón, sehe ra Jonás, tyin ñavin nyivi janahá tuhun ihya tsi un, tyin maa Jutu yu, ra nyaá gloria janahá tsi un. **18** Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi. **19** Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu ñuhu ñayivi, tsa nuuhñi jahá Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

**20** Tacan tan catyí ra Jesús tsihin ra tsicá tsihin ra tyin ña cahan ra

naha tsihin nyivi tun juvin ra cuví ra Cristo ra tsa quee nu nyaá Nyoo.

**Nu caahán ra Jesús tyin cua cahñi nyivi tsi ra**

(Mr. 8:31–9:1; Lc. 9:22–27)

21 Nda quivi can quitsaha catyí ra Jesús tsihin ra tsicá tsihin ra, tyin cuñí tsi tsa cuhun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha. 22 Tacan tan quihñ ra Pedro tsi ra tan quitá siñ ra tsihin ra tan quitsaha caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

23 Tan nanyico coo ra Jesús, tan quitsaha caahán ra tsihin ra Pedro:

—¡Jatsiyo nyaha tsi un, cuihna! Tyin cuñí un casi un tsi yu. Tyin yooho ña tsicá iñi un cuhva cuñí Nyoo, tyin cuhva cuñí nyivi tsicá iñi un —catyí ra.

24 Tacan tan ra Jesús catyí ra tsihin ra tsicá tsihin ra:

—Tatun ndáa nyooho cuñí cunycun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Tan ña cua ndu uvi iñi ndo tsa yihí ndo cuenda yu, vasu tandihí quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunycun ndo tsi yu. 25 Tan nyooho tsa ña cuñí nyehe tundoho, tan ña cuñí ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi ndo tsa cuenda yu, cua cacu ndo. 26 Tyin nduve yahvi nyaá tsa cua ñihi ndo tandihí tsa iyó nu ñuhu ñayivi tun añima ndo tan ña

cua cacu tsi. Tyin nduve maa náa tsihin tan cuvi tyahvi ndo tan ña cua cunaa añima ndo. 27 Tyin yuhu, Rayii tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javaha ndo. 28 Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

**Nu nyehe uñi taahán ra tsicá tsihin ra Jesús nácaa tsa siñ caá xiñu ra Jesús nu ndacá ñaha ra nda gloria**

(Mr. 9:2–13; Lc. 9:28–36)

**17** 1 Tan tsa yaha iñu quivi, tan quihñ ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha. 2 Tan ican nasama cuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu. 3 Tacan tan nyehe ra naha tsi ra Moisés tan ra Elías, natuhún ra naha tsihin ra Jesús. 4 Tan quitsaha caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñí un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

5 Tsitsi tsa caahán ra Pedro, quitsi iin vico tsa xiñu xaan siqui ra naha. Tan tyasí tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan siñ xaan cuñí yu tsihin ra. Tyaa yahvi ndo tsa caahán ra —catyí ndusu can.

6 Tsa tsiñi ra tsicá tsihin ra Jesús

tuhun ihya, tsicava<sub>v</sub> tsihin nuu ra naha nda nu ñuhu, tyin nayuhvi<sub>v</sub> xaan ra naha. <sup>7</sup> Tacan tan natuhva<sub>v</sub> ra Jesús nu cayucú ra naha, tan tñin ra tsi ra naha, tan catyí ra:

—Nduvita ndo, tan ña nayuhvi ndo.

<sup>8</sup> Tan cuhva tsa nanyehē ra naha, intuhun ña ra Jesús nyaá, tan nduve inga uvi ca ra naha.

<sup>9</sup> Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cahan ndo tsa nyehe<sub>v</sub> ndo ihya tsihin nyivi. Tsa yaha tsa cúu Rayñi tsa quee<sub>v</sub> nda gloria tan nandoto ra, tacan tan cua cahan ndo can —catyí ra.

<sup>10</sup> Tacan tan tsicā tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

<sup>11</sup> Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihí. <sup>12</sup> Maa tyin yuhu catyí yu tsihin ndo tyin tsa yaha<sub>v</sub> quitsi ra Elías, tan ña nacoto<sub>v</sub> nyivi tsi ra, tan javaha<sub>v</sub> ñi tsihin ra tandihí cuhva cuñi maa ñi. Tan tacan tucu yuhu, Rayñi tsa quee<sub>v</sub> nda gloria, cua janyehē ñi tundoho tsi yu —catyí ra tsihin ra naha.

<sup>13</sup> Tacan tan cutuñi<sub>v</sub> iñi ra naha tyin tuhun ra Juan, ra jacoondutya, caahán ra Jesús.

**Nu janduvaha<sub>v</sub> ra Jesús tsi iin ra luhlu tsa tsiihí naaha jahá tatyí ña vaha**

(Mr. 9:14-29; Lc. 9:37-43)

<sup>14</sup> Cuhva tsa tsaq<sub>v</sub> ra naha nu yucú nyivi, natuhva<sub>v</sub> iin ra tan tsicuiñi<sub>v</sub> tsiti ra nuu ra Jesús, tan catyí ra tsihin ra:

<sup>15</sup> —Tata, cundaahvi<sub>v</sub> iñi tsi sehe yu, tyin yihí cuehe tsiihí naaha tsi ra, tan tuhvá ra nduva ndasava, tan

cuaha xaan tundoho nyehé ra jahá cuehe can. Tan yihí tsaha nduvá ra nu ñuhu<sub>v</sub> tan cayú ra, tan nduvá tucu ra nu yihí ndutya. <sup>16</sup> Tan tsindaca<sub>v</sub> yu tsi ra tsi ra tsicá tsihin un, maa tyin ña cuvi<sub>v</sub> janduvaha<sub>v</sub> ra naha tsi ra —catyí ra.

<sup>17</sup> Tan nacahan ra Jesús tan catyí ra:

—¿Nyooho, nyivi tsa ña tsinú iñi cuví ndo! ¿Tan caquiñi<sub>v</sub> ndo! ¿Ndáa nda quivi<sub>v</sub> cua cunyii yu tsihin ndo? ¿Tan ndáa nda quivi<sub>v</sub> cua cunyeē iñi yu tsihin ndo, tyin nyooho ña tsinú vaha maa iñi ndo tsi yu? Tñdaca ndo tsi ra luhlu tsi yu —catyí ra.

<sup>18</sup> Tacan tan tava<sub>v</sub> ra Jesús tsi nu tatyí ña vaha can, tan quitā nu tsi ra luhlu can. Tan juvin ñi cuhva can nduvaha<sub>v</sub> ra.

<sup>19</sup> Tsa yaha<sub>v</sub> can tan tsicā tuhun siin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuvi<sub>v</sub> tava ndi tatyí ña vaha can?

<sup>20</sup> Tan ra Jesús nacahan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuví catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuvi javaha ndo tatun nditsa tsa tsinú iñi ndo tsi yu. <sup>21</sup> Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

**Inga tsaha cahan ra Jesús tsa cua cahñi nyivi tsi ra**

(Mr. 9:30-32; Lc. 9:43-45)

<sup>22</sup> Yucú ra naha Galilea can, tan ra Jesús catyí ra tsihin ra naha:

—Yuhu, Rayñi tsa quee<sub>v</sub> nda gloria, iin ra cua nacuhva cuenda ra tsi yu tsi ra xaan iñi tsi yu naha ra. <sup>23</sup> Tan cua cahñi ra naha tsi yu. Maa tyin tsa

tsinu uñi quivi tan cua nandoto yu  
—catyí ra.

Tsa tsiñi ra naha tuhun ihya,  
cuihya xaan cuñi ra naha cuvi.

**Nu tyahví ra naha cuenda tsa nduvaha  
vehe ñuhu cahnu**

24 Cuhva tsa tsaq ra Jesús tan ra  
tsicá tsihin ra ñuu Capernaum, ra  
tavá xuhun cuenda vehe ñuhu naha  
ra, tsañan ra naha tsinyehe ra naha  
nu nyí ra Pedro tan tsicá tuhun ra  
naha tsi ra tan catyí ra naha:

—¿A ña tuhvá ra jacuahá tsi ndo  
tyahví xuhun tsa cuenda vehe ñuhu  
cahnu? —catyí ra naha tsihin ra  
Pedro.

25 Tan nacahan ra Pedro tan catyí  
ra:

—Tuhvá ra.

Tan tsa quihví ra Pedro tsitsi vehe  
nu iyó ra naha, jihna ca ra Jesús  
nacahan tan catyí ra:

—¿Nacaa cuñi yooho, Simón?  
¿Yóo tsi quihín ra cuví rey tsa iyó nu  
ñuhu ñayivi ihya yahvi? ¿A tsi nyivi  
ñuu maa ra o tsi inga nyivi?

26 Nacahan ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña  
taahán tsi tyahví ñi. 27 Maa tyin ña  
cuñi yo tsa cahan ra naha siqui yo,  
yacan cuenda vaha ca tsa cuhun un  
yuhu miñi can, tan jacuhun un yiqui  
tucu un tsitsi ndutya. Tan tyaca tsa  
cua ñihi un tsa jihna ñi, tsitsi yuhu ti  
cua ñihi un xuhun. Tan tsihin yacan  
ñi cua tyahvi un tsa cuenda yo  
—catyí ra Jesús tsihin ra Pedro.

**Nu janahá ra Jesús yóo ra cahnu  
ca cuví nuu tandíhi nyivi tsa  
ndacá ñaha Nyoo**

(Mr. 9:33-37; Lc. 9:46-48)

**18** 1 Quivi can natuhvá ra tsicá  
tsihin ra Jesús nu nyaá ra, tan  
tsicá tuhun ra naha tsi ra tan catyí ra  
naha:

—¿Yóo ra cahnu ca cuví nu ndacá  
ñaha Nyoo?

2 Tacan tan ra Jesús cana ra tsi iin  
ra luhlu, tan tyaa ra tsi ra mahño ra  
naha. 3 Tan catyí ra:

—Tsa nditsa catyí yu tsihin ndo,  
tyin tatun nyooho tan ña cua nasama  
ndo cuhva iyó ndo tan ña janduluhlu  
ndo tsi ndo tumaa ra nyihi, ña cua  
cuví quihvi ndo nu ndacá ñaha Nyoo.  
4 Tyin ra tsa cahnu ca cuví nuu Nyoo,  
juvin ra cuví ra tsa janduluhlu tsi,  
tumaa ra luhlu ihya. 5 Nyivi tsa  
naquihín tsi iin nyivi tumaa ra luhlu  
ihya, tyin tsinú ñi ñi tsi yu, yuhu  
naquihín cuenda ñi.

**Nu caahán ra Jesús tsihin yo nácaa  
jaha cuenda yo tsi yo coto javaha  
yo tsa ña vaha**

(Mt. 5:29-30; Mr. 9:42-48; Lc. 17:1-2)

6 7 Tatun yóo nyivi natyuhú tsi iin  
nyivi tsa ñaha ca tsinú vaha ñi tsi  
yu, na javaha ñi tsa caquiñi, vaha ca  
na cunuhni iin yuu yoso vee jucun ñi  
natyuhú can, tan cujanehni nyivi tsi  
ñi nu cunu ndutya ñuhu. 7 7 Ndahvi  
nyivi ñuu ñayivi, tyin tacan iyó tsa  
jativí tsi ñi! 7 Tan ndahvi tucu ra  
ndaahvi tsa jativí tsi ñi!

8 8 Yacan cuenda tatun ndaha un o  
tsaha un javahá tsa ña vaha, cahnya  
can tan javita un. Tyin vaha ca quihvi  
un nu coo un tsihin Nyoo tsihin tsa  
lundu ndaha un o lundu tsaha un, tan  
ñavin ca tsa naniñ un tan jacuhun  
Nyoo tsi un nu cayú ñuhu tsa ña cua  
ndahva maa. 9 Tun javahá un tsa ña  
vaha jahá tinuu un, tava can tan  
javita un. Tyin vaha ca quihvi un nu  
coo un tsihin Nyoo tsihin intuhun  
tinuu un, tan ñavin ca tsa jacuhun  
Nyoo tsi un tsihin nduvi tinuu un nu  
cayú ñuhu tsitsi anyaya.

**Nu cahán ra Jesús tyin tumaa mbee  
tsa cunaq, tacan cuví yo**

(Lc. 15:3-7)

10 10 Ña caca ñi ndo tyin ra nyihi

cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria. **11** Tyin yuhu, Rayí tsa quee nda gloria, vatsí jacacu yu tsi nyívi tsa cuanaa.

**12** ¿Nacaa cuñi nyooho? Tatun iin ra tan iyó iin cientu mbee jana ra, tan cunaa intuhun tí, ¿a ña nacoo ra tsa cumi xico tsahun cumi tí nu yucú tí, tan cahun ra cunanducu ra tsi quití tsa cuanaa can? **13** Tan tatun nañihi ra tsi tí, tsa nditsa tyin sñi ca cua cuñi ra tsihin quití can, tan ñavin ca tsihin tsa cumi xico tsahun cumi quití tsa ña tsinaa. **14** Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyívi tsa cuví tumaa ra nyihi ihya.

**Nacaa taahán tsi jahá tahan yo  
tucahnu iñi tsi yo**

*(Lc. 17:3)*

**15** Tatun ra yañi un tan javahá ra tsa ña vaha tsi un, cahan tsihin intuhun ñi maa ra tan catyí un tsihin ra tyin ña vaha cuhva javahá ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can. **16** Maa tyin tatun ña tyaa yahvi ra tsi un, tacan tan caha un tsi iin o uvi ra tyin cuví ra naha tsa ndaa tsa cuenda tsa cua cahan un tsihin ra can. **17** Tatun ña tyaa yahvi ra ndi maa tsi ra tsa tsahan tsihin un naha ra, tacan tan cahan tsihin tandíhi nyívi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jaha ndo tumaa tsa ñavin ra yíhi tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

**18** Tsa nditsa catyí yu tsihin ndo, tyin tandíhi tsa cuhñi ndo ihya nu ñuhu ñayívi, tsa nuuhñi tsi jahá maa Nyoo nda gloria. Tan tandíhi tsa

ndatsi ndo ihya nu ñuhu ñayívi, tsa ndatsi maa Nyoo nda gloria.

**19** Tan juvin ñi catyí tucu yu tsihin ndo, tatun uvi ndo ihya nu ñuhu ñayívi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo. **20** Tyin nu yucú uvi o uñi nyívi tan jacahnú ñi tsi yu, ican nyaá yu mahñu ñi —catyí ra Jesús.

**21** Tacan tan tsahan ra Pedro tsindacá tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

**22** Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

**Nu cahan ra Jesús iin cuhva cuenda  
iin ra tsa ña cuñi jaha tucahnu iñi**

**23** Yacan cuenda tsa ndacá ñaha Nyoo tsi nyívi cuví tsi tumaa iin rey tsa nacana tsi tandíhi musu ra tyin cua nyehe ra nácaa nyaá cuenda ra naha tsi ra. **24** Tan cuhva tsa quitsaha natavá ra cuenda, tan tsindacá ra tsi iin musu tsa cuaha millón pesu nyaá cuenda tsi ra. **25** Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasiñi ra, tan tsihin sehe ra tan tandíhi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.” **26** Tacan tan musu can tsicuiñi tsiti ra nuu tsitoho ra, tan cahan ndaahvi ra tsihin ra, tan catyí ra:

“Tata, jaha tumañi iñi, cuate un luxu, tan tyahvi yu tandíhi tsa nyaá cuenda yu tsi un nda ñihi yu xuhun”, catyí ra. **27** Tan cundahvi iñi tsitoho ra tsi ra, tan jahá ra tucahnu iñi tsi ra, tan

janaa ra tandihi tsa nyaá cuenda ra, tan jandoq nuña ra tsi ra. **28** Maa tyin cuhva tsa quita musu can, nañihí ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tiin ra tsi ra can, tan quitsaha tñn ra jucun ra, tan catyí ra tsihin ra:

“Tyahvi tsa nyaá cuenda un tsi yu.”

**29** Tacan tan tsicuiñi tsiti ra can nuu ra, tan cahān ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra.

**30** Maa tyin maa ra ña cuñi ra cuatu ra, tan tsahān ra tsityihí ra tsi ra can vehe caa nda cuanda tsa tyahvi ra tsa nyaá cuenda ra tsi ra. **31** Tsa nyehe inga ca musu tsa javaha ra, cuiihya xaan cuñi ra naha, tan tsahān ra naha tsinacatyí tuhun ra naha tsihin tsitoho ra naha tsa ña vaha tsa javaha ra can. **32** Tacan tan tsitoho ra can tava tyiñu ra na quitsi ra can. Tan tsa tsaā ra, tan catyí ra tsihin ra: “Musu ña vaha cuví un. Yuhu jahā yu tucahnu iñi tandihi tsa nyaá cuenda un tsi yu, tyin cahān ndaahvi un tsihin yu. **33** Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra.

**34** Tan cuxaān xaan tsitoho ra, tan tava tyiñu ra na tatsi tuñi ra naha tsi ra nda cuanda tsa tyahvi ra tandihi tsa nyaá cuenda ra.

**35** Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyoocho tatun ña jaha ndo tucahnu iñi tsi nyivi ndo tsihin tsa ñi iñi añima ndo.

**Nu caahán ra Jesús tyin ña vaha tsa nacoo ihñi rayi tsi ñasihi ra**

(Mr. 10:1-12; Lc. 16:18)

**19** <sup>1</sup> Tsa yahā tsa cahān ra Jesús tuhun ihya, tan quita ra cuenda Galilea can, tan cuahán ra

cuenda Judea inga tsiyo yutya cahnu Jordán, ityi nu caná ñicanyii.

**2** Cuaha xaan nyivi tsinyicun tsi ra, tan janduvaha ra tsi nyivi cuuhví.

**3** Tacan tan juhva ra fariseo naha ra natuhva ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuvi tyaa ra naha cuatyí siqui ra. Tan tsica tuhun ra naha tsi ra tan catyí ra naha:

—¿A vaha tsa nacoo rayi tsi ñasihi ra tsa cuenda náa ñi tsihi tsaha ña tsi ra?

**4** Tan nacahān ra tan catyí ra:

—¿A ña tuhvá ndo cahví nu tutu Nyoo nu catyí tsi tyin ra tsa javaha tsi ndo nda quivi jihna ñi, javaha ra rayi tan ñaha? **5** Tan catyí tsi tyehen: “Taahán tsi nacoo rayi tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuvi ñi tumaa tsa intuhun ña nyivi.”

**6** Yacan cuenda, ñavin ca uvi taahan ñi, maa tyin nduvi ñi intuhun ña nyivi cuví ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

**7** Tacan tan tsica tuhun ra naha tsi ra Jesús tan catyí ra naha:

—¿Nacuenda tsa tyaā ra Moisés tyin cuví can iin rayi tutu cuenda ley ra tan nacoo ra ñasihi ra?

**8** Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsaha ra Moisés ndatu tsa nacoo ndo ñasihi ndo. Maa tyin quivi jihna ñi ñavin tacan tsicoq nyivi. **9** Yuhu catyí yu tsihin ndo tyehen: Ra tsa nacoo ñasihi, tan ñavin tsa cuenda tsa quituvi ña tsihin inga rayi, tan tindaha ra tsihin inga ñaha, tsicoó cuatyí ra nuu Nyoo. Tan ra tsa tindaha tsihin ñaha tsa nacoo rayi can, juvin ñi tsicoó tucu cuatyí ra can —catyí ra.

**10** Tacan tan ra tsicá tsihin ra, catyí ra naha tsihin ra:

—Tatun tacan taahán tsi coo rayi̯i tsihin ñasi̯i ra, vaha ca ña tindaha yo.

11 Tan ra Jesús catyí ra tsihin ra naha:

—Ña tandi̯i nyivi̯i cuví naquihin cuenda tuhun ihya. Maa tyin nyivi̯i tsa tsaha̯ Nyoo cuví naquihin cuenda ñi can. 12 Tsa ña tindaha nyivi̯i, cuaha ñi cuenda cuví tsi. Yihí ñi ña cuñí ñi tindaha ñi tyin iin cuhva caa maa ñi nda cacú ñi. Tan inga ñi ña cuñí ñi tindaha ñi tyin tsa nducapun ñi jaha̯ nyivi̯i. Tan yihí ñi ña tindaha ñi tsa cuenda tsa cuñí ñi javaha ñi maa ñi maa tyiñu Nyoo, na nducuaha ca añima tsa ndacá ñaha Nyoo. Tandihí nyivi̯i tsa cuví javaha yacan na javaha ñi —catyí ra Jesús.

**Nu nasocó ra Jesús tsi tsa nyihi**

(Mr. 10:13-16; Lc. 18:15-17)

13 Tacan tan quitsi̯i ndaca nyivi̯i juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quitsaha̯ caahán ra naha tsi nyivi̯i tsa cuahán tsihin tsa nyihi can. 14 Maa tyin ra Jesús catyí ra:

—Jaña ndo tsi tsa nyihi na quitsi̯i maa tsi naha tsi nu nyaá yu. Tan ña casi ndo. Tyin nyivi̯i ndacá ñaha Nyoo cuví ñi tumaa tsa nyihi ihya —catyí ra.

15 Tacan tan tyiso̯ ndaha ra jiñi tsi naha tsi. Yaha̯ can tan cuahán ra.

**Nu tsaha̯ ra Jesús cuhva tyin yii  
xaan nacuhva cuenda iin ra  
cuca tsi ra tsi Nyoo**

(Mr. 10:17-31; Lc. 18:18-30)

16 Iin ra tyuvaa tsaha̯n ra tsindaca̯ tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayivi̯i nyito tsa ña cua naa maa?

17 Tan ra Jesús catyí ra tsihin ra:

—¿Nacuenda catyí un tyin ra vaha

cuví yu? Intuhun ñi maa Nyoo cuví ra vaha. Tan tsa catyí un tyin vaha yu, nacotó un tyin Nyoo cuví yu, Maa tyin tatun cuñí un coo un ñayivi̯i tsa ña cua naa maa, javaha tandihí tuhun tsa tsaha̯ Nyoo tyin javaha yo —catyí ra tsihin ra.

18 Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña cahñi̯i un nyivi̯i. Ña coo inga ñaha tsi un. Ña suhu un tsa tsii nyivi̯i. Ña cahan un cuendu siqui̯i nyivi̯i.

19 Tyaa yahvi tsi jutu un tan tsi sihi un. Tan cuñi̯i tsi nyivi̯i, tumaa tsa cuñi̯i un tsi maa un.

20 Tan ra tyuvaa can, catyí ra tsihin ra:

—Tandihi̯i maa yacan tan tyaá yahvi yu nda tahan luhlu yu tan nda cuanda vityin. ¿Náa ca cumañi̯i tsi yu?

21 Tan ra Jesús catyí ra tsihin ra:

—Tatun cuñi̯i un tsa iin ndaha ñi cuvi un iin ra cuiti̯i nuu Nyoo, cuaahan tan xico un tsa iyó tsi un, tan cuhva un tsi nyivi̯i ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

22 Maa tyin cuhva tsa tsiñi̯i ra tyuvaa can tsa cahan ra Jesús tsihin ra, cuihaya xaan cuñi̯i ra cuví tan cuanuhu̯ ra tyin cuca xaan ra.

23 Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yii xaan tan cuví nacuhva cuenda nyivi̯i cuca tsi ñi na cundaca ñaha Nyoo tsi ñi. 24 Catyí yu tsihin ndo inga tsaha, tyin vasu yii xaan yaha iin camellu xuu iin yiqui̯i tucu, maa tyin yii xaan ca tsa quihvi̯i iin nyivi̯i cuca nu ndacá ñaha Nyoo —catyí ra Jesús.

25 Tsa tsiñi̯i ra tsicá tsihin ra Jesús tsa cahan ra, iyo xaan cuñi̯i ra naha, tan quitsaha̯ tsicá tuhun tahan ra naha, tan catyí ra naha:

—Tun tacan, yoñi̯i cua cuví cacu

26 Tacan tan nanyehē ra Jesús nu nyecú ra naha tan catyí ra:

—Nyivi ña cuví javaha ñi yacan, maa tyin Nyoo cuví javaha ra tandihi.

27 Tacan tan quitsahā caahán ra Pedro tsihin ra:

—Jutu Mañi yu, nyuhu tandihi maa tsa iyó tsi ndi nacoq ndi tan nyicún ndi tsi un. ¿Náa cua ñihi ndi? —catyí ra tsihin ra.

28 Tan nacahān ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihi tsa iyó, yacan cuví quivi cua cunyaa yuhu Rayi tsa quee nda gloria nu tyayu sií xaan caá tan cua cundaca ñaha yu. Tan nyoooho tsa nyicún tsi yu, cua cunyecu ndihi ndo nu utsi uvi taahan tyayu sií caá. Tan cua cundaca ñaha ndo tsi tandihi nyivi cuví tata tsa utsi uvi taahan sehe ra Israel. 29 Tan tandihi nyoooho tan tandihi inga nyivi tsa nacoq vehe, o yañi ñi, o cuhva ñi, o jutu ñi, o sihi ñi, o ñasihi ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsaha siquí can, tan cua ñihi tucu ñi ñayivi nyito tsa ña cua naa maa coo ñi. 30 Cuaha xaan nyivi cuahán ityi nuu vityin, ñi ican cua cuhun nu ndihi ña. Tan cuaha xaan nyivi cuahán nu ndihi vityin, ñi ican cua cuhun ityi nuu.

#### Nu jacuahā ra Jesús iin cuhva cuenda ra jahá tyiñu

**20** 1 Tsa ndacá ñaha Nyoo tsi nyivi, cuví tsi tumaa iin ra iyó cora uvas. Tan tuvi ñi quita ra cuahán ra cuanducú ra musu jaha tyiñu nu tyiñu jahá ra. 2 Tan ndoo ra tuhun tsihin musu can tyin cua tyahvi ra yahvi tsa iin quivi. Tan jacuhun ra tsi ra naha cua jaha tyiñu ra naha nu iyó tyiñu jahá ra. 3 Yahā can tan cuahán ra inga tsaha cuhva caa iin tsa tuvi. Tan nyehē ra tsi juhva ca ra yucú taxin nuyahvi can.

4 Tan catyí ra tsihin ra naha:

“Cuaahan ndihi tucu nyoooho jaha tyiñu ndo nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihi tucu ra can naha ra. 5 Tan tsitoho cora can quita ra inga tsaha tsa ora. Tan juvin ñi musu nducú ra. Tan caa uñi tsa tseñi, quita ra inga tsaha nducú ra musu. 6 Yahā can tan quita nyico ra caa uhun tsa tseñi tan nyehē ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.” 7 Tan nacahān ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuaahan ndihi ndo jaha tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra.

8 Tan cuhva tsa cua cuaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihi naha ra, tan nu cua ndihi tan tyahvi un tsi ra tsa quihvi tsa jihna ñi naha ra”, catyí ra. 9 Tacan tan tsaq ra tsa quihvi caa uhun tsa tseñi can naha ra. Tan intuhun intuhun ra naha quihín ra naha yahvi naní iin quivi. 10 Yahā can, tan cuhva tsa tahān tsi tsi ra tsa quihvi tsa jihna ñi can naha ra, cuñí maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivi quihín ra naha. 11 Tan cuhva tsa quihín ra naha, quitsahā caahán ra naha tsi tsitoho tyiñu can. 12 Tan catyí ra naha: “Ra tsa tsaq nu ndihi ihya naha ra, intuhun ñi hora jahā tyiñu ra naha. Tan iin ñi yahvi tyahvi un tsi ra naha tsihin tucu nyuhu tan nduvi nduvi jahā tyiñu ndi nu ihñi”, catyí ra naha. 13 Maa tyin nacahān tsitoho tyiñu can, tan catyí ra tsihin iin ra can: “¡Tsa!, nduve tsa



ña vaha javaha<sub>h</sub> yu tsihin un. ¿A ñavin yahvi tsa iin quiví ndoo yo tuhun tyin cua tyahvi yu tsi un? **14** Quihin yahvi un, tan cūanuhu. ¿A nduve ndatu iyó tsi yu tsa tyahvi yu tsi ra tsa quihvī nu ndihī iin ñi cuhva tsa tyahvī yu tsi yooho? **15** ¿A nduve ndatu iyó tsi yu tsa javaha yu náa cuñí maa yu tsihin xuhun yu? ¿A ndasi cuñí un tyin vaha iñi yu tsihin inga ra can naha ra?” catyí ra. **16** Tacan nyiví quihvī nu ndihī, cuhun ñi ityi nuu. Tan nyiví cuahán ityi nuu, nda nu ndihī ña cua cuhun ñi. Tyin cuaha xaan nyiví nacaná Nyoo, maa tyin juhva ñi ñi nacatsí ra.

**Inga tsaha jacotó ra Jesús cuhva  
cua cahñi nyiví tsi ra**

(Mr. 10:32-34; Lc. 18:31-34)

**17** Cuhva tsa cuñí cuhun ra Jesús nda ñuu Jerusalén, canā siin ra tsi tsa utsi uvi ra tsicá tsihin ra tan catyí ra tsihin ra naha:

**18** —Nyehe<sub>h</sub> ndo tyin cuahán yo Jerusalén vityin. Tan ndacan cua nacuhva cuenda nyiví tsi yuhu, Rayi tsa quee<sub>h</sub> nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyí ra naha tyin taahán tsi cúu yu. **19** Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quiví cua nandoto yu —catyí ra Jesús tsihin ra naha.

**Nu tsicán sihi ra Jacobo tan ra Juan  
iin tumañi iñi tsi ra Jesús**

(Mr. 10:35-45)

**20** Tacan tan ñasihi ra Zebedeo natuhvā ña nu nyí ra Jesús tsihin nduvi sehe ña, ra Jacobo tan ra Juan. Tan tsicuiñi tsiti ña nuu ra tyin cua ndacan ña iin tumañi iñi tsi ra.

**21** Tan tsicā tuhun ra Jesús tsi ña tan

catyí ra:

—¿Náa cuñí un?

Tan catyí ña:

—Quiví tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

**22** Maa tyin nacahan ra Jesús tan catyí ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cuhun ndo tuhun tsihi tumaa cua cuhun yuhu? —catyí ra.

Tan nacahan ra naha tan catyí ra naha:

—Cuví maa.

**23** Tan catyí ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsihi tumaa cuhun yuhu tuhun tsihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyí ra Jesús tsihin ra naha.

**24** Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra. **25** Maa tyin canā ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyiví iyó nu ñuhu ñayiví ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha. **26** Maa tyin ñavin tacan taahán tsi javaha nyooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihī nyooho. **27** Tan ndaa nyooho tsa cuñi ndo cuví ndo ityi nuu, cuñi tsi cuví ndo musu tandihī ca ra naha. **28** Tumaa yuhu, Rayi tsa quee<sub>h</sub> nda gloria, ña vatsí yu tyin jatyinyee nyiví tsi yu. Maa tyin yuhu vatsí yu vatsí jatyinyee yu tsi maa ñi, tan cua cuhva yu ñayiví yu tsa cuenda ñi.

Tyin tsihin yacan cua tyahvi yu cuatyí tandíhi ñi.

**Nu janduvahā ra Jesús tsi uvi taahan ra cuaa**

(Mr. 10:46-52; Lc. 18:35-43)

29 Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyívi cuahán cua nyicun tsi ra naha. 30 Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsahā caná tsa ra naha. Tan catyí ra naha:

—¡Jutu Mañi yu, tata ra David, cundaahvi iñi tsi ndi! —catyí ra naha.

31 Tan nyívi quitsahā caahán ñi tsihin ra naha na casi ra naha yuhu ra naha. Maa tyin ñihi ca canā tsa ra naha:

—¡Jutu Mañi yu, tata ra David, cundaahvi iñi tsi ndi!

32 Tacan tan tsicuñi ra Jesús tan canā ra tsi nduvi taahan ra cuaa can, tan tsicā tuhun ra tsi ra naha tan catyí ra:

—¿Náa cuñi ndo javaha yu tsi ndo?

33 Tan nacahān ra naha tan catyí ra naha:

—Jutu Mañi yu, jananyehe tsi ndi.

34 Tacan tan cundaahvi iñi ra Jesús tsi ra naha, tan tñi ra tinuu ra naha. Tan iin yaha ñi nanyehe ra naha, tan cuiti cuanyicún ndíhi ra naha tsi ra Jesús.

**Nu cuahán ra Jesús ñuu Jerusalén**

(Mr. 11:1-11; Lc. 19:28-40; Jn. 12:12-19)

**21** 1 Tsa cua tsa ra naha ñuu Jerusalén, tan tsaā ra naha ñuu Betfagé, yatyin ñi yucú Olivo nu iyó yutun olivo. Tacan tan tava tyiñu ra Jesús tsi uvi ra tsicá tsihin ra.

2 Tan catyí ra tsihin ra naha:

—Cuāahan ndo ñuu tsa canyí ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndaṭsi ndo tsi ti, tan

quitsi ndaca ndo tsi ti naha ti tsi yu.

3 Tan tatun yóo tsicá tuhun tsi ndo:

“¿Náa cuú ndo tsi ti naha ti?”, tan catyí ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyí ndo tsihin ñi —catyí ra.

4 Tacan cuví tyin cundaa tsa cahan ra cuví ndusu yuhu Jutu Mañi yo tahañ tsanaha nu catyí ra tyehen:

5 Cahan ndo tsihin nyívi ñuu Sión:

“Nyehe ndo, vatsí rey ndo nu iyó ndo.

Ndaahvi ñi vatsí ra yosó ra iin urru luhlu, sehe iin quití tsa tuhvá nyisó carga”, catyí ra cuví ndusu yuhu Nyoo can.

6 Tacan tan cuahán ra tsicá tsihin ra Jesús, tan javahā ra naha tumaa tsa cahan ra tsihin ra naha. 7 Quitsi ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaā ra Jesús tsi ti. 8 Tan cuaha xaan nyívi tsaquín ñi jahma ñi nu ñuhu ityi nu cuahán ra, tan inga ñi tsahnyā ñi ndaha yutun tsaquín ñi tsitsi ityi. 9 Tan nyívi tsa cuahán ityi nuu tan ityi tsata, quitsahā caná tsa ñi tan catyí ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsi Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

10 Cuhva tsa tsaā ra Jesús ñuu Jerusalén can, tandíhi maa nyívi ñuu quitsahā cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

11 Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

**Nu tavaḡ ra Jesús tsi nyivi xicó  
tsitsi vehe ñuhu cahnu**

(Mr. 11:15-19; Lc. 19:45-48; Jn. 2:13-22)

12 Yahá can tan quihvḡ ra Jesús tsitsi vehe ñuhu cahnu Nyoo. Tan tavaḡ ra tsi tandihḡ nyivi jatá tan xicó ican. Tan janduvá ra mesa nu nasamá ñi xuhun. Tan janduvá ra tyayu nu xicó ñi paloma. 13 Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooho jananduvḡ ndo vehe ihya, vehe ñasuhu —catyí ra tsihin ñi.

14 Tan tsa tsitḡ juhva ra cuaa tan ra coxo naha ra tyin nyíi ra Jesús tsitsi vehe ñuhu cahnu, quihvḡ ra naha tan janduvahá ra Jesús tsi ra naha. 15 Tan nyeheḡ ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsiñḡ ra naha tyin caná tsa tsa nyihi tsitsi vehe ñuhu, tan catyí tsa nyihi can:

—¿Cahnu xaan cuví ra cuví tata ra rey David! —catyí tsi naha tsi.

Tacan tan cuxaḡn ra naha tsa tsiñḡ ra naha tsa caahán tsa nyihi can.

16 Tan catyí ra naha tsihin ra Jesús:

—¿A tsiñḡ un tsa caahán tsa nyihi can?

Tan nacahḡn ra Jesús tan catyí ra:

—Tsiñḡ yu. Maa tyin ¿a ñaha ca cahvi nyooho nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín sḡ xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

17 Tacan tan nacoḡ ra tsi ra naha, tan quitá ra ñuu can cuahán ra ñuu Betania. Tan ican ndoḡ ra tsacuaa can.

**Nu cahḡn ra Jesús tsi yutun higo  
tsa ña tsahá tsiti**

(Mr. 11:12-14, 20-26)

18 Tan tsa tuvi cuii ñi inga quivi can, vatsí nyico ra Jesús nda ñuu Jerusalén, tan tsaḡ soco tsi ra. 19 Tan nyeheḡ ra nyaá iin yutun higo yatyin ñi yuhu ityi can. Tan natuhvḡ ra nu nyaá tun, maa tyin nduve maa náa nañihḡ ra nuu tun. Maa ñi ndaha tun iñi. Tacan tan catyí ra tsihin tun:

—¿Ndi inga tsaha ña cua cuhva ca un tsiti!

Tan juvin ñi cuhva can na ityi tun. 20 Tan tsa nyeheḡ ra tsicá tsihin ra tsa javahá ra tsi tun, iyo xaan cuñí ra naha, tan tsicá tuhun ra naha tsi ra tan catyí ra naha:

—¿Nacuenda tsa numi xaan na ityi yutun higo can?

21 Tan nacahḡn ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahá yu tsihin yutun higo ihya ñi cuví javaha tucu nyooho, tyin cuví ndihḡ tucu catyí ndo tsihin yucu ihya: “Cuatsiyo ihya tan cuhun un nda tsitsi ndutya ñuhu.” Tan cua cuhun tsi. 22 Tan tandihḡ tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihḡ ndo —catyí ra Jesús.

**Nu tsicá tuhun ra cumí tyiñu vehe  
ñuhu naha ra tsi ra Jesús yóo tava  
tyiñu tsi ra tyin cahan ra tsihin nyivi**

(Mr. 11:27-33; Lc. 20:1-8)

23 Yahá can tan quihvḡ ra Jesús tsitsi vehe ñuhu cahnu, tan tsitsi tsa jacuahá ra ican, natuhvḡ ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicá tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

24-25 Tan nacahḡn ra Jesús tan

catyí ra:

—Yuhu tucu cuñí yu ndaca tuhun yu tsi nyooho. ¿Yóo jaquitsí tsi ra Juan tyin jacoondutya ra tsi nyívi? ¿A Nyoo jaquitsí tsi ra, o nyívi? Tatun catyí tuhun ndo tsihin yu, cua catyí tuhun tucu yuhu tsihin ndo yóo tava tyiñu tsi yu tsa javahá yu tyeheh —catyí ra Jesús tsihin ra naha.

Tacan tan ra ican naha ra quitsahá caahán yuhu tahan ra naha, tan catyí ra naha:

—Tatun catyí yo tyin Nyoo jaquitsí tsi ra Juan, cua catyí ra tsihin yo: “Tun tacan, ¿nacuenda ña tsinú iñi ndo tsi ra?” **26** Tan tatun catyí yo tyin nyívi jaquitsí tsi ra, yuuhví yo coto cuxaan nyívi tsi yo, tyin tandíhi ñi tsinú iñi ñi tyin ra Juan, cuenda Nyoo cahán ra —catyí ra naha.

**27** Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyí tuhun yu tsihin ndo yóo tava tyiñu tsi yu.

**Nu caahán ra Jesús iin cuhva cuenda uvi taahan sehe iin rayíi**

**28** Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayíi, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.” **29** Tan nacahán sehe ra tan catyí ra: “¡Ña cahun yu!” Maa tyin yahá can tan nasamá cuhva tsicá iñi ra tan tsahán ra tsijahá tyiñu ra. **30** Yahá can tan jutu ra cahán ra tsihin inga sehe ra. Tan catyí tucu ra tsihin ra na cahun ra cujaha tyiñu ra. Tan ra ican numi ñi quihín ra tyiñu tan catyí ra: “Vaha, tyaa, cahun maa yu.” Maa tyin ña tsahán ra. **31** Tsitsi tsa nduvi taahan ra can naha ra, ¿ndáa ra javahá tsa cahán jutu ra? —catyí ra Jesús.

Tan nacahán ra naha tan catyí ra naha:

—Ra tsa cahán ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyívi caquiñi tumaa ra tsa tava xuhun cuenda ra ndacá ñaha tan ñi sii iñi caca nuu, jihna ca ñi cua quihví nu ndacá ñaha Nyoo tan ñavin ca nyooho. **32** Tyin ra Juan, ra jacoondutya tsi nyívi, quitsí ra jacuahá ra tsi ndo nácaa taahán tsi coo cuiti ndo, tan nyooho ña tsinú iñi ndo tsi ra. Maa tyin ra tava xuhun naha ra tan ñi sii iñi caca nuu tsinú iñi ñi tsi ra. Tan nyooho vasu ndi maa nyehe ndo yacan, maa tyin ña nasamá ndo cuhva iyó ndo, tan ña tsinú iñi ndo tsi ra.

**Nu caahán ra Jesús tyin tumaa cuví juhva nu caquiñi nahnu, tacan cuví ra tsa cua cahñi tsi ra**

(Mr. 12:1-12; Lc. 20:9-19)

**33** Tyaa soho ndo inga cuhva ihya: Tsicoo iin rayíi, tan iyó ñuhu ra. Tan tatsí ra yoho yucu vixi tsa nañi uvas, tan tyihí ra cora. Tan javahá ra iin nu cua tava ra ndutya uvas can. Tan javahá tucu ra iin vehe sucun tyin cuví jaha cuenda ra tandíhi.

Yahá can tan tsahá nuu ra ñuhu can tsi juhva ra cua jaha tyiñu naha ra, tan cuahán ra inga ñuu. **34** Tan tsa tsaá quívi tsa iyó uvas can, jacuhún ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahán tsi tsi ra. **35** Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra. **36** Tacan tan tsa inga tsaha, cuaha ca musu jacuhún tsitoho cora can tan ñavin ca tsa jihna ñi. Maa tyin tumaa tsa javahá ra naha tsihin ra tsa tsahán jihna naha ra, tacan ñi javahá nyico

ra naha tsihin ra ihya naha ra.

37 Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra.

38 Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihi tsa iyó ihya. Na cahni yo tsi ra tan ndoo maa yo tsihin cora ihya”, catyí ra naha.

39 Tacan tan tñin ra naha tsi ra, tan tava ra naha tsi ra ityi tsata cora can, tan tsahñi ra naha tsi ra —catyí ra Jesús.

40 Tacan tan tsicá tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

41 Tan nacahan ra naha tan catyí ra naha:

—Ña cua cuatu ra, tyin cua cahni ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quivi coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.

42 Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tyeheh?

Yuu tsa javitá ihñi ra javahá vehe,

Yacan cuví yuu tsa ñiñi ca.

Jutu yo Nyoo cuví ra tsa javahá tandihi can.

Tan iyo xaan cuñi yo nyehé yo, catyí tsi.

43 Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahá cuhva cuñi ra tyin nditsa tsahá ñi tsi ñi cundaca ñaha ra. 44 Tan tsa cuenda yuu can, yoo nyivi tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yoo nyivi, cua taxin nyihí ñi —catyí ra Jesús.

45 Cuhva tsa tuví ñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahán ra Jesús cuhva ihya, 46 cuñi ra naha tñin ra naha tsi ra, maa tyin yuuhví ra naha tsi nyivi tyin tsinú ñi ñi tyin ra Jesús caahán ra cuenda Nyoo.

Nu cahán ra Jesús iin cuhva cuenda vico tindaha

(Lc. 14:15-24)

**22** <sup>1</sup> Quitsahá caahán ra Jesús tsihin nyivi inga tsaha tsihin cuhva, tan catyí ra:

<sup>2</sup> —Tsa ndacá ñaha Nyoo tsi nyivi cuví tsi tumaa iin rey tsa javahá iin vico tsa cuenda tsa cua tindaha sehe ra. <sup>3</sup> Tan jacuhun ra tsi musu ra na cucana ra naha tsi nyivi tsa jacoto ra tyin cuhun ñi, maa tyin ñi ican, ña cuñi ñi cuhun ñi. <sup>4</sup> Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihi. Yacan na quitsi ñi”, catyí ra. <sup>5</sup> Maa tyin ñi ican ña tyaa yahvi ñi tsa cahán ra. Iin ra tsahan ra nu iyó cora ra, inga ra tsahan ra nu jahá tyiñu ra. <sup>6</sup> Tan inga ra naha tñin ra naha tsi musu rey can naha ra tan cañi xaan ra naha tsi ra naha nda cuanda tsahñi ra naha tsi ra naha. <sup>7</sup> Tacan tan ra rey can cuxaan xaan ra, tan jacuhun ra tsi andaru ra na cucahni ra naha tsi ra tsa tsahñi tsi musu can naha ra, tan cahmi ra naha ñuu ra naha. <sup>8</sup> Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi caná yu, ña taahán tsi tsa quitsi ñi. <sup>9</sup> Cuaahan ndo ityi cahnu tan çana ndo tsi tandihí nyivi tsa nañihí ndo na quitsi ñi vico tindaha”, catyí ra rey can. <sup>10</sup> Musu can cuahán ra naha tandihí ñi ityi, tan jandú iin ra naha tsi tandihí nyivi nañihí ra

naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

11 Tacan tan quihvi ra rey can cua nyehe ra tsi tandihi nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsí. 12 Tan catyí ra rey tsihin ra: “Tsaa, ¿nacuenda nyii un ihya tan nduve jahma vico tindaha nditsi un?” Tan ña nacahan maa ra can. 13 Tacan tan catyí ra rey can tsihin ra tyihí mesa can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra. 14 Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

**Nu caahán ra Jesús tsa cuenda tsa tyahví nyivi xuhun tsi ra ndacá ñaha nda ñuu Roma**

(Mr. 12:13-17; Lc. 20:20-26)

15 Tacan tan cuahán ra fariseo naha ra tan ndoq ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra. 16 Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñi un nyehe un tsi nyivi cuca tan nyivi ndaahvi. 17 ¿Nacaa tsicá tucu iñi yooho: A vaha tyahví yo tsa tsicán ra ndacá ñaha nda ñuu Roma, o ña vaha?

18 Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsí yu? 19 Janaha jihna ndo iin xuhun tsa tuhvá yo

tyahví tsi ra ndacá ñaha tsi yu —catyí ra.

Tan tsindacá ra naha iin xuhun tsa nañi denario tsi ra. 20 Tan tsa nyehe ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

21 Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

22 Tsa tsiñi ra naha tsa cahán ra Jesús, iyo xaan cuñi ra naha. Tan cuahán ra naha.

**Nu cuñi ra cuví saduceo naha ra jandavi ñaha ra naha tsi ra Jesús**

(Mr. 12:18-27; Lc. 20:27-40)

23 Juvín ñi quivi can juhva ra cuví saduceo naha ra tsahan ra naha nu nyii ra Jesús. Tan ra cuví saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan cuenda tsicá tuhun ra naha tsi ra Jesús, tan catyí ra naha:

24 —Maestro, ra Moisés catyí ra tyin tatun iin ra tindaha tan tsihi ra tan ña tsicoq sehe ra, taahán tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi. 25 Vaha. Tun iin ra tan iyó utsa sehe yii ra, tan ra tsa jihna ñi tindaha ra. Tan nduve sehe ra tsicoq tsihin ñasihi ra tan tsihi ra. Ndoq ñasihi ra tsi yañi ra tsa tsinu uvi. 26 Tan juvin ñi tsihi ndihi ra can. Tan ndoq ñaha can tsihin ra tsa tsinu uñi, maa tyin juvin ñi tacan tahan ndihi ra. Tan inducu ñi tahan tandihi tsa utsa ra naha. 27 Tan nu ndihi ña tsihi ndihi maa ñaha can. 28 Tatun nditsa tsa cua nandoto nyivi tsihi, ¿ndáa tsa utsa taahan ra can naha ra cua cuvi

yii ña? Tyin tandihí maa ra naha tindaha tsihin ña —catyí ra naha.

29 Tan nacahan ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo. 30 Tyin quivi cua nandoto nyivi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuví ñi tumaa cuví ángel tsa iyó gloria.

31 Tyin tuhun Nyoo tsahá cuenda tsi nácaa cuví tuhun tsa cua nandoto nyivi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

32“Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añaima ra can naha ra, vasu tsanaha tsihi ra naha. Tyin Nyoo ñavin Nyoo cuenda nyivi tsihi cuví ra, tyin Nyoo cuví ra Nyoo cuenda nyivi nyito —catyí ra.

33 Tan tsa tsiñi nyivi tsa caahán ra Jesús, iyo xaan cuñi ñi.

#### Ley tsa ñiñi ca tsa tsaha Nyoo

(Mr. 12:28-34)

34 Tsa tsitó ra fariseo naha ra tyin ra Jesús tyasi ra yuhu ra saduceo naha ra, ndu iin ra naha. 35 Tan iin ra tsa nyii tsihin ra naha cuví ra maestro cuenda ley vehe ñuhu tan cuñi ra nducu cuhva ra tsi ra Jesús. Tan tsica tuhun ra tsi ra, tan catyí ra:

36 —Maestro, ¿ndáa ley cuví tsa ñiñi ca?

37 Tan catyí ra Jesús tsihin ra:

—“Cuñi tsi Jutu Mañi yo Nyoo tsihin tsa ñi iñi un tan tsihin tsa ñi iñi añaima un, tan tsihin tandihí tsa tsiñi tuñi jiñi un.” 38 Ley ihya cuví tsa ñiñi ca, tan tsa jihna ñi taahán tsi javaha yo. 39 Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi

tyehen: “Cuñi tsi nyivi tahan un tumaa cuñi un tsi maa un.” 40 Tatun tyaá yahvi ndo nduvi taahan ley ihya, tsa tyaá yahvi ndihí ndo tandihí ca ley tsa tyaá ra Moisés jahá Nyoo, tan tandihí tuhun tsa jacuahá ra cuví ndusu yuhu Nyoo tahan tsanaha.

#### Ra Cristo cuví ra Sehe Nyoo tan juvin ñi cuví ra tata ra David

(Mr. 12:35-37; Lc. 20:41-44)

41 Tsitsi tsa ndi yucú ra fariseo naha ra nu ndu iin ra naha, 42 ra Jesús tsica tuhun ra tsi ra naha, tan catyí ra:

—¿Nacaa tsicá iñi nyooho cuenda ra cuví Cristo? ¿Yóo tata cuví ra, cuñi maa ndo?

Tan nacahan ra naha tan catyí ra naha:

—Tata ra David cuví ra.

43 Tacan tan ra Jesús catyí ra tsihin ra naha:

—Tun tacan, ¿nacuenta jacahan Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

44 Nyoo cahan tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

45 ¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

46 Tan yoñi maa cuví nacahan nu cahan ra ndi intuhun maa tuhun. Tan nda quivi can, yoñi ca maa cuñi nducu tuhun tsi ra.

Nu caahán ra Jesús tyin cuaha xaan cuatyí ra maestro cuenda ley vehe ñuhu naha ra tan ra fariseo naha ra (Mr. 12:38-40; Lc. 11:37-54; 20:45-47)

**23** 1 Tacan tan ra Jesús catyí ra tsihin tandihí nyivi, tan tsihin ra tsicá tsihin ra:

2 —Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaá ra Moisés. 3 Yacan cuenda tyaá yahvi ndo tsa caahán ra naha tan javaha ndo tandihí cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha.

4 Janducuahá ca ra naha ley tsa tsaha Nyoo tahan tsanaha. Tan cuñí ra naha tsa javaha nyivi tandihí can. Maa tyin ña cunyeer ñi javahá ñi tandihí can, tan ndí maa ra naha tan ña cuñí ra naha javaha ra naha can. 5 Tyin maa ra naha tyaá ra naha caja ñii nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsí ra naha jahma nañi ca tan ñavin ca tsa iyó tsi inga ca nyivi.

Javahá ra naha tandihí can tyin na nyehe nyivi tyin vaha xaan ca ra naha. 6 Tan nu vaha ca, cuñí ra naha cunyecú ra naha nu iyó vico tan catsi ra naha. Tan nu vaha ca cuñí ra naha cunyecú ra naha tsitsi vehe ñuhu.

7 Tan nu tsicá nuu ra naha cuñí ra naha tyin cuhva nyivi nacumi tsi ra naha tyin jahá ñi tsa ñayivi tsi ra naha. Tan cuñí tucu ra naha tsa catyi ñi “maestro” tsihin ra naha.

8 Maa tyin nyoocho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyí tsihin ndo, tan tandihí ca maa ra naha yañi ndo cuví tsi ra naha. 9 Tan ña cahan ndo Jutu ndo tsihin ndí intuhun rayii ñuu ñayivi ihya, tyin intuhun ñi ra nyaá gloria cuví Jutu ndo. 10 Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo. 11 Ra tsa jahá tyiñu tyiñu tandihí ca ra naha, ra ican cuví ra cahnu ca nu yucú ndo. 12 Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi

ra cua nducahnu ra jaha Nyoo.

13 'iNdahvi nyoocho ra cuví maestro cuenda ley vehe ñuhu tan nyoocho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuvi quihvi nyivi. Tan ndí maa ndo ña quihvi ndo, tan ndí ña tsahá ndo tsa quihvi nyivi tsa cuñí quihvi.

14 'iNdahvi nyoocho ra cuví maestro cuenda ley tan nyoocho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyí tyin quihín nyaa ndo vehe ñi ndaahvi tsa tsihi yii tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

15 'iNdahvi nyoocho ra maestro cuenda ley vehe ñuhu tan nyoocho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayivi tyin cuñí ndo nañihi ndo vasu intuhun nyivi cunyecun tsi ndo. Tatun tsa quihvi ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cuhun ñi anyaya tsihin ndo.

16 'iNdahvi nyoocho ra ndaahvi! Tyin cuñí ndo jaquihin ityi ndo tsi nyivi, ¡maa tyin cuaa ndo! Caahán ndo tyin yóo nyivi cua cahan “Naha Nyoo” tsa cuenda vehe ñuhu, nduve ñi náa cua cuvi tsi ñi tun ña tyaá yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo. 17 ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu í tsi xuhun cuaan can? 18 Tan juvin ñi catyí tucu ndo tyin yóo nyivi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuvi tsi ñi tun ña tyaá yahvi ñi



tsa cahan ñi. Maa tyin tun cua cahan ñi “Naha Nyoo” tsa cuenda tsa jamañi ñi nu altar, tacan tan taahán tsi javaha ñi tsa cahan ñi, catyí ndo. **19** ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañi ndo nu altar can, o maa altar tsa jandu íi tsa jamañi ndo? **20** Tyin nyívi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndíhi ñi tsa cuenda tandíhi tsa yosó nu altar can. **21** Tan nyívi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican. **22** Tan tacan tucu nyívi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan. **23** ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaá yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandíhi nyívi, tsa cundaahvi íni yo tsi ñi, tsa tsinú íni yo tsi Nyoo tan ña nacoo yo tsi ra. Cuñí tsi javaha ndo tandíhi can, tan ña cua jandíhi ndo tsa kuhva ndo diezmo can. **24** Nyooho ra cuaa, cuñí ndo jaquihin ityi ndo tsi nyívi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyíhi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu. **25** ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan

coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá íni ndo tsa coo cuaha ndaha tyiñu ndo. **26** ¡Nyooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndíhi ityi tsata. **27** ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandíhi nuu tsa caquiñi. **28** Tacan cuví nyooho, tyin cuñí nyívi tyin vaha xaan íni ndo, maa tyin añima ndo ican quitá tsa jandaví ñaha ndo tan tandíhi tsa caquiñi ndo. **29** ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyacuí ndo ñaña ra cuví ndusu yuhu Nyoo, tan nacahyi ndo ñaña nyívi vaha tsicoo tahán tsanaha. **30** Tacan tan catyí ndo: “Tun tsatyin tsicoo yo quívi tsicoo tsi tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyí ndo. **31** ¡Tsihin yacan ñi tan nacotó ndo tyin cuví ndo tata nyívi tsahñi tsi ra cuví ndusu yuhu Nyoo! **32** ¡Yacan vityin nyehe maa ndo na jaha ndo, javaha ndíhi ndo tsa javaha tsi tsaahnu ndo, tun cuñí ndo! **33** ¡Nyooho nyívi caquiñi cuví ndo, tan nyívi cuví tata coo! ¿Nacaa cua cacu ndo tan ña cua cahun ndo anyaya? Ña cua cuví. **34** Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha

nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu. **35** Yacan cuenda, tsata nyooho cua cunyaa cuatyí tsa cuenda tandihi ra vaha tsa tsahñi tsi tsaahnu ndo nda cuanda tsihi ra Abel tan nda cuanda quivi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo. **36** Tsa nditsa catyí yu tsihin ndo, tyin tandihi cuatyí can cua coso siqui nyooho, nyivi tsa iyó vityin —catyí ra Jesús tsihin ra naha.

**Nu nducuihya cuñi ra Jesús nyehé ra tsi nyivi ñuu Jerusalén**

(Lc. 13:34-35)

**37** ¡Ñuu Jerusalén! ¡Ndahvi nyooho nyivi ñuu Jerusalén! Tyin tsahñi ndo tsi ra cuvi ndusu yuhu Nyoo. Tan cañi ndo yuu tsi tandihi ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndivi sihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo. **38** Nyehe ndo vityin, tyin tsa nacoq ihñi Nyoo tsi ndo. **39** Tan catyí yu tsihin ndo, tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan cuvi ra vatsi tsihin sivi Nyoo Jutu yo —catyí ra Jesús.

**Nu caahán ra Jesús tyin cua tani vehe ñuhu cahnu**

(Mr. 13:1-2; Lc. 21:5-6)

**24** <sup>1</sup> Quita ra Jesús tsitsi vehe ñuhu cahnu can, tan tsa cuñi cahun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra. <sup>2</sup> Maa tyin nacahan ra Jesús tan catyí ra:

—¿A nyehé ndo tandihi tsa iyó ihya? Tsa nditsa catyí yu tsihin ndo, tyin ihya ndi intuhun ca yuu tan ña

cua coso tsata inga tsi. Tandihí maa can tan cua tani —catyí ra.

**Nu caahán ra Jesús náa cua cuvi tsa ndi cumañi ca naa ñuhu ñayivi**

(Mr. 13:3-23; Lc. 21:7-24; 17:22-24)

**3** Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahan ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñi ndi tsa catyí tuhun un tsihin ndi, ama cua cuvi tandihi tsa cahán un. ¿Naca tan coto ndi tatun tsa cuyatyin tsa cua quitsi un inga tsaha tan tsa cua naa ñuhu ñayivi?

**4** Tacan tan nacahan ra Jesús:

—Jaha vaha ndo cuenda coto jandavi ñaha nyivi tsi ndo. **5** Tyin cuaha xaan ra cua quitsi, tan cua cutyiñu ra naha sivi yu, tan cua catyí ra naha: “Yuhu cuvi ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha. **6** Tan cua ñihi tuhun ndo tyin iyó cuatyí tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi. **7** Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi. **8** Tandihí yacan cua cuvi nu ndi cua quitsaha nyehe nyivi tundoho.

**9** Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihi nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu. **10** Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi. **11** Tan cuaha xaan ra caahán cuendu cua coo, tan cua catyí ra naha tyin cuenda Nyoo caahán ra naha.

Tan cuaha xaan nyivi cua jandavi ñaha ra naha. **12** Tan cuaha xaan tsa caquiñi cua coo. Yacan cuenda cua jandihí ñi tsa cuñi tahan ñi tsi ñi.

**13** Maa tyin nyivi tsa tsinú iñi tsi yu nda cuanda nu ndihí, tan ña cua ndu uvi iñi ñi, cua cacu ñi. **14** Tan tanñi cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihí ñuu tuhun vaha ihya, tacan tan cua naa ñayivi.

**15** 'Ra Daniel, ra cuví ndusu yuhu Nyoo, tyaá ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu Ii, (nyooho tsa cahví, na cutuñi iñi ndo). **16** Tyin quivi can, nyivi tsa iyó Judea taahán tsi tsa quita ñi ican tan cuhun ñi ityi yucu. **17** Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi. **18** Tan nyivi yucú tsitsi cuhu ña cua cunuhu jihna ñi cunaquihin ñi jahma ñi. **19** ¡Ndahvi ñiñaha tsa ñuhu sehe quivi can! O tatun iyó sehe ñi tsa tyaxín, ¡ndahvi ñi can! **20** Ndacan ndo tsi Nyoo na ña tahan tsi cunu ndo quivi vitsin, tan ndi quivi quitatú yo. **21** Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha. **22** Tyin tatun ña cua janducuiti Nyoo quivi can, yoñi maa cua cacu. Maa tyin cua janducuiti ra tsa cuenda tsa cuñi ra tsi nyivi nacatsi maa ra.

**23** 'Tatun yóo cua cahan tsihin ndo: "Jihna ndo, ihya nyaá ra Cristo" o "Nyehe ndo, ndacan nyaá ra Cristo", ña tsinu iñi ndo. **24** Tyin cua quitsi ra jandavi ñaha naha ra tan cua catyi ra naha tyin ra Cristo cuví ra naha. Cua catyi ra naha tyin ndusu yuhu Nyoo cuví ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda

cuanda nyivi tsa nacatsi maa Nyoo tun tsatyin cuvi jaha ra naha.

**25** Vaha tyin tsa tsitó ndo vityin ihya, jaha ndo cuenda tsi ndo quivi can.

**26** Yacan cuenda tatun catyi nyivi tsihin ndo: "Nyehe ndo, va ra Cristo nyii nu tsiqui can", Ña cuhun ndo. O tatun catyi ñi tsihin ndo: "Nyehe ndo, nyii ra tsitsi cuarto ihya", ña tsinu iñi ndo. **27** Tyin tumaa tsa cañi tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayii tsa quee nda gloria.

**28** Tumaa natacá nditsii nu cayucú tsa iñi, tacan cua nataca nyivi yihí cuenda yu quivi quitsi yu inga tsaha.

**Nacaa cua quitsi Rayii tsa quee nda gloria inga tsaha**

(Mr. 13:24-37; Lc. 21:25-33; 17:26-30, 34-36)

**29** 'Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihí tsa iyó andivi cua nacanda.

**30** Tacan tan cua quituvi seña ityi andivi tyin vatsi yuhu Rayii tsa quee nda gloria. Cua quitsi yu nu vico ityi andivi tsihin tunyee iñi cahnu tan tsihin tsa cahnu cuví Nyoo. Tan tandihí nyivi iyó nu ñuhu ñayivi, cua vacu tsaa xaan ñi tsa cua nyehe ñi tsi yu. **31** Tan cuaha ángel cuenda yu cua jaquitsi yu tyin ñihi cua tiví ra naha cutu tan cua jandu iin ra naha tsi nyivi nacatsi maa Nyoo. Cua quita ñi tanñi cahnu nu ñuhu ñayivi, nda cuanda nu ndihí ñuhu ñayivi tan nda cuanda nu ndihí andivi.

**32** 'Cutuñi iñi ndo iin cuhva yutun tsa nañi higo: Tatun tsa yutya soco tun, tan tsa caná ndaha yutya tun, nyooho tsitó ndo tyin tsa cua coo tsiti tun. **33** Tan juvin ñi tacan, tatun tsa cuví tandihí yacan nyehé ndo, cua coto ndo tyin tsa cuyatyn quitsi yu; tan tsa nyanaá yu yuvehe cuví tsi.

34 Tsa nditsa catyí yu tsihin ndo tyin tandihí yacan cua cuvi jihna, tsa ndi cumañi ca cúu nyívi iyó nu ñuhu ñayívi. 35 Tan coo quívi cua cunaa andívi tan tsihin ñuhu ñayívi, maa tyin tuhun caahán yuhu, ña cua cundihí tsi tyin cua cundaa tandihí tsi.

36 'Maa tyin quívi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

37 'Tumaa cuví quívi tsa tsicoo ra Noé, tacan cua cuví quívi tsa cua quítsi nyico yuhu Rayíi tsa quee nda gloria. 38 Quívi tsa ndi cumañi ca cuun savi xaan, nyívi can, tsatsí ñi, tsihí ñi, tindahá ñi, tan tsahá ñi tsi sehe sihi ñi tindaha nda cuanda quívi quihví ra Noé tsitsi yutun ndoo. 39 Tan sana iñi ñi tan tsaa savi tan tañi tandihí ñi. Tan tacan sana iñi ñi tan cua tahan tsi quívi quítsi nyico yuhu Rayíi tsa quee nda gloria.

40 Tan tatun yucú uvi taahan rayíi tsitsi cuhu quívi can, intuhun ñi ra cua quihin yu, tan cua nacoo yu tsi inga ra. 41 Tan quívi can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña. 42 Cuatu vaha ndo tyin ña tsitó ndo náa hora cua quítsi ra ndacá ñaha tsi ndo. 43 Tan coto ndo tuhun ihya tyin tatun iin tsitoho vehe tan tsitó ra náa cuhva cua quihví ñasuhu tsitsi vehe ra, cua cuatu vaha ra tan ña cua cuhva ra tsa quihví ñasuhu can. 44 Yacan cuenda nyoocho, cuatu vaha ndo. Tyin sana iñi ndo, tan cua quítsi nyico yuhu Rayíi tsa quee nda gloria.

#### Musu vaha tan musu ña vaha

(Lc. 12:41-48)

45 'Musu tsa tyaá soho tsa caahán tsitoho ra, juven ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihí ca musu. 46 Tan sii xaan cuíi

ra cuví musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihí tsa taahán tsi ica ra. 47 Tan tsa nditsa catyí yu tsihin ndo, tyin tsitoho ra cua nacuhva ra tandihí cui tsa cumí ra, cua quihí ndaha ra, tyin vaha tyaá yahvi ra tsihin tyiñu jahá ra. 48 Maa tyin iin musu ña vaha tsicá iñi ra tyin cua cucuee tsitoho ra. 49 Tacan tan quítsaha cañi ra tsi inga musu, tan tsatsí ra tan tsihí ra nyixi tsihin ra tsiñi naha ra. 50 Tacan tan sana iñi ra tan cua tsa tsitoho ra quívi tsa ña ndatú ra tsi ra, tan hora tsa ña tsitó ra. 51 Tacan tan tsitoho ra ñihli xaan cua tatsi tuñi ra tsi ra tumaa tuhvá maa ra icá tsihin nyívi tsa jahá tyin vaha xaan ñi tan ña icá ñi tsa vaha. Tacan tan cua vacu ra cuví musu ña vaha can tan cahyu ña cua cuvi nuhu ra tsa nyehé ra tundoho.

#### Nu cahán ra Jesús iin cuhva cuenda utsi taahan ñaha yoco

25 <sup>1</sup> 'Tsa ndacá ñaha Nyoo tsi nyívi cuví tsi tumaa utsi taahan ñaha yoco tsa quihin lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha. <sup>2</sup> Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi. <sup>3</sup> Ñi tsa soho ñuhú iñi can, nyisó ñi lámpara ñi maa tyin ña quihin ñi juhva ca acetye tsa natyihi ñi tsitsi lámpara ñi tatun ndihí tsi. <sup>4</sup> Tan ñi tsa catsi tsicá iñi can, nyisó siñ ñi inga yutyi acetye tsa cua natyihi ñi tsitsi lámpara can tatun ndihí acetye tsa yihí tsitsi lámpara can. <sup>5</sup> Tan ra tsa cua tindaha can cucueé xaan ra, tacan tan tiñi ñumaahna tsi tandihí ñi, tan quixi ñi. <sup>6</sup> Tacan tan maa ñuu tsiñi ñi iin ndusu tsa catyí tyehen: "¡Tsa vatsí ra tsa cua tindaha! ¡Quita ndo, jatahan ndo tsi ra!" <sup>7</sup> Tandihí ñi can nduvita ñi tan quítsaha janduvahá ñi lámpara ñi. <sup>8</sup> Tacan tan

quitsahā caahán tsa uhun ñi soho ñuhú iñi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñi ndahva lámpara ndi”, catyí ñi. <sup>9</sup> Maa tyin ñi yoco tsa catsi tsicá iñi can nacahan ñi tyehen: “Ña cua kuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca cuhun maa ndo cujata ndo nu cuyahví tsi.” <sup>10</sup> Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaa ra tsa cua tindaha can. Tan ñi yoco tsa ndatú vaha can, quihví ñi tsihin ra tsitsi vehe nu cua coo vico tindaha. Tan tsicundasí yuvehe can. <sup>11</sup> Yahā can tan tsaa nyico ñi soho ñuhú iñi can, tan catyí ñi: “¡Yooho tata! ¡Nuña yuvehe na quihví ndi!”, catyí ñi. <sup>12</sup> Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

<sup>13</sup> Tacan tan quitsahā caahán ra Jesús:

—Cyatú vaha ndo, tyin ña tsitó ndo ndáa quiví tan náa hora cua quitsi nyico yuhu Rayí tsa quee nda gloria.

**Nu caahán ra Jesús tsihin yo na jaha tyiñu yo tsihin tsa tsahā Nyoo tsi yo**

(Lc. 19:11-27)

<sup>14</sup> Tsa ndacá ñaha Nyoo tsi nyivi cuví tsi tumaa iin rayí tsa nyaá cua quita cuhun inga ñuu nu cañi. Tan canā ra tsi musu ra, tan tsahā cuenda ra xuhun ra tsi ra naha tyin jaha cuenda ra naha.

<sup>15</sup> Iin ra tsahā ra uhun mil xuhun, tan inga ra tsahā ra uvi mil xuhun, tan inga ra tsahā ra iin mil. Tsahā ra tsi intuhun intuhun ra náca cuhva tsitó ra jaha tyiñu ra naha tan cua nandaa síqui xuhun can. Tacan tan cuahán ra. <sup>16</sup> Musu tsa quihín uhun mil xuhun can, ñihi jahā tyiñu ra tsihin xuhun can, tan jahā canaa ra inga uhun mil ca síqui tsi. <sup>17</sup> Tan

juvin ñi tacan tucu ra tsa quihín uvi mil can, jahā canaa ra uvi mil ca tsihin xuhun can. <sup>18</sup> Maa tyin ra tsa quihín intuhun ñi mil can, tsahan ra tan tsatyā ra iin yavi tsitsi ñuhu tan tyihí xeehe ra xuhun tsitoho ra.

<sup>19</sup> Cuaha quiví yahā tan tsaa nyico tsitoho musu can. Tan quitsahā natavá cuenda ra tsihin intuhun intuhun ra naha. <sup>20</sup> Jihna ca ra tsa quihín uhun mil xuhun can tsaa, tan nacuhvā cuenda ra uhun mil ca síqui can, tan catyí ra: “Taa, uhun mil tsahā un tsi yu, juhun inga uhun mil ihya tsa jahā canaa yu síqui tsi.”

<sup>21</sup> Tan tsitoho ra catyí ra tsihin ra: “Vaha. Iin musu vaha xaan cuví un. Tan javahā un tandíhi tsa cahān yu tsihin un. Luxu ñi xuhun tsahā yu tsi un tan vaha xaan tsatyíñu un itsi. Vityin cuaha ca cua kuhva cuenda yu tsi un. Quihví nu vaha ihya, tan síi cuñi un tsihin yu.” <sup>22</sup> Yahā can tan tsaa musu tsa quihín uvi mil xuhun can, tan catyí ra: “Taa, uvi mil ñi tsahā un tsi yu, juhun uvi mil ca ihya tsa jahā canaa yu síqui tsi.” <sup>23</sup> Tan catyí tsitoho ra tsihin ra: “Vaha. Iin musu vaha xaan cuví un, tan javahā un tandíhi tsa cahān yu tsihin un. Luxu ñi xuhun tsahā yu tsi un tan vaha xaan tsatyíñu un itsi. Vityin cuaha ca cua kuhva cuenda yu tsi un. Quihví nu vaha ihya, tan síi cuñi un tsihin yu”, catyí ra. <sup>24</sup> Tan kuhva tsa tsaa musu tsa quihín intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñi un naquihín un xuhun nu ña jahá tyiñu un, tan cuñi un naquihin un cosecha nu ña tatsí un. <sup>25</sup> Yacan cuenda nayuhví yu tan tsahan yu tan tyihí xeehe yu xuhun un tsitsi ñuhu. Juhun xuhun ihya tsa tsahā un tsi yu”, catyí ra. <sup>26</sup> Tacan tan nacahan tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsitó un tyin naquihín yu nu ña jahā tyiñu yu, tan

quihín yu cosecha nu ña tatsí yu, 27 ¿nácaa tyin ña tsityihí un xuhun yu nu banco? Tun tsatyin tacan javahá un, tsa cua quitsi nyico yu cuvi naquihin yu xuhun can tsihin xuhun síqui tsa jahá canaa tsi”, catyí ra. 28 Tacan tan quitsahá caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cūhva ndo tsi ra tsa ndahá utsi mil. 29 Tyin nyívi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyívi tsa ña cuñí jaha tyiñu tsihin tsa tsahá yu, nda cuanda tsa luxu tsa cumí ñi, cua quihin nyaa ndíhi yu. 30 Tan musu tsa ña tsiñí ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsaa ra, tan cahyu ña cua cuvi nuhu ra tsihin tsa nyehé ra tundoho.”

**Nu cahán ra Jesús tyin cua cutuñi tandíhi nyívi**

31 'Quívi cua quitsi nyico yuhu Rayíi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu síi caá tan cua cundaca ñaha yu. 32 Tandíhi cuii nyívi iyó naníi cahnu nu ñuhu ñayívi cua nataca ñi nuu yu. Tan cua natava síin yu tsi intuhun intuhun ñi, tumaa ra jahá cuenda mbee tavá síin ra tsi mbee ticatyí tan tavá síin tucu ra tsi mbee chivo. 33 Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu. 34 Tacan tan yuhu tsa cuví yu Rey cua catyí yu tsihin nyívi nyecú tsiyo cuaha yu: “Ñaha nyooho nyívi tsa nasoco Jutu yu. Na quihin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahá ra ihya quívi javahá ra ñuhu ñayívi. 35 Tyin quívi tsisoco yu, nyooho tsahá ndo tsa tsatsí yu. Quívi na ityi íñi yu, tsahá ndo ndutya tsihí yu. Tan quívi tsicá nuu yu cuví

yu ra inga ñuu, tsahá ndo nu quixí yu. 36 Quívi cumañí jahma yu, tsahá ndo jahma tsinditsí yu. Quívi cuhví yu, tsinyehé ndo nu canyí yu. Tan quívi tsinyí yu vehe caa, tsinyehé ndo nu nyí yu”. Tacan cua cahan yu tsihin ñi. 37 Tan ñi tsa vaha íñi can cua ndaca tuhun ñi tsi yu, tan catyí ñi: “Jutu Mañi yu, ¿ama nyehé ndi tsisoco un, tan tsahá ndi tsa tsatsí un? ¿Ama nyehé ndi na ityi íñi un tan tsahá ndi tsa tsihí un? 38 ¿Ama nyehé ndi tsi un tsicá nuu un cuví un ra inga ñuu tan tsahá ndi vehe nu quixí un? ¿Ama cumañí jahma un, tan tsahá ndi jahma tsinditsí un? 39 ¿Ama nyehé ndi cuhví un, o tsinyí un vehe caa, tan tsahán ndi tsinyehé ndi tsi un?” cua catyí ñi. 40 Tan yuhu tsa cuví Rey cua catyí yu tsihin ñi: “Tsa nditsa catyí yu tsihin ndo, tyin tandíhi tumañi íñi tsa javahá ndo tsi ra ndaahvi, ra yañi yu, tsi yuhu javahá ndo tumañi íñi”, cua catyí yu tsihin ñi.

41 'Tacan tan yuhu tsa cuví Rey cua cahan yu tsihin nyívi tsa yucú tsiyo satyin yu tyehen: “Catsiyo ndo nuu yu, nyooho, nyívi taahán tsi cuhun anyaya. Cuaahan ndo nu ñuhu tsa ña cua ndahva maa. Tsinu anyaya can tyin ican cua coo nu ña vaha tan tatyí ña vaha cuenda nu. 42 Tyin tsisoco yu tan nyooho ña tsahá ndo tsa catsi yu. Na ityi íñi yu tan ña tsahá ndo ndutya coho yu. 43 Tsicá nuu yu cuví yu iin ra inga ñuu, tan ña tsahá ndo nu cusu yu. Cumañí jahma yu tan ña tsahá ndo jahma cunditsi yu. Nacuhví yu tan tsinyí yu vehe caa, maa tyin ña tsahán ndo tsinyehé ndo tsi yu nu tsinyí yu”, cua catyí yu tsihin ñi. 44 Tacan tan cua catyí ñi tsihin yu: “Jutu Mañi yu, ¿ama nyehé ndi tsisoco un, o na ityi íñi un, o tsicá nuu un cuví un ra inga ñuu, o nduve jahma un, o nacuhví un, o tsinyí un vehe caa, tan ña jatyinyee ndi tsi un?” cua catyí ñi. 45 Tan yuhu tsa cuví yu Rey cua catyí

yu tsihin ñi: “Tsa nditsa caahán yu tsihin ndo tyin tandihí maa tsa ña javahá ndo tsihin nyívi ndaahvi ihya, ña javahá ndihí ndo tsihin yu, cuví can”, cua catyi yu tsihin ñi. **46** Tacan tan ñi can cua cuhun ñi nu cayú ñuhú tsa ña cua ndahva maa. Tan nyívi vaha can cua cuhun ñi coo ñi ñayívi nyito tsa ña cua naa maa.

**Nu nducú ra mandoñi naha ra cuhva nácaa tan tñin ra naha tsi ra Jesús**

(Mr. 14:1-2; Lc. 22:1-2; Jn. 11:45-53)

**26** <sup>1</sup> Cuhva tsa ndihí cahán ra Jesús tandihí tuhun can, tan quitsahá catyí ra tsihin ra tsicá tsihin ra:

<sup>2</sup> —Nyooho tsitó ndo tyin ndi cumañi uvi ca quívi tan tahan tsi vico pascua. Tan yuhu, Rayíi tsa quee nda gloria, cua cuhva cuenda nyívi tsi yu na tyaa ra cumi tyiñu tsi yu nu cruu —catyí ra.

<sup>3</sup> Quívi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu ijin ra naha nuquehe vehe tyiñu ra Caifás, ra jutu tsaahnu tsa cuví ityi nuu. <sup>4</sup> Tan jandaá ra naha tyiñu nácaa cua jandavi ñaha ra naha tsi ra Jesús tan tñin ra naha tsi ra tan cahñi ra naha tsi ra. <sup>5</sup> Tan catyí ra naha:

—Ña cua cahñi yo tsi ra quívi maa vico, coto nduvaa xaan nyívi —catyí ra naha.

**Nu tyosó iin ñaha ndutya tami jiñi ra Jesús**

(Mr. 14:3-9; Jn. 12:1-8)

<sup>6</sup> Ra Jesús nyíi ra ñuu Betania, vehe ra Simón, ra tsa yihí cuehe tyaahyu. <sup>7</sup> Tan natuhvá iin ñaha nu nyaá ra Jesús, ndahá ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyosó ña ndutya can jiñi ra. <sup>8</sup> Tsa nyehé ra tsicá tsihin ra,

nduxaán ra naha tan catyí ra naha:

—¿Nacuenda jatívi ña ndutya tami can? <sup>9</sup> Vaha ca tun tsatyin xico ña can, tan ñihi cuaha ña xuhun tsihin can. Tan cuví jatyinyee ña tsi nyívi ndaahvi tsihin xuhun can —catyí ra naha.

<sup>10</sup> Tan tsa tsiñj ra Jesús tsa caahán ra naha, tacan tan catyí ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi.

<sup>11</sup> Tyin nyívi ndaahvi tandihí ñi quívi cua coo ñi tsihin ndo, maa tyin yuhu, ña naha ca cua cunyi yu tsihin ndo.

<sup>12</sup> Tyosó ña ndutya tami síqui cuñu ñuhu yu, tyin janduvahá ña itsi tyin cua cuhun tsi tsitsi ñuhu. <sup>13</sup> Tsa nditsa catyí yu tsihin ndo, tyin tandihí ñi nu cua cahan nyívi tuhun Nyoo tanií cahnu ñuhu ñayívi, cua nacatyí tuhun tucu ñi tsa javahá ñaha ihya, na nducuhun iñi nyívi tsi ña —catyí ra Jesús.

**Nu xico ra Judas Iscariote tsi ra Jesús**

(Mr. 14:10-11; Lc. 22:3-6)

<sup>14</sup> Tacan tan iin ra tsicá tsihin ra Jesús, ra tsa nañí Judas Iscariote, tsaahán ra tsicahán ra tsihin ra jutu tsa cuví ityi nuu naha ra. <sup>15</sup> Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsaahá ra naha oco utsi xuhun cuitsin tsi ra. <sup>16</sup> Tan nda quívi can tan quitsahá nducú ra Judas cuhva cua nacuhva cuenda ra tsi ra Jesús tsi ra jutu can naha ra.

**Nu cuxiñj ra Jesús tsihin ra tsicá tsihin ra**

(Mr. 14:12-25; Lc. 22:7-23; Jn. 13:21-30; 1 Co. 11:23-26)

<sup>17</sup> Quívi jihna ñi tsa quitsahá vico nu tsatsí nyívi paan tsa nduve yutsan

iya yihí, ra tsicá tsihin ra Jesús natuhvā ra naha nu nyaá ra tan quitsahā tsicá tuhun ra naha tsi ra tan catyí ra naha:

—¿Numaa cuñí un tsa cujanduvaha ndi tsa cuxiñi un cuenda vico pascua ihya?

**18** Tan catyí ra Jesús tsihin ra naha:

—Cuaahan ndo tsitsi ñuu nda vehe rayii ihya. Tan catyí ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, catyí ndo tsihin ra —catyí ra Jesús.

**19** Tacan tan javahā ra naha cuhva cahān ra Jesús tsihin ra naha. Tan janduvahā ra naha tsa cuxiñi ra naha vico pascua can.

**20** Tsa cunaaha tan tsicunyaā ra Jesús nu mesa tsihin tandihi utsi uvi ra tsicá tsihin ra. **21** Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooho cua xico ndo tsi yu tsi ra xaan iñi tsi yu.

**22** Tan nducuihya xaan cuñí ra naha, tan quitsahā tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

**23** Tan nacahān ra Jesús tan catyí ra:

—Ra tsa tsatsí iin ñi coho tsihin yu, ra ican cua xico tsi yu. **24** Yuhu, Rayii tsa quee nda gloria, cua tahan yu tumaa tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacū ra —catyí ra Jesús.

**25** Tacan tan nacahān ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahān ra Jesús, tan catyí ra:

—Juvín un.

**26** Tsitsi tsa tsatsí ra naha, ra Jesús quihñi ra paan tan nacuhvā ra tyahvi

nyoo tsi Nyoo, tan tsahnū sava ra, tan tsahā ra tsi ra tsicá tsihin ra, tan catyí ra tsihin ra naha:

—Catsi ndo. Paan ihya cuví tumaa cuñu ñuhu yu.

**27** Yahā can tan quihñi tucu ra vasu vinu, tan nacuhvā ra tyahvi nyoo tsi Nyoo, tan jayahā ra tsi tandihi ra naha tan catyí ra:

—Coho tandihi ndo vinu ihya.

**28** Tyin cuví tsi tumaa ñiñi yu. Tan tsihin ñiñi yu cua cundaa tyiñu tsa ndoo Nyoo tsihin ndo, tyin cua cati ñiñi yu tsa cuenda tsa vaha tsi nyivi cuaha, tyin tsihin ñiñi yu cua coo tucahnu iñi cuatyí ñi. **29** Tan catyí yu tsihin ndo, tyin ña cua coho ca yu tahan vinu tsa cuví ndutya uvas ihya, nda cuanda tsa coho yu vinu tsa tsihin ndo nda nu ndacá ñaha Jutu yu gloria —catyí ra.

**Nu cahān ra Jesús tyin cua cahān ra Pedro tyin ña nacotó ra tsi ra**

(Mr. 14:26-31; Lc. 22:31-34;  
Jn. 13:36-38)

**30** Tsa yahā tsa tsitā ra naha iin yaa Nyoo, tan cuahán ra naha yucu Olivo. **31** Tacan tan quitsahā caahán ra Jesús tsihin ra naha:

—Tandihi nyooho tan cua nacoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi.

**32** Maa tyin tsa yahā nandoto yu, jihna ca yu cua cuhun Galilea, tsa ndi cumañi ca cuhun nyooho.

**33** Tacan tan nacahān ra Pedro tan catyí ra:

—Vasu ndi maa tandihi ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

**34** Tacan tan catyí ra Jesús tsihin ra:

—Tsa nditsa catyí yu tsihin un tyin juvin ñi maa tsacuaa vityin, tsa ndi



cumañi ca vacu tsitooho, uñi tsaha  
cua cahan un tyin ña nacotó un tsi yu  
—catyí ra Jesús.

35 Tan ra Pedro catyí ra:

—Vasu ndi maa cúu yu tsihin un,  
maa tyin ña cua catyí yu tyin ña  
nacotó yu tsi un —catyí ra.

Tan juvin ñi tacan catyí tandihí ca  
ra tsicá tsihin ra.

**Nu tsicān tahvi ra Jesús tsi Nyoo  
nda Getsemaní**

(Mr. 14:32-42; Lc. 22:39-46)

36 Tacan tan tsaq ra Jesús tsihin ra  
tsicá tsihin ra iin nu iyó cuaha yutun  
nu nañi Getsemaní, tan catyí ra tsihin  
ra naha:

—Cunyecu ndo ihya tsitsi tsa  
cuahán yu ndacan cua ndacan tahvi  
yu.

37 Tan quihín ra tsi ra Pedro tan  
nduvi sehe ra Zebedeo cuahán tsihin  
ra. Tan quitsi tucuihya iñi cahnu tsi  
ra, tan tsa tuñu cuñi ra. 38 Tacan tan  
catyí ra tsihin ra naha:

—Cahnu xaan tucuihya iñi nyaá  
añima yu, nda cuanda cuñi cahni ña  
can tsi yu. Ndo ndo ihya tan coo  
nyito ndo tsihin yu —catyí ra.

39 Tacan tan cuahán ra Jesús luxu  
ca ityi nuu tan tsicuiñi tsiiti ra tan  
tsaquín ra nuu ra nda nu ñuhu, tan  
tsicān tahvi ra tsi Nyoo tan catyí ra:

—Tyaa, tun tsatyin cuvi jatsiyo  
nyaha un tundoho ihya siqui yu, vaha  
xaan. Maa tyin na ña cuvi cuhva cuñi  
maa yu, tan na cuvi cuhva cuñi maa  
un —catyí ra.

40 Tacan tan tsaq ra nu yucú ra  
tsicá tsihin ra, tan nyehe ra tyin quixí  
ra naha. Tan catyí ra tsihin ra Pedro:

—¿A ña cuvi coo nyito ndo tsihin  
yu vasu tan intuhun hora? 41 Coo  
nyito ndo, tan ndācan tahvi ndo tsi  
Nyoo; tacan tan ña cua javaha ndo  
cuhva cuñi nu ña vaha. Tsa nditsa  
tyin añima ndo, cuñi xaan tsi nanducu  
tsi tsi Nyoo, maa tyin cuñu ñuhu ndo  
cuví tsa vita cuñi —catyí ra Jesús.

42 Tan tsa tsahan ra tsa tsinu uvi  
tsaha, tsicān tahvi ra tyehen:

—Tyaa, tatun ña cuvi tsa jatsiyo  
nyaha un tundoho ihya siqui yu, na  
cuví cuhva cuñi maa un —catyí ra.

43 Tacan tan tsaq ra inga tsaha tan  
nyehe ra tyin quixí nyico ra tsicá  
tsihin ra, tyin tsicundasí maa tinuu ra  
naha tsihin tsa cuñi xaan ra naha  
cusu ra naha. 44 Tacan tan nacoo ra  
tsi ra naha, tan cuahán ra tsa tsinu  
uñi tsaha cua ndacan tahvi ra. Tan  
tsicān tahvi ra tsi Nyoo juvin ñi maa  
tsihin tuhun tsa tsa yahā cahan ra.

45 Tacan tan tsaq nyico ra nu yucú ra  
tsicá tsihin ra, tan catyí ra tsihin ra  
naha:

—Vityin cusu ndo tan quitatu ndo.  
Tyin tsa tsaq cuhva tsa cua nacuhva  
cuenda ra can tsi Rayií tsa quee nda  
gloria tsi ra iyó cuatyí naha ra.

46 Ndqvita ndo, cohon ndo. Tyin tsa  
vatsí ra tsa xico tsi yu —catyí ra  
Jesús.

**Nu tsahā cuenda ra Judas tsi ra Jesús  
tsi nu xaan iñi tsi ra nahnu**

(Mr. 14:43-50; Lc. 22:47-53; Jn. 18:2-11)

47 Ndi caahán ca ra Jesús yacan,  
tan tsaq ra Judas, ra tsa cuví iin ra  
tsicá tsihin ra Jesús. Tan tsihin ra  
Judas tsaq tucu cuaha xaan nyivi  
ndahá mityi tan yutun jacuhun ra  
cuví jutu tsa cuví ityi nuu naha ra tan  
ra cuví mandoñi nyivi Israel naha ra.

48 Tan ra Judas, ra tsa tsahā cuenda  
tsi ra Jesús, tsa yahā tsahā ra iin seña  
tsi ra can naha ra, tyin coto ra naha  
yóo cua tiin ra naha. Tyin tsa yahā  
cahan ra tsihin ra naha:

—Ra tsa cua tyayuhu yu, ra ican  
cuví ra tsa cua tiin ndo.

49 Tacan tan natuhva ra Judas nu  
nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

50 Tacan tan nacahan ra Jesús tan  
catyí ra tsihin ra:

—¿Náa tyiñu vatsí un ñih?

Tacan tan natuhvā ra can naha ra tan t̄iñ ra naha tsi ra Jesús.

51 Tacan tan iin ra cutahán tsihin ra Jesús, tava ra mityi tan tsahnyā ra soho musu jutu tsaahnu tsa cuví ityi nuu. 52 Tan catyí ra Jesús tsihin ra:

—Natyihí mityi un tsitsi vena un.

Tyin tandihí nyiví tsa cañí tahan tsihin mityi, juven ñi tsihin mityi cua cúu ñi. 53 ¿A ña tsitó un tyin tatun yuhu tan cuñí yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu?

54 Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

55 Tacan tan catyí ra Jesús tsihin tandihí nyiví:

—¿A vatsí t̄iñ ndo tsi yu tumaa cua t̄iñ ndo iin ñasuhu? tyin ndahá ndo mityi tan yutun. Tandihí quiví tsinyí yu jacuahā yu tsi ndo tsitsi vehe ñuhu cahnu, tan ña t̄iñ ndo tsi yu. 56 Tandihí yacan cuví tyin tacan tan cundaa cuhva catyí tuhun Nyoo, tsa tyaā ra cuví ndusu yuhu Nyoo tahān tsanaha.

Tacan tan tandihí ra tsicá tsihin ra, tsinū ra naha. Tan ndoq̄ intuhun ña maa ra.

**Nu tsicā tuhun ra mandoñi naha ra tsi ra Jesús tatun Sehe Nyoo cuví tsi ra**

(Mr. 14:53-65; Lc. 22:54-55, 63-71; Jn. 18:12-14, 19-24)

57 Tan ra tsa t̄iñ tsi ra Jesús, tsindacā ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra. 58 Tan ra Pedro cuahán ra tsata ra naha, tan tsaā ra nda nuquehe vehe ra Caifás can. Tan quihvī ra tan ndoq̄ ra nyíi ra tsihin vitya can naha ra, tyin cua nyehe ra nácaa cua quita tuhun can.

59 Ra jutu tsa cuví ityi nuu naha

ra, tan ra mandoñi naha ra, tan tandihí ra cumí tyiñu naha ra, nducū ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra. 60 Maa tyin ña ñihí maa ra naha cuatyí tyaa ra naha siqui ra, vasu ndi maa cuaha nyiví tsahān ñi tsicahān ñi cuendu siqui ra. Tan nu ndihí tuhun, tsaā uvi ca tsa ndaa tsa caahán cuendu. 61 Tan catyí ra naha:

—Ra ihya, catyí ra tyin cuví caní ra vehe ñuhu cahnu Nyoo, tan tsitsi tsa uñi quiví cua janduvita ra tsi inga tsaha —catyí ra naha.

62 Tacan tan ra jutu tsa cuví ityi nuu can, nduvitā ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

63 Maa tyin ra Jesús ña nacahān ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

64 Tan catyí ra Jesús tsihin ra:

—Juvén yu cuví. Tan catyí tucu yu tsihin ndo, tyin cua nyehe ndo tsi yuhu, Rayii tsa quee nda gloria, cunyaa yu xiin cuaha Nyoo ra iyó tandihí tunyee iñi, tan cua nyehe ndo nu cua quitsi yu nu vico ityi andiví inga tsaha —catyí ra.

65 Tacan tan ra jutu tsaahnu tsa cuví ityi nuu can tsahnyā ra jahma ra tumaa iin seña tyin cuñí maa ra tyin ña vaha tsa caahán ra Jesús, tan catyí ra tsihin tandihí ca ra naha:

—Ra ihya tsicoq̄ cuatyí ra nuu Nyoo tsihin tsa caahán ra. ¡Nyehe ndo vityin! Ña cuñí ca tsi tsa nducu yo inga tsa ndaa tyin tsa tsiñí maa ndo tsa ña vaha tsa cahān ra. 66 ¿Náa catyí ndo vityin?

Tan nacahān ra naha tan catyí ra naha:

—Iyó cuatyí ra, yacan taahán tsi

tša cúu ra.

67 Tacan tan tivì sîi ra naha nuu ra tan cañî ra naha tsi ra. Inga ra cañî ra naha nuu ra tsihin tsiquî. 68 Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañî tsi un!

**Nu cahān ra Pedro tyin ña nacotó ra tsi ra Jesús**

(Mr. 14:66-72; Lc. 22:56-62; Jn. 18:15-18, 25-27)

69 Tsitsi tsa ndi nyíi ra Pedro nuquehe ityi tsata vehe can, tan iin ñaha tsa cuví musu jutu can, natuhvā ña nu nyaá ra tan catyí ña tsihin ra:

—Yooho tucu tsicā un tsihin ra Jesús, ra Galilea can.

70 Tan ra Pedro catyí ra nuu tandihî nyivî yucú can:

—Ña tsicā yu tsihin ra can. Ña tsitó yu náa caahán un.

71 Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsicā ndihî tucu ra ihya tsihin ra Jesús, ra ñuu Nazaret —catyí ña.

72 Tan inga tsaha tyihî xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

73 Tañi cuui ca, tan ra yucú can natuhvā ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

74 Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvín ñi cuhva can navacú tsitooho. 75 Tacan tan nducuhun iñi ra Pedro tsa cahān ra Jesús tsihin ra: “Tsa ndi cumañi ca vacu tsitooho,

yooho tsa yahā cahān un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quitā ra ican, tan tsacū xaan ra tsa cuiihya cuñi ra tsa javahā ra tacan.

**Nu nacuhvā cuenda ra naha tsi ra Jesús tsi ra Pilato**

(Mr. 15:1; Lc. 23:1-2; Jn. 18:28-32)

**27** <sup>1</sup> Tan tsa tuvî inga quivî, tandihî ra jutu tsa cuvî ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús. <sup>2</sup> Tan nuuhñi ra jahā ra naha. Tan tsahān ra naha tsinacuhvā cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

**Nu tsihî ra Judas**

<sup>3</sup> Tsa nyehe ra Judas, ra tsa xico tsi ra Jesús, tyin cua cúu ra, tan ndu uvî iñi ra tsa javahā ra, tan nacuhvā ra tsa oco utsi xuhun cuitsin can tsi ra jutu tsa cuvî ityi nuu naha ra, tan tsi ra mandoñi ñuu naha ra. <sup>4</sup> Tan catyí ra:

—Tsicoo cuatyí yu, tyin tsahā cuenda yu tsi iin ra nduve cuatyí na cúu ra.

Tan nacahān ra naha tan catyí ra naha:

—¿Nacuenda nyuhu? ¡Nyehe maa yooho!

<sup>5</sup> Tacan tan tyoso ihñi ra Judas xuhun can tsitsi vehe ñuhu cahnu, tan quitā ra cuahán ra tsityihî ra yoho jucun ra tan ticaā ra tsi ra iin nu yutun, tan tsihî ra.

<sup>6</sup> Ra cuvî ityi nuu tsihin jutu can naha ra naquihîñ ra naha xuhun can tan catyí ra naha:

—Ña cuvî tyihî yo xuhun ihya tsitsi caja nu yihî xuhun tsa tsahā nyivî tsi Nyoo tyin xuhun tsa cuyahvî ra tsa cua cati ñiñi cuvî can.

<sup>7</sup> Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahā Quisi” tsihin xuhun can. Tyin coo nu cucutsi ra naha tsi

nyivi inga ñuu tun tsihi ñi ñuu can. **8** Yacan cuenda nañi ñuhu can nda cuanda vityin “Ñuhu Cuenda Tsa Tsatj Nihñi Nyivi”. **9** Tacan cuvi tyin cundaq tsa tyaq ra Jeremías, ra cuvi ndusu yuhu Nyoo tahan tsanaha nu catyí tsi tyehen: “Juvín ñi maa ra naha quihñ nyico tsa oco utsi xuhun cuitsin, tsa jata ra naha tsi ra Cristo. **10** Tan tsihin can, jata ra naha ñuhu tsa nañi ‘Ñuhu Ra Javahá Quisi’, tacan catyí Jutu Mañi yo tsihin yu”, catyí tsi.

**Nu nyehe ra Pilato tyin nduve  
cuatyí ra Jesús**

(Mr. 15:2-5; Lc. 23:3-5; Jn. 18:33-38)

**11** Tsindacq ra mandoñi can naha ra tsi ra Jesús nuu ra ndacá ñaha, tan ra can tsicq tuhun ra tsi ra, tan catyí ra:

—¿A yooho cuví rey cuenda nyivi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

**12** Tan cuhva tsa tyaq ra jutu can naha ra tan ra mandoñi naha ra cuatyí siqui ra, ña nacahan maa ra.

**13** Tacan tan catyí ra Pilato tsihin ra: —¿A ña tsiñi un tandihi tsa caahán ra naha siqui un?

**14** Maa tyin ra Jesús ña nacahan maa ra. Tan iyo xaan cuñi ra ndacá ñaha can tyin ña nacahan ra.

**Nu cahñ ra cumí tyiñu tyin taahán  
tsi cúu ra Jesús**

(Mr. 15:6-20; Lc. 23:13-25;  
Jn. 18:38-19:16)

**15** Tan vico pascua tuhvá ra ndacá ñaha jañá intuhun ra yucú vehe caa. Ndáa ra tsa nacatsi maa nyivi, juvín ra cua quita nuña. **16** Tan quivi can nyii iin ra tsa nañi Barrabás vehe caa. Tan tandihi nyivi tsitó tuhun ra. **17** Tan cuhva tsa ndu iñ nyivi, ra Pilato tsicq tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

**18** Tyin tsitó ra tyin tsa cuenda tsa ndasi cuñi ra jutu can naha ra nyehe ra naha tsi ra Jesús, yacan cuenda tsaha cuenda ra naha tsi ra tsi ra Pilato.

**19** Tsitsi tsa nyaá ra Pilato nu tyayu ra, nu jahá tyiñu ra, jacuhñ ñasihi ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhvi xaan tsi tsi yu”, catyí ña.

**20** Maa tyin ra jutu can naha ra tan ra mandoñi naha ra, cuñihñ ra naha natyuhú ra naha tsi nyivi na ndacan ñi tsa jaña ra Pilato tsi ra Barrabás, tan na cúu ra Jesús. **21** Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahan ñi, tan catyí ñi:

—Jaña tsi ra Barrabás.

**22** Tan ra Pilato tsicq tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañi Cristo ihya?

Tandihñ ñi nacahan ñi tan catyí ñi:

—jTyaa tsi ra nu cruu na cúu ra!

**23** Tacan tan catyí ra Pilato tsihin ñi:

—Tan ¿náa tsa ña vaha javaha ra? Maa tyin maa ñi can tsaa ñi inga tsaha tan catyí ñi:

—jTyaa tsi ra nu cruu na cúu ra!

**24** Tsa nyehe ra Pilato tyin ña cuvi jaha ra tsi nyivi, tyin ñihñ xaan cuvaá jahá ñi. Tacan tan tsicqñ ra ndutya, tan nacatyá ra ndaha ra nuu nyivi can, tan catyí ra:

—Ña cua ndoo cuatyí tsa cua cúu ra vaha ihya siqui yuhu, tyin siqui nyooho cua ndoo cuatyí can.

**25** Tan tandihñ nyivi nacahan ñi, tan catyí ñi:

—Na ndoo maa tsi siqui ndi tan

siqui sehe ndi.

26 Tacan tan ra Pilato jañā ra tsi ra Barrabás, tan tava tyiñu ra na ndoho ra Jesús, tan nacuhvā cuenda ra tsi ra tsi ra andaru naha ra na cúu ra nu cruu.

27 Tacan tan ra andaru cuenda ra Pilato, ra ndacá ñaha can tsindacā ra naha tsi ra Jesús nda vehe tyiñu ra Pilato, tan jandu iin ra naha tsi tandihī ca andaru nu nyaá ra.

28 Tacan tan tava ra naha jahma ra tan jacunditsi ra naha iin jahma cuaaha tsi ra. 29 Tan tyihī ra naha iin corona tsa tsinū tsihin iñu jiñi ra. Tan tsahā ra naha iin yutun tatun na cundaha ra tsihin ndaha cuaha ra. Tacan tan tsiuñiñi tsiti ra naha nuu ra, tan tsacu nducu ra naha tsi ra tan catyí ra naha:

—¡Nacumi tsi un, yooho Rey cuenda nyivi Israel!

30 Tan tivī siī ra naha tsi ra. Tan quihīn ra naha yutun tatun can tan cañi ra naha jiñi ra. 31 Tsa yahā tsa tsacu nducu ra naha tsi ra tan tava ra naha jahma cuaaha tsa nditsi ra, tan jacunditsi nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

**Nu tyaā ra naha tsi ra Jesús nu cruu**

(Mr. 15:21-32; Lc. 23:26-43;

Jn. 19:17-27)

32 Tsa quitā ra naha ican, tahān ra naha tsi iin ra ñuu Cirene, tsa nañi Simón. Tan jañiñi ra naha tsi ra na cuišo ra cruu ra Jesús.

33 Tan tsaā ra naha iin nu nañi Gólgota, tan cuñi tsi catyí “Yiqui Jiñi Ndiyi”. 34 Tan ican tsahā ra naha vinu nasacā tsihin ndutya uva xaan coho ra Jesús. Tan tsa yahā tsa tsihi ra luxu can, ña cuñi ca ra coho ra. 35 Tan tsa yahā tsa tyaā ra naha tsi ra nu cruu, tacan tan ra andaru can quihīn ra naha jahma ra tan tava cuenda ra naha tyin cua nyehe ra

naha ndáa ra jaha canaa intuhun intuhun jahma ra. Tacan cuvī tyin cundaā tuhun tsa tyaā iin ra cuvī ndusu yuhu Nyoo tahān tsanaha nu catyí tsi tyehen: “Tava cuenda ra naha tan tsatsā ra naha jahma yu”, catyí tsi. 36 Tacan tan tsinyecu ra naha ican tyin jaha cuenda ra naha tsi ra. 37 Tan ityi jiñi ra tyaā ra naha letra tsa catyí nacuenta cua cúu ra. Tan catyí tsi tyehen: “Ra ihya cuvī ra Jesús, rey cuenda nyivi ñuu Israel.”

38 Tan tyaā tucu ra naha uvi taahan ra suhu tsihin ra nu uvi taahan ca cruu. Iin ra tyaā ra naha xiin cuaha ra, tan inga ra xiin satyin ra. 39 Tan nyivi tsa yahá ican, caahán ñi tsi ra, tan javicó ñi jiñi ñi tsa tsacú nducu ñi tsi ra. 40 Tan catyí ñi tsihin ra:

—¡Yooho tsa cahān un tyin cua canī un vehe ñuhu cahnu, tan tsitsi tsa uñi quivi tan cua janduvaha nyico un itsi, jacacu tsi maa un vityin nu cruu juven, tatun nditsa tyin Sehe Nyoo cuvī tsi un! —catyí ñi tsihin ra.

41 Tan juven ñi tacan tsacú nducu ra jutu tsa cuvī ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahan ra naha tan catyí ra naha:

42 —Jacacu ra tsi inga nyivi, maa tyin ña cuvī jacacu ra tsi maa ra. Tun nditsa tyin Rey cuenda nyivi Israel cuvī ra, na nuu ra nu cruu can, tan cua tsinu iñi yo tsi ra. 43 Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñi ra tsi ra. Tyin catyi ra tsihin yo tyin Sehe Nyoo cuvī tsi ra.

44 Tan nda cuanda nu ñasuhu nahnu tsa nyaá nu cruu xiin ra tan tsacu nducu ndihī nahnu tsi ra.

**Nu tsihi ra Jesús**

(Mr. 15:33-41; Lc. 23:44-49;  
Jn. 19:28-30)

45 Tacan tan ndunaq tanih cahnu ñuhu ñayivi tsa ora tan nda cuanda caa uñi tsa tseñi. 46 Tan juvin ñi cuhva can, ñihi xaan cana tsa ra Jesús. Tan catyí ra:

—Elí, Elí, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenda nacoq ihñi un tsi yu?

47 Juhva ra yucú can naha ra, tsiñi ra naha tsa cahān ra, tan catyí ra naha:

—Ra Elías, ra cuvī ndusu yuhu Nyoo tsanaha, caná tsa ra.

48 Tan juvin ñi cuhva can, cuahán iin ra cua quihin ra iin yahma cuhva caá catyí, tan jatyi ra tsihin vinu iya, tan tyaa ra nu yutun, tan jatuhva ra yuhu ra Jesús tyin na coho ra.

49 Maa tyin inga ra naha catyí ra naha:

—Ña cūhva naha un can tsi ra; na nyehe jihna yo tatun cua quitsi jacacu ra Elías tsi ra.

50 Inga tsaha cana tsa ñihi ra Jesús, tacan tan tsihi ra. 51 Tan juvin ñi cuhva can ndata sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siqui tan nda cuanda ityi tsaha. Tan ñihi xaan taan. Tan tahvi cuatyí cava nahnu. 52 Tan nuñā yuhu ñaña. Tan cuaha nyivi tsa tsinú iñi tsi Nyoo tan tsihi ñi, nandoto ñi. 53 Tan tsa yaha nandoto ra Jesús quita ñi nu ñaña tan quihvi ñi tsitsi ñuu Jerusalén, tan cuaha nyivi nyehe tsi ñi. 54 Tacan tan ra capitán tan ra andaru tsa jahá cuenda tsi ra Jesús, nayuhvi xaan ra naha tsa taan, tan tsa nyehe ra naha inga ca tsa cuvī. Tan catyí ra naha:

—Nditsa nditsa cuii, tyin Sehe Nyoo cuvī tsi ra ihya.

55 Cuaha ñiñaha tsa tsinyicun tsi ra Jesús nda Galilea tan jatyinyee ñi

tsi ra, yucú ñi nyehé ñi ndasava.

56 Tan juhva ñi ican cuvī ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

**Nu tsicutsi ra naha tsi ra Jesús**

(Mr. 15:42-47; Lc. 23:50-56;  
Jn. 19:38-42)

57 Cuhva tsa cuñi cuaa, quitsi iin ra cuca tsa nañi José, ra ñuu Arimatea. Tan tsinú iñi ra tsi ra Jesús. 58 Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra. 59 Tacan tan quihin ra José cuñu ñuhu ra, tan cava nuu ra iin jahma cuitsin vaha tsi ra. 60 Tan tyihī ra cuñu ñuhu ra Jesús tsitsi iin ñaña tsa tsa cuvī iin yavi yuu tsa tava tyiñu ra tsatya ra naha. Tan tsa yaha tsa nacasi ra yuhu ñaña can tsihin iin yuu cahnu, tan cuahán ra. 61 Tan ña María tsa quee Magdala, tan inga ña María, ndoo ñi yucú ñi yuhu ñaña can.

**Nu jahá cuenda ra andaru ñaña ra Jesús**

62 Tan tsa inga quivi, quivi quitatú nyivi cuvī can, tan ra jutu tsa cuvī ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato. 63 Tan catyí ra naha tsihin ra:

—Yooho taa, nducuhun iñi ndi tyin ra vatya can, catyí ra tahan nyito ra tyin tsa yaha tsa uñi quivi tsa cua cúu ra tan cua nandoto ra. 64 Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cahun ra tsica tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuvī, yaha ca cuhva cua cuvī tan ñavin ca tsa jihna ñi —catyí ra naha.

65 Tan ra Pilato catyí ra:

—Quihin ndo andaru ihya.

Cyaahan ndo, tan jaha cuenda vaha ndo ñaña can, nácaa cunyee maa ndo jaha cuenda ndo —catyí ra.

66 Tacan tan cuahán ra naha, tan jaha cuenda vaha ra naha ñaña can, tan tyaá ra naha iin tsa tyaá ra naha tsata yuu tsa ndasí can tyin tatun nacanda yuu can coto ra naha. Tan nacoó ra naha tsi ra andaru jahá cuenda ra naha ican.

### Nu nandotoj ra Jesús

(Mr. 16:1-8; Lc. 24:1-12; Jn. 20:1-10)

**28** <sup>1</sup> Tsa yaha quiví tsa quitatú nyiví, cuhva tsa cuñí cunditsin, nu quitsahá tsaha vitya, tan ña María tsa quee Magdala can, tan inga ña María tsahan ñi nu ñaña. <sup>2</sup> Tan ñihi xaan taan tyin quitsj iin ángel Jutu Mañi yo quee ra andívi, tan tsaá ra nu ñaña can. Tan jatsiyó ra yuu tsa ndasí yuhu can, tan tsiyunyaá ra tsata can. <sup>3</sup> Tan xiñu xaan ra, tumaa tsa cañí tatsa. Tan cuitsin xaan jahma ra. <sup>4</sup> Cuhva tsa nyehé ra andaru can naha ra tsi ra, nayuhví xaan ra naha tan quitsahá nihí ra naha, tan nda cuanda tsihi naaha ra naha tsihin tsa yuhví ra naha. <sup>5</sup> Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo. <sup>6</sup> Yoñi ca ra nyii ihya, tyin tsa nandotoj ra, tumaa catyí ra. Naha ndo tan nyehé ndo nu tinyi ra naha tsi ra. <sup>7</sup> Janumi xaan ndo cuhun ndo cucatyí tuhun ndo tsihin ra tsica tsihin ra tyin tsa nandotoj ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

<sup>8</sup> Tacan tan numi ñi quitá ñi nu ñaña can. Yuuhví ñi, tan sñi xaan cuñí tucu ñi. Tan tsinú xaan ñi cuahán ñi cua catyí tuhun ñi tsihin ra tsica

tsihin ra Jesús. <sup>9</sup> Tan cuhva can quituví ra Jesús nuu ñi tan tsahá ra nacumi tsi ñi. Tacan tan natuhvá ñi nu nyaá ra tan tsiuiní tsiti ñi nuu ra tan jacahnú ñi tsi ra, tan tsiyunumí nyaa ñi tsaha ra. <sup>10</sup> Tan catyí ra tsihin ñi:

—Ña nayuhvi ndo. Cyaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

### Tuhun tsa nacatyí tuhun ra andaru naha ra

<sup>11</sup> Tsitsi tsa cuahán ñi can, juhva andaru tsa jaha cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra. <sup>12</sup> Tacan tan ra jutu can naha ra tsahan ra naha tsicahan ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsahá ra naha tsi ra andaru can naha ra.

<sup>13</sup> Tan catyí ra naha tsihin ra naha: —Nyooho cua cahan ndo tyin tsa tsacuaa tsitsi tsa quixí ndo, tsahan ra tsica tsihin ra Jesús tan quihin ra naha cuñu ñuhu ra. <sup>14</sup> Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo. <sup>15</sup> Tacan tan quihin ra andaru can xuhun can, tan cuahán ra naha cuajavahá ra naha cuhva catyí ra naha tsihin ra naha. Tan nda quiví vityin tan tacan caahán nyiví ñuu Israel.

### Nu tava tyiñu ra Jesús tsi ra tsicá tyiñu ra

(Mr. 16:14-18; Lc. 24:36-49; Jn. 20:19-23)

<sup>16</sup> Tan tacan, tandihí tsa utsi iin ra tsica tsihin ra, cuahán ra naha nda Galilea nda yucu nu catyí maa ra Jesús tsihin ra naha tyin cuhun ra

naha. **17** Tan cuhva tsa nyehe ra naha tsi ra Jesús, jacahn̄u ra naha tsi ra, maa tyin juhva ra naha uvi ñi tsicá iñi ra naha. **18** Tacan tan natuhv̄a ra Jesús nu nyecú ra naha tan catyí ra tsihin ra naha:

—Nyoo tsahā ra tsa cundaca ñaha yuhu tandih̄i andiv̄i tan nu ñuhu ñayiv̄i ihya. **19** Yacan cuenda, c̄uaahan ndo tandih̄i nu iyó nyiv̄i, tandih̄i ñi ñuu, tan çatyí ndo tsihin ñi

na cunycun ñi tsi yu. Tan jacoondutya ndo tsi ñi tsihin siv̄i Jutu yo Nyoo tan tsihin siv̄i yuhu Sehe ra, tan tsihin siv̄i Tatyí li ra. **20** Tan jacuaha ndo tsi ñi na tyaa yahvi ñi tandih̄i tsa catyí yu tyin javaha ndo. Tan coto ndo tyin yuhu cunyaa yu tsihin ndo tandih̄i quiv̄i nda cuanda naa ñayiv̄i —catyí ra Jesucristo tsihin ra tavā tyiñu ra.

Tan na cuvi tsi tacan ñi.